

কসিয়ার ইতিহাস

শ্রীরাজকৃষ্ণ রায় প্রণীত

[পরিশিষ্ট সমেত]

কলিকাতা,

৯৭ নং কলেজ ষ্ট্রীট, বেঙ্গল মেডিক্যাল লাইব্রেরী হইতে

শ্রীগুরুদাস চট্টোপাধ্যায় কর্তৃক প্রকাশিত

ও

৩৭ নং মেছুয়াবাজার ষ্ট্রীট, — বীণাযন্ত্রে

শ্রীশরচ্চন্দ্র দেব দ্বারা মুদ্রিত ।

•

২৫এ আষাঢ়, ১২৯২

রুসিয়ার ইতিহাস

প্রথম অধ্যায়

রুসিয়ার বিবরণ।

ভূরক্ষ দেশের ঞায় রুস সাম্রাজ্য কিয়দংশে ইউরোপে এবং কিয়দংশে এসিয়াতে স্থিত। এসিয়ার সমস্ত উত্তর ভাগ রুসিয়ার অধীন। বিভিন্ন-জাতীয় বহুসংখ্যক লোক এই দেশে ইতস্তত বাস করে। কিন্তু দেশটি অতি বৃহৎ বলিয়া লোক-বসতি ঘন না হইয়া বিরল। সেই সকল লোক গৃহ পালিত পশুগণের খাদ্য সংগ্রহ করিবার জন্ত নানাস্থানে ভ্রমণ করিয়া বেড়ায়।

সাইবিরিয়া নামক দেশটি এসিয়ার প্রায় সমস্ত উত্তর ভাগ নিজের সীমাবদ্ধ করিয়া আছে। এই সাইবিরিয়া রুসিয়ার অন্তর্গত। সাইবিরিয়া দেশটিতে শীতের প্রাচুর্য্য অতিশয় বেশী। তত্রস্থ লোকেরা বড় গরিব। তাহারা পশুচর্মে শরীর ঢাকে, এবং বেশীর ভাগই কুটীরে বাস করে। রুস-সম্রাট তাঁহার প্রজাগণের মধ্যে যাহাদিগকে শত্রু বিবেচনা করেন, তাহাদিগকে এই ভয়ঙ্কর স্থানে নির্বাসিত করেন।

ইউরোপ রুসিয়ার যে অংশ স্থিত, উহা খুব বৃহৎ। প্রায় আমেরিকার ইউনাইটেড স্টেট্‌সের ঞায় বড়। তা ছাড়া ইউরোপের প্রত্যেক রাজ্যের অপেক্ষা উহার পরিসর বেশী। উহার লোকসংখ্যা ৬,৩০,০০,০০০ ছয় কোটি ত্রিশ লক্ষেরও অধিক।

রুসিয়ার সম্রাট একজন যথেষ্ট ক্ষমতামালী রাজা। তিনি তাঁহার ইচ্ছানুসারে প্রজাগণকে পালন ও শাসন করেন। তাঁহার ইচ্ছা ব্যতীত কোন আইন-কানুন হইতে পারে না। কিন্তু বর্তমান সম্রাটের পিতা প্রজা-দিগের শাসন সম্বন্ধে অনেক সুনীতি প্রচার করিয়া গিয়াছেন।

সম্রাটের নানা স্থানে রাজ-অটালিকা আছে । কিন্তু তিনি প্রধানতঃ সেণ্ট পিটার্সবর্গের রাজপ্রাসাদেই অবস্থান করিয়া থাকেন । তাঁহার অনেক সৈন্ত আছে । তিনি সর্বদা বহু-সৈন্ত-মণ্ডলী-বেষ্টিত হইয়া কালক্ষেপ করেন ।

মানচিত্রে দেখিতে পাওয়া যায়, ইউরোপের অন্তর্গত রুস রাজ্য, উত্তরে উত্তর বা ফ্রোজান সমুদ্রে হইতে দক্ষিণে কৃষ্ণসাগর পর্যন্ত বিস্তৃত । এই বিস্তৃতির পরিমাণ প্রায় ১০০০ এক হাজার ক্রোশ । রুসিয়ার পূর্বসীমায় ইউরাল বা ওরাল পর্বত ; পশ্চিম সীমায় ফিনল্যাণ্ড উপসাগর, বল্টিক সাগর, প্রুসিয়া, অস্ট্রিয়া এবং তুরস্ক রাজ্য ।

এই বৃহৎ রাজ্যের আবহাওয়া নানারূপ । ফ্রোজান সমুদ্রের নিকটবর্তী হ্রদ সকল বৎসরের মধ্যে নয় মাস কাল বরফে আচ্ছন্ন হইয়া থাকে । রুসিয়ার মধ্যাংশে কানাডা রাজ্যের স্থায় দারুণ শীত ; দক্ষিণাংশের আবহাওয়া উষ্ণ ও সুখকর । এখানে আঙ্গুর ও অন্যান্য নানারূপ ফল উৎপন্ন হয় ।

রুসিয়ার রাজধানীর নাম সেণ্ট পিটার্সবর্গ । উহা নিভা নদীর তীরে স্থাপিত । নিভা নদী ফিনল্যাণ্ড উপসাগরে প্রবাহিত হইতেছে । সেণ্ট পিটার্সবর্গ সুন্দর নগর । এই নগরে যেরূপ নানাবিধ চমৎকার দৃশ্য দেখিতে পাওয়া যায়, সেরূপ দৃশ্য পৃথিবীর আর কোথাও নাই । সেণ্ট পিটার্সবর্গে অনেক বড় বড় অটালিকা আছে । সেই সকল অটালিকাবাসীরা এত ধনী যে, তাঁহাদের মধ্যে কতকগুলি ব্যক্তি দুই তিন শত ভৃত্য রাখিয়া থাকেন ।

অবশিষ্ট বিবরণ ।

রুসিয়ার আর একটি প্রধান নগরের নাম মস্কাউ । উহার আয়তন প্রায় সেণ্ট পিটার্সবর্গের স্থায় । উহা একটি সুপ্রসিদ্ধ প্রাচীন নগর । পূর্বে সেখানে রুসের রাজারা বাস করিতেন । কিন্তু রুসেরা ১৮১২ খৃষ্টাব্দে সসৈন্ত নেপো-

লিয়ন বোনাপার্টকে সেখানে প্রবেশ-বাধা দিবার ক্ষমতা উহার অধিকাংশ অগ্নিসংযোগে ভস্মীভূত করিয়াছিল। সেই অবধি আজ পর্যন্ত, সেখানে আর রাজধানী নাই। বাহাউক, অগ্নাত্ত লোকের থাকিবার নিমিত্ত মস্কাত নগর পুনরায় নিৰ্মিত হইয়াছে।

• সেণ্ট পিটার্সবর্গে বিবিধ বাণিজ্য দ্রব্য দেখিতে পাওয়া যায়। ইংবাজ-দের জাহাজ সেখানে গিয়া শণ, লৌহ, চৰ্ম, চৰ্ব্বি এবং অগ্নাত্ত বাণিজ্য দ্রব্য আনয়ন করে। কিন্তু মস্কাত নগর জলপথ হইতে অনেক দূরে থাকাতে কোন নৌ-বাণিজ্যের সুবিধা হয় না।

রুসিয়ার জার অর্থাৎ সম্রাটের জায় পৃথিবীতে অগ্নাত্ত কোন রাজার নানাবিধ মনুষ্যের উপর আধিপত্য নাই। তাঁহার ইউরোপের অন্তর্গত রাজ্যের মধ্যে অন্ততঃ ৬০ খাট প্রকার বিভিন্ন জাতির বসতি আছে। উহারা বিভিন্ন ভাষায় কথা কহে এবং বিভিন্ন উপায়ে জীবিকা নির্বাহ করিয়া থাকে। কিন্তু তাঁহার এসিয়ার অন্তর্গত রাজ্য মধ্যে ভিন্ন-জাতীয় লোকের সংখ্যা আরও বেশী। ইউরোপীয় রুসিয়ার উত্তর বিভাগে ল্যাপল্যাণ্ডার, সামাইডেস্ প্রভৃতি কয়েক জাতীয় মনুষ্য আছে। উহারা দেখিতে খর্বাকার ও পাণ্ডুবর্ণ। উহারা অতি অসভ্য। যাহারা সমুদ্রের নিকটবর্তী স্থানে বাস করে, তাহাদের মৎস্যই এক মাত্র আহার। তাহারা এরূপ মৎস্যশী যে, তাহাদের গাত্র হইতেও মৎস্যের গন্ধ নির্গত হয়। আমেরিকার উত্তর ভাগের এস্কুইমক্স ইণ্ডিয়ান জাতির সহিত ইহাদিগের সাদৃশ্য আছে।

শীতকালে ঐ সকল লোকের বড় কষ্ট হয়। উত্তর প্রদেশে চারি ভাগের তিন ভাগ সময়ে শীতের প্রাচুর্য্য দেখা যায়। সেখানে কখনও কখনও একাধিক্রমে ছয় মাস রাত্রি থাকে। কিন্তু এই দীর্ঘকালব্যাপী অন্ধকারেও তাহারা অভ্যাসবশতঃ তেমন কষ্ট অনুভব করে না। যদিও তাহারা লেখা পড়া জানে না, যদিও তাহাদের পুস্তকাদি নাই, তথাপি তাহারা মৌখিক গল্পে ও অগ্নাত্তরূপ রসিকতায় সুখে কাল যাপন করে।

ঐ সকল জাতির ইতিহাস নাই। তাহারা ইতিহাস রাখিবারও প্রয়োজন মনে করে না। এক বংশের পর এক বংশ যাইতেছে আর সেই সঙ্গে তাহাদের বংশানুক্রমিক ঘটনাও বিলুপ্ত হইতেছে। তাহারা সুদ্ধ-ব্যাপার

বা অন্য কোন বিশেষ ঘটনা জানে না। সে সকল লোকের পূর্বপুরুষেরা
 ষেভাবে জীবন যাপন করিয়া গিয়াছে, উহারাও ঠিক সেইরূপে চলিতেছে।
 উহারা রুসীয় সম্রাটের শাসন স্বীকার করে, কিন্তু কখনও তাঁহাকে
 দেখিতে পায় না। কারণ, শীতের অত্যন্ত প্রাচুর্য্য বশতঃ সম্রাট সে প্রদেশে
 গমন করেন না।

ইউরোপীয় রুসিয়ার দক্ষিণ এবং পশ্চিম অংশে তাতার জাতীয় লোকেরা
 বাস করে। উহারা দ্রুতগামী অশ্বারোহণে বড় আমোদপ্রিয়। ডন নদীর
 সীমায় কসাক নামে এক জাতীয় লোকের বসতি; উহারাও অশ্বারোহণ-
 প্রিয়। তা ছাড়া উহারা বড় বড় বর্সা লইয়া শত্রুদিগের সহিত ভয়ানক যুদ্ধ
 করে। উহাদের হস্ত-কৌশল এরূপ যে, দেড় শত হস্ত দূর হইতে শত্রুর
 প্রতি বর্সা নিক্ষেপ করিতে পারে।

ইহা ছাড়া রুসরাজ্যে যিহুদী, পোল, জর্মন এবং গিপ্সি জাতির বসতি
 আছে। নগরবাসীরা ইচ্ছা ও সুবিধা মত জীথিকা নির্বাহের উপযোগী
 কাজ কর্ত্ত্ব করিয়া থাকে।

রুসিয়ার অন্তর্গত পোলণ্ডের সম্মুখস্থ প্রদেশ সর্ব্বাপেক্ষা উর্ব্বর। তত্রস্থ
 লোকেরা স্ব স্ব প্রতিবেশীগণকে উৎপন্ন শস্য দিয়া সাহায্য করে। রুস
 রাজ্যের উত্তর ভাগ কেবল শীত-প্রধান নহে, উহার অধিকাংশ জলাভূমি
 এবং নিবিড় অরণ্যে পরিপূর্ণ। সেই সকল অরণ্যে বহুসংখ্যক হিংস্র জন্তু
 দেখা যায়। রুসেরা পশুলোমের জন্তু বিশেষ বিখ্যাত। তাহারা ইংলণ্ড
 প্রভৃতি অত্র অত্র দেশে পশুলোম রপ্তানি করিয়া থাকে। তা'ছাড়া তাহাদের
 দেশে যে প্রস্তুত পশুচর্ষ্য পাওয়া যায়, তাহার রং, গন্ধ এবং কোমলতা পৃথি-
 বীর অন্য কোন স্থানের চর্ষ্যে নাই। ঐ চর্ষ্য খুব উৎকৃষ্ট।

তৃতীয় অধ্যায়

পিটার দি গ্রেট ।

প্রথম ও দ্বিতীয় অধ্যায়ে রুসিয়ার সংক্ষিপ্ত বিবরণ দেওয়া হইল । এক্ষণে ইহার ইতিহাসের কথা কিছু বলা উচিত । পূর্বের রুসরাজ্য অসভ্যদিগের বাসভূমি ছিল । একশত বৎসরের কিছু অধিক হইতে ক্রমে ক্রমে ইহার অবস্থা পরিবর্তিত হইয়া আসিতেছে । সম্রাট পিটার দি গ্রেটের সিংহাসন আরোহণের পূর্বে রুসরাজ্য সভ্যজাতিদিগের রাজ্যের দ্বায় পরিগণিত হইতে পারে নাই ।

পিটার দি গ্রেট একজন অদ্বুত লোক ছিলেন । যদিও তিনি স্বীয় রাজ্যকে সভ্য পদবীতে স্থাপিত করিতে আরম্ভ করিয়াছিলেন, তথাপি আপনাকে সভ্য ভব্য করিতে পারেন নাই । ফল কথা, কিয়দংশে তিনি অসভ্যের দ্বায় জীবন যাপন করিতেন ।

রুসিয়ার সম্রাটদিগকে জার (Czar) কহে । জার পিটার পঞ্চবিংশ বর্ষ বয়ঃক্রম কালে রাজসিংহাসন পরিত্যাগ করিয়া, জ্ঞান-শিক্ষার জন্ত সমস্ত ইউরোপ খণ্ডে ভ্রমণ করিয়াছিলেন । কিন্তু তিনি কোন প্রসিদ্ধ বিদ্যা-বিদ্যালয়ে প্রবেশ করেন নাই, কিম্বা কোন প্রাচীন ভাষা শিক্ষাতেও মনোযোগ দেন নাই ।

পিটারের জ্ঞান-শিক্ষা অন্তরূপ ছিল । তা'র মধ্যে একটি এই;—তিনি হলণ্ড দেশে গমন করিয়া, ছদ্মবেশে একজন নৌ-সূত্রধরের নিকট জাহাজ নির্মাণ-কার্য শিক্ষার নিমিত্ত, শিক্ষানবিশরূপে নিযুক্ত হইয়াছিলেন । তিনি সেখানে গিয়া যে বাড়ীতে অবস্থান করিতেন, সে বাড়ী আজিও আছে । তা'র পর তিনি ইংলণ্ডে গিয়া পুনর্ব্বার জাহাজ-নির্মাণ-কার্য শিক্ষা করিয়াছিলেন । ইহা ছাড়া তিনি অন্যান্যরূপ শিক্ষাকার্য ও অন্ত-চিকিৎসাও শিক্ষা করিয়াছিলেন । ফল কথা, যাহাতে তাঁহার এবং তাঁহার প্রজাবর্গের মঙ্গল সাধিত হইতে পারে, এইরূপ কোন প্রকার জ্ঞান শিক্ষায় তিনি অবহেলা করেন নাই । তিনি বিদেশে এক বৎসরের কিছু অধিক কাল থাকিয়া

শুনিতে পাইলেন যে, তাঁহার ভগিনী রুসরাজ্যের সম্রাজ্ঞী হইবার চেষ্টা করিতেছেন। এই বিরক্তিকর সংবাদে তিনি বাঁধ্য হইয়া সকল প্রকার কার্য্য-শিক্ষা পরিত্যাগ পূর্ব্বক অনতিবিলম্বে মস্কো নগরে ফিরিয়া আসিলেন। আসিয়াই ষড়ষত্কারীদিগের কয়েক ব্যক্তির প্রাণ সংহার করিলেন এবং ভগিনীকে কারাগারে অবরুদ্ধ করিয়া রাখিলেন।

তা'র পর, পিটার দি গ্রেটের অধিকাংশ সময় যুদ্ধ-ব্যাপার এবং রাজ্য-শাসনে অতিবাহিত হইতে লাগিল। এই জন্ত তিনি তাঁহার আরক্ত শিক্ষাদি কার্য্য-শিক্ষার পূর্ণ সৌম্য উপস্থিত হইতে পারিলেন না। কিন্তু যতদূর শিক্ষা করিয়াছিলেন, তাহা নিষ্ফল হয় নাই। তাহার ফলে রুসিয়ার অনেক উন্নতি হইতে লাগিল।

পিটার প্রত্যহ প্রত্যুষে ষ্টোর সময় শয্যা হইতে গাত্রোথান করিয়া সমস্ত দিন রাজ্য-সংক্রান্ত কার্য্যে ব্যাপৃত থাকিতেন। তা'র পর, রাজকাৰ্য্য সম্পন্ন করিয়া সন্ধ্যার সময় বিশ্রাম লাভ করিতেন। সে সময়ে তাঁহার নিকট তীব্র মদিরাপূর্ণ একটি বৃহৎ বোতল থাকিত। তিনি যে পর্য্যন্ত না জ্ঞানশূন্য হইতেন, ততক্ষণ পান করিতেন।

এই সুরাপান অভ্যাসের সহিত তাঁহার চরিত্রগত অত্যাচার, তাঁহার কি বন্ধু, কি শত্রু, সকলের পক্ষেই ভয়ঙ্কর হইয়া উঠিত। পিটার এক এক সময় হুঃখ করিয়া বলিতেন যে, তিনি রুসরাজ্যের অনেক দোষ সংশোধন করিয়াছেন বটে, কিন্তু নিজের বেলা পারেন নাই।

পিটারের নিকট বাহারা অপরাধী হইত, তিনি তাহাদিগকে স্বয়ং বেত্রাঘাত করিতেন। সামান্য লোকের কথা দূরে থাক, রুসরাজ্যের প্রথম শ্রেণীর সম্রাস্ত লোকদিগকেও পিটারের বেত্রাঘাত সহ করিতে হইত। এমন কি, সময়ে সময়ে তাঁহার প্রিয়তমা পত্নী ক্যাথারাইনের পৃষ্ঠেও সেট বেত্র সবলে নৃত্য করিত। তবু ক্যাথারাইন স্বামীর নিকট সর্বদা দোষের উপযুক্ত শাস্তি পাইতেন না। হাজার হোক, রাজার রাণী কি না।

কেহ কেহ বলেন, পিটার দি গ্রেট গোপনে গোপনে তাঁহার পুত্রকে কারাগারে নিক্ষিপ্ত করিয়া নিহত করিয়াছিলেন। পিটারের অনেক দোষ ছিল, অনেক অত্যাচার ছিল; তথাপি তাঁহার নাম রুসিয়ার সমস্ত সম্রাটের

অপেক্ষা প্রসিদ্ধ । একদা হইবার কারণ এই, তিনি প্রজাগণের মঙ্গল সাধনের জন্য বহু দিন ধরিয়া কঠিন পরিশ্রম করিয়াছিলেন । পিটার পূর্ববর্তী ও পরবর্তী জারেরদের অপেক্ষা রাজ্যের যথেষ্ট উন্নতি করিয়াছিলেন ।

চতুর্থ অধ্যায় ।

পিটার দি গ্রেটের উত্তরাধিকারিগণ ।

১৭২৫ খৃষ্টাব্দে, ৫৩ বৎসর বয়সে পিটার দি গ্রেট প্রাণত্যাগ করিলে তাঁহার সহধর্মিণী রাণী ক্যাথারাইন সিংহাসনে আরোহণ করিলেন । ক্যাথারাইন জনৈক দরিদ্র গ্রাম্য লোকের কন্যা । কিন্তু তাঁহার রূপ অতিশয় অপরূপ ছিল । এই রূপের বলেই তিনি পিটার দি গ্রেটের সহধর্মিণী হইয়াছিলেন । রাণী ক্যাথারাইন দোষে গুণে জড়িত ছিলেন । দোষের মধ্যে সুরাপানটাই বেশী । রাণী ক্যাথারাইন প্রায় দুই বৎসর কাল রাজ্য-শাসন করিয়াছিলেন ।

পরে রাজপৌত্র দ্বিতীয় পিটার সিংহাসনে আরোহণ করিলেন । দ্বিতীয় পিটার ১৭৩০ খৃষ্টাব্দে হইলোক ত্যাগ করেন । তাঁহার ভ্রাতাপুত্রী এন্ আভানয়না রাজসিংহাসন প্রাপ্ত হইলেন । আভানয়না উচ্চদের রাণী ছিলেন, এবং অনেকগুলি প্রশংসার কার্যও করিয়াছিলেন । তাঁহার প্রশংসিত কার্য সমূহের মধ্যে ভূষার-প্রাসাদ (Palace of Ice) সর্বাপেক্ষা প্রেষ্ঠ । সেই ভূষার-প্রাসাদ দেখিতে বড় মনোহর । একটি বরফময় হ্রদের মধ্যস্থলে উহা নিশ্চিত হইয়াছিল । কাষ্ঠ এবং প্রস্তরের পরিবর্তে উহার ছাদ, ভিত্তি, গৃহ সমস্তই বৃহৎ বৃহৎ বরফ খণ্ডে গঠিত হইয়াছিল । খাট, পালঙ্ক, মেজ প্রভৃতি সমস্ত আসবাবও বরফের । রাত্রিকালে যখন উহার মধ্যে আলো দেওয়া হইত, তখন দেখিলে বোধ হইত, সমস্ত প্রাসাদটি যেন অনন্ত হীরকে ঝকঝক করিতেছে ।

এন্ আভানয়নার পর রাজকুমারী এলিজাবেথ সিংহাসনের উত্তরাধি-

কারিণী হন। এলিজাবেথ পিটার দি গ্রেটের কন্যা। তিনি ১৭৪০ খৃষ্টাব্দে সিংহাসনারূঢ় হইয়া ২২ বৎসর কাল রাজ্য শাসন করিয়াছিলেন। তা'র পর ১৭৯২ খৃষ্টাব্দে তৃতীয় পিটার রুসিয়ার রাজা হন। পিটার দি গ্রেটের কন্যা ইহারও পত্নীর নাম ক্যাথারাইন। কিন্তু পতিপত্নী একসঙ্গে দীর্ঘকাল রাজ-সিংহাসনে উপবেশন করিতে পারেন নাই। এমন শুনিতে পাওয়া যায়, রাণী ক্যাথারাইন একাকিনী রাজ্যপ্রয়াসিনী হইয়া, স্বামীকে ষড়যন্ত্রে সিংহাসনচ্যুত ও নিহত করিয়াছিলেন।

কিন্তু যদিও রাণী ক্যাথারাইন এরূপ অত্যাচারিণী ছিলেন, তথাপি তাঁহার রাজ্যশাসনী বুদ্ধি বিশেষ প্রখর ছিল। এই বুদ্ধিবলেই তিনি পৃথিবীর অসংখ্য সুপ্রসিদ্ধ রাজারাজীদের মধ্যে অন্যতর উপযুক্ত বলিয়া গণ্য হইয়াছেন। ১৭৯৬ খৃষ্টাব্দে মৃত্যুর অব্যবহিত পূর্বে রাণী ক্যাথারাইন ভূরক্ষুদিগকে স্বরাজ্য হইতে দূরীভূত করিবার জন্ত চেষ্টা করিয়াছিলেন। যদিও তিনি তাহা করিতে পারিতেন, তাহাহইলে তাঁহার রাজ্য, ভূমধ্যস্র সাগর হইতে উত্তর সাগর পর্যন্ত বিস্তৃত হইত। কিন্তু কার্যসিদ্ধির পূর্বেই তাঁহাকে ইহলোক পরিত্যাগ করিতে হইয়াছিল।

রাণী ক্যাথারাইনের মৃত্যুর পর, তদীয় পুত্র পল ৪৩ বৎসর বয়স্করূপে রাজসিংহাসন প্রাপ্ত হইলেন। মাতার কন্যাপুত্র পালের কার্য্যকরী রাজবুদ্ধি আদৌ ছিল না। তা ছাড়া তিনি একরোকা ও অস্থিরচিত্ত ছিলেন। প্রজারা তাঁহাকে দুরন্ত পাগল বলিত। পলের চরিত্র ক্রমে ক্রমে সকলের পক্ষে এরূপ অসহ্য হইয়া উঠিয়াছিল যে, কতকগুলি সম্ভ্রান্ত ব্যক্তি ষড়যন্ত্র করিয়া তাঁহাকে হত্যা করিয়াছিলেন।

সম্রাট পলের জ্যেষ্ঠ পুত্র আলেকজান্দার সিংহাসনে আরোহণ করিলেন। এই সম্রাট ১৮০১ খৃষ্টাব্দ হইতে ১৮২৫ খৃষ্টাব্দ পর্যন্ত-রাজ্যশাসন করিয়াছিলেন। আলেকজান্দার সম্রাট নেপোলিয়নের সহিত যুদ্ধ-ব্যাপারে ব্যাপৃত হইয়াছিলেন। নেপোলিয়ন সসৈন্যে মস্কো নগরে প্রবেশ করিতে রুসেরা বারুদে অগ্নি দিয়া উহা ভস্মীভূত করিয়াছিল। সেই স্থত্রে নেপোলিয়নের সৈন্যগণ একবারে বিনষ্ট হইয়া গিয়াছিল।

পলের তৃতীয় পুত্র দ্বিতীয় আলেকজান্দার ১৮৫৫ খৃষ্টাব্দে পিতৃ-

সিংহাসন প্রাপ্ত হন। তিনি অনেকগুলি প্রয়োজনীয় কার্য সম্পাদন করেন। তাঁহার সময়ে রুসিয়ার নানাবিধ শিল্প-কার্যের অীবৃদ্ধি হয়। ১৮৭৪ খৃষ্টাব্দের ২৩এ জানুয়ারি মহারানী ভিক্টোরিয়ার দ্বিতীয় পুত্র এডিনবারার ডিউক আলফ্রেড আরনেস্ট আলবার্টের সহিত রুসিয়ার দ্বিতীয় আলেকজান্ডারের একমাত্র কন্যা মেরী আলেকজান্ড্রোবনার শুভ বিবাহ সম্পন্ন হয়। সেপ্টেম্বর পিটার্সবার্গের “উইন্টার প্যালেস” (Winter Palace) নামক রাজপ্রাসাদে এই শুভ বিবাহ সম্পন্ন হইয়াছিল।

সে বৎসর দ্বিতীয় আলেকজান্ডার রাজশকটে আরোহণ করিয়া, ভ্রমণ করিবার সময়, নিহিলিষ্টদিগের দ্বারা ডিনামাইট নামক বারুদপূর্ণ বোম্ব যন্ত্রের আঘাতে নিহত হইয়াছেন। রুসিয়ার পূর্বে নিহিলিষ্টদিগের প্রাদুর্ভাব ছিল না। দ্বিতীয় আলেকজান্ডারের সময় হইতেই উহাদিগের দল বল বৃদ্ধি হইতেছে। উহাদিগের মূলমন্ত্র মনুষ্যমাত্রেরই সমান। মনুষ্যের আবার মনুষ্য রাজা কি ? হয় সকল মনুষ্যই রাজা, নয় সকলেই প্রজা—অর্থাৎ সকলেই একরূপ। এইজন্ত উহারা রাজহত্যা-ব্রতে ব্রতী হইয়াছে।

রুসিয়ার বর্তমান সম্রাট, দ্বিতীয় আলেকজান্ডারের পুত্র। ইনি সিংহাসনে আরোহণ করিয়া তৃতীয় আলেকজান্ডার নাম ধারণ করিয়াছেন। পিটার দি গ্রেট হইতে রুসিয়ার বর্তমান সম্রাট পর্যন্ত সকলেরই ভারত অধিকার করিবার ইচ্ছা বলবতী হইয়া আসিতেছে। বর্তমান সম্রাটের পিতা দ্বিতীয় আলেকজান্ডার মধ্য এশিয়ার মার্ক প্রভৃতি অনেক স্থান যুদ্ধে অধিকার করিয়া ক্রমশঃ ভারতবর্ষের দিকে অগ্রসর হইতেছেন। এক্ষণে ইনি পিতৃপথাবলম্বী হইয়াছেন। আজ আমরা যে ইংরাজ-রুস-যুদ্ধের আয়োজন দেখিতেছি, ইহার সূত্রপাত পিটার দি গ্রেট করিয়া গিয়াছেন। গত ৩০এ মার্চ রুসিয়ার অশ্রুতর সেনাপতি কমানরফ, সহকারী সেনাপতি আলিখানকের সহিত পঁজদে, এপ্রিল মাসে মারুচক প্রভৃতি আফগানরাজ্যভুক্ত কয়েকটি স্থান রুসিয়ার অধীন করিয়াছেন। পঁজদে-যুদ্ধের সময় রুসীয়দের হস্তে দশ হাজার আফগান সৈন্য নিহত হয়। এই যুদ্ধের প্রধান গোলযোগ রুসিয়া ও আফগানস্থানের সীমা নির্ধারণ লইয়া। ইংরেজ পক্ষ হইতে ভার পিটার্স লমস্‌ডেন মধ্যস্থ হইয়া বিবাদী ভূমির বিবাদ মিটাইতে গিয়াছিলেন, কিন্তু কাৰণী কিছুই

হয় নাই। আজ পর্য্যন্ত ভয়ানক গোলযোগ চলিতেছে। ভবিষ্যতে যে কি হইবে, তাহা ঈশ্বরই জানেন। তবে সিংহ ভণ্ডকের যুদ্ধনীতির ব্যাপার দেখিয়া আমাদের মনে বিপদের আশঙ্কাটাই জাগিতেছে। আজ কয়েক মাস ধরিয়া উভয় পক্ষে বেরূপ যুদ্ধের আয়োজন, সন্ধিপ্ৰস্তাব ও সন্ধিভঙ্গ হইয়া আসিতেছে, সে সকল বিষয় এই ক্ষুদ্র পুস্তকে লিখিবার স্থান নাই। পার্থক্য সমস্ত সংবাদপত্রেই সে বিষয়ের বিশেষ বিবরণ জানিতে পারিতেছেন বলিয়া আমরা উহাতে হস্তক্ষেপ করিতে ইচ্ছুক নহি। তবে, যে সকল বিষয় সংবাদপত্রে প্রায় পাওয়া যায় না, উহাই এই পুস্তকে সন্নিবেশিত হইল। ইহাতে রুসিয়ার সংক্ষিপ্ত বিবরণ, সংক্ষিপ্ত ইতিহাস ইত্যাদি বিষয়ই লিখিত হইল।

পঞ্চম অধ্যায় ।

রুসিয়ার আয়তন ।

পূর্বে রুসিয়ার ভৌগলিক বিবরণ সংক্ষেপে এক প্রকার বলা হইয়াছে। এক্ষণে উহার বিষয় অল্প স্থান হইতে আরও কিছু বলা যাইতেছে।

পিটার দি গ্রেটের রাজসিংহাসনপ্রাপ্তির পূর্বে ইউরোপে রুসিয়া রাজ্য বিশেষ ক্ষমতাপন্ন ছিল না। পিটারের সময় হইতেই রুসিয়ার নাম ও প্রভাব বৃদ্ধি বাড়াইয়া আসিতেছে। ক্রমে ক্রমে রুসিয়া, পার্শ্ববর্তী অনেক পরাক্রম রাজ্য পূর্ণরূপে ও খণ্ডরূপে দখল করিয়াছে। সুইডেন, পারস্য, তুরস্করাজ্যের অনেক অংশ রুসিয়ার কবলে প্রবিষ্ট হইয়াছে। পোলওরাজ্যও এক্ষণে রুসিয়ার অধীন। রুসিয়া ইউরোপের একাধিক অংশ লইয়াছে। সমস্ত উত্তর-এসিয়া এবং অধিকাংশ মধ্য-এসিয়াও রুসিয়ার দেহপুষ্টি করিতেছে। আমেরিকার কিয়দংশও রুস-সম্রাটের দখলে ছিল, কিন্তু উহা তিনি অপরকে প্রিত্ব করিয়াছেন। সাই হউক, তবু রুসিয়ার আয়তন এত বড় যে, সে সমস্ত পৃথিবীর সর্দি ভাগের এক ভাগ অধিকার করিয়া আছে। ফল কথা,

রুস-সম্রাটের আয় পৃথিবীর অন্য কোন রাজাই এত বড় ভূখণ্ডের অধিপতি নহেন ।

রুসিয়ার সীমানিকারণ স্ফন্দরূপে হইবার নহে । তবে ভৌগলিকেরা মোটামুটি করিয়া এইরূপ সীমা-মীমাংসা করিয়াছেন । যথা—

রুসীয় পোলণ্ড এবং বল্টিক সাগরস্থ দ্বীপপুঞ্জের সহিত ইউরোপীয় রুসিয়ার পরিমাণ ২,০৭৮,৬৪৬ বর্গ মাইল । নব জিম্বা দ্বীপ ব্যতীত ফ্রোজেন ও প্রশান্ত সাগরস্থিত দ্বীপাবলীর সহিত রুসরাজ্যভুক্ত সাই-বিরিয়া প্রদেশের পরিমাণ প্রায় ৪,৮৬৬,৬৪৩ বর্গ মাইল । যদিও নব জিম্বা দ্বীপের দক্ষিণাংশ আজিও আবিষ্কৃত হয় নাই, তথাপি উহার পরিমাণ ৮৩,২৭১ বর্গ মাইল । এইরূপে সমগ্র রুসিয়া রাজ্যের পরিমাণ-ফল প্রায় ৭,০২৮,৫৬১ বর্গ মাইল । তন্মধ্যে ১,৩৬৪,৮১৫ বর্গ মাইল পরিমিত স্থান উত্তরাংশে এবং ৫,৬৬৩,৭৪৬ বর্গ মাইল পরিমিত স্থান দক্ষিণাংশে অবস্থিত ।

ইউরোপীয় রুসিয়াতে যে সকল প্রদেশ সম্বুক্ত হইয়াছে, তাহারা এই— নিজ রুসিয়া, (কখন কখন মস্কভি নামেও অভিহিত) ; ডন কসাকদের রাজ্য ; কৃষ্ণ সাগরের তটস্থ ভূমিখণ্ড ; তাতারদের সম্বন্ধযুক্ত কাজান ও অস্ট্রাকান প্রদেশ ; বায়ারমিয়া ; লাপলণ্ড, ইঙ্গিয়া, কেরিলিয়া, ফিনলণ্ড, অস্ট্রো-বোথিনিয়া, এস্চোনিয়া, লিভোনিয়া, আর্বো এবং আলাউদ দ্বীপপুঞ্জ ও ডেগো, স্বেসেল প্রভৃতি দ্বীপ এই সকল পূর্বে সুইডেনের অধিকারভুক্ত ছিল, এক্ষণে রুসিয়ার । এক সময়ে পোলণ্ড রাজ্য নিম্নলিখিত স্বাধীন গবর্ণমেণ্টগুলিতে বিভক্ত ছিল, যথা—ভিটেক্স, মোঘিলেভ, মিস্কাস, বলিনিয়া, গর্ডনো, ভিলনা, পোডোলিয়া, ব্রিয়ালিষ্টক এবং ওয়ার্সা, এহেন পোলণ্ডের অধিকাংশ স্থান এক্ষণে রুসিয়ার অন্তর্ভুক্ত । ক্রিমিয়া, ক্রুজ তাতার, বিশ্বারাবিয়া, এবং তুরস্কদের নিকট জয়লক মস্কাভিয়ার কিয়দংশ এবং তুরস্ক, পারস্যরাজ্যের নিকট হইতে জয়লক জর্জিয়া ও ককেশস পর্বতমালার অন্তর্গত ককেশীয় প্রদেশ এক্ষণে রুসাধিপতির অধিকৃত ।

ষষ্ঠ অধ্যায় ।

লোকসংখ্যা !.

১৭৭০ খ্ঃ বিশ্বাবিয়া রুসিয়ার অন্তর্ভুক্ত হয়, লোকসংখ্যা ...	৫০০,০০০
১৭৭১ খ্ঃ ক্রিমিয়ারাজ্য (১৭৮৩ খ্ঃ ষ্টাঙ্গে রুসরাজ্যভুক্ত হয়)	
লোকসংখ্যা ...	৪৬০,০০০
১৭৮৫ খ্ঃ জর্জিয়া (১৮৩১ খ্ঃ ষ্টাঙ্গে রুসরাজ্যভুক্ত হয়)	
লোকসংখ্যা ...	৪০০,০০০
১৭৮৫ খ্ঃ ক্ষুদ্র পোলণ্ড এবং উক্রেইন, লোকসংখ্যা ...	৬,৫০০,০০০
১৭৯৪ খ্ঃ লিথুয়ানিয়া ও পোডলিয়া প্রভৃতি স্থানের সহিত	
পশ্চিম-রুসিয়া, লোকসংখ্যা ...	৮,৫০০,০০০
১৭৯৫ খ্ঃ কোরলণ্ড, লোকসংখ্যা ...	৪১০,০০০
১৮০৩ খ্ঃ লেস্খিন্স ও ককেসীয়প্রদেশ, লোকসংখ্যা ...	৩০০,০০০
১৮০৯ খ্ঃ ফিনলণ্ড, লোকসংখ্যা ...	১,৪০০,০০০
১৮১৩ খ্ঃ শ্চিব্বন, লোকসংখ্যা ...	১৪০,০০০
১৮১৫ খ্ঃ (১৮৩২ খ্ঃ ষ্টাঙ্গে রুসিয়ার অন্তর্ভুক্ত) পোলণ্ড	
রাজ্য, লোকসংখ্যা ...	৪,০০০,০০০
১৮২৭ খ্ঃ এরিভান ও তম্বিকটবর্তী স্থান, লোকসংখ্যা ...	১৫০,০০০
১৮২৯ খ্ঃ তুরস্কীয় আর্মেনিয়া, লোকসংখ্যা ...	৫০০,০০০

সমষ্টি ২৩,২৫০,০০০

সমগ্র রুসিয়ার লোকসংখ্যা সঠিক জানা যায় নাই। কেহ বলেন, ৫,০০,০০,০০০ পাঁচ কোটি, কেহ বলেন, ৬,১০০,০,০০০ ছয় কোটি দশ লক্ষ। শেষের সংখ্যা ম. হুওতের মন্টিবরন নামক পুস্তকের নূতন সংস্করণে দেখিতে পাওয়া যায়। পিটার পার্লির মতে ৬,৩০,০০,০০০ ছয় কোটি ত্রিশ লক্ষেরও বেশী*। কাহার মতে আবার ৫৫,৩৪০,০০০ পাঁচ কোটি তিন্লান লক্ষ চল্লিশ হাজার। এই শেষের হিসাব মত রুসরাজ্যভুক্ত লোকদিগকে

* এই পুস্তকের প্রথম অধ্যায় দেখ

ধর্মসম্প্রদায়ভুক্ত করিয়া লইলে, নিম্নলিখিতরূপ বিভাগ দেখিতে পাওয়া যায়। যথা—

রুসীয় গ্রীক চার্চ	লোকসংখ্যা	...	৪৫,০০০,০০০
৭২ সম্প্রদায়ভুক্ত রাস্কলুইক্‌স্	„	...	৩৫০,০০০
ইউনাইটেড্‌ গ্রীক ও ইউনাইটেড্‌ আর্থেনীয় সমেত					
রোমান্‌ কাথলিক	„	...	৩,৫০০,০০০
স্বতন্ত্র আর্থেনিয়ান্‌	„	...	২৫০,০০০
অস্বর্গ কন্‌ফেসন্‌ সম্প্রদায় (প্রোটেষ্ট্যান্ট)	„	...	২,০০০,০০০
রিফর্মড্‌ চার্চ সম্প্রদায়	„	...	৫৪,০০০
মোরিভিয়ান্‌	„	...	১০,০০০
মেনোনাইট্‌	„	...	৬,০০০
মুসলমান	„	...	২,৫০০,০০০
য়িহুদী	„	...	৬০০,০০০
বৌদ্ধধর্মাবলম্বী (লামা-উগাসকসম্প্রদায়)	„	...	৩০০,০০০
ভারতবর্ষীয় (কেটিচিজ্‌ম (৭) উগাসকসম্প্রদায়),	„	...	৬০০,০০০
পুতলগুজক	„	...	১৭০,০০০

সমষ্টি ৫৫,৩৪০,০০০

জেনেরাল আলেকজান্ডার ডি কিরীক বলেন, এক্ষেপে জারের প্রজাসংখ্যা ১০,০০,০০,০০০ দশ কোটি। প্রয়োজন হইলে সকলেই যুদ্ধ করিতে পারে।

রুসিয়া এদিকে যে সকল পররাজ্য অধিকার করিয়াছে, সেই সেই স্থলে দাস-ব্যবসায় ছিল না, বা যাহা ছিল, তাহাও উঠিয়া গিয়াছে। রুসিয়ার অধিকৃত অন্যান্য স্থানের যে সকল অংশে দাসব্যবসায় আজিও প্রচলিত আছে, ততাবৎ স্থানের সম্ভ্রান্ত লোকদিগের সংখ্যা ৭,৫০,০০০ এবং কৃতদাস-গণের সংখ্যা ৩৬,০০০,০০০। সম্ভ্রান্ত-প্রজাগণের) রাজকর নাই। তাহার। যুদ্ধব্যাপারে লিপ্ত হন না বা তজ্জন্য রাজদণ্ড পান না।

১৮১১ খৃষ্টাব্দে করাসী সৈন্তকে বাধা দিবার জন্য যে দরবার হইয়াছিল, তাহাতে নিম্নলিখিত প্রজাগণ অস্ত্রধারণ করিবার আদেশ পাইয়াছিল। ৬,৪৩,

১৩৫ ব্যবসায়ী, ৬৩,৮২,২৭২ রাজভূতিভুক্ত কৃষক, ১০,১১৩,১৭৭ সাধারণ কৃষক, ১,০৭৭,৬৩৬ রাজপরিবারগণের মসহারা সংগ্রহকারী কৃষক, ১,১২,৪৫৩ স্বাধীন ব্যক্তি । সে সময়ে সর্বশুদ্ধ ১,৮৩,৩১,৬৮০ জন লোক যুদ্ধার্থে অস্ত্রধারণ করিয়াছিল ।

রুসিয়াতে সর্বশুদ্ধ তিনটি লোক-শ্রেণী দেখিতে পাওয়া যায় । প্রথম শ্রেণী—জমিদার প্রভৃতি সম্ভ্রান্তগণ; দ্বিতীয় শ্রেণী—ব্যবসায়ী, নাগরিক, বেসরকারী কর্মচারী এবং ধর্মযাজক; তৃতীয় শ্রেণী—কৃতদাস, সৈনিক, নাবিক ও স্বাধীন শিল্পকর ।

সপ্তম অধ্যায় ।

রুসীয় গবর্নমেন্ট ।

রুসিয়া রাজ্য স্বেচ্ছাচার রাজতন্ত্রে নিয়ন্ত্রিত । জারের হস্তেই রাজ্যের সমস্ত আইন কানুন; তাঁহার অধীনে রাজকার্যনির্বাহক সভা আছে । সেই সভা কার্যাবিশেষে নানা ভাগে বিভক্ত । কিন্তু কোন সভারই ইচ্ছামত কার্য করিবার ক্ষমতা নাই । জারের আজ্ঞানুসারে সকলকেই কার্য করিতে হয় । এই সকল সভার প্রথমটির নাম রাজ্যের রাজকীয় মন্ত্রিসভা (Imperial Council of State) । উহা চারি শাখায় বিভক্ত হইয়া কেবল একজন (General President) সাধারণ সভাপতির অধীনে কার্য করে । দ্বিতীয়টি প্রিন্সপাল ষ্টাফ্ বা এটাক্ট মেজর (Principal Staff or Etat Major) ; এই সভায় যুদ্ধ সম্বন্ধীয় ও সেনাবিভাগীয় কার্য সম্পন্ন হয় । তৃতীয়টি কার্যনির্বাহক ব্যবস্থাপক সভা (Executive Senate) ; ইহা আট ভাগে বিভক্ত । এই আট ভাগে তিনটি কার্য হইয়া থাকে—রাজাজ্ঞা পালন হইল কি না, ক্ষুদ্র ক্ষুদ্র মোকদ্দমা এবং রাজ্যসম্বন্ধীয় তদারক । চতুর্থটি ধর্ম-সভা (Holy or Governing Synod), ইহাতে ধর্মসংক্রান্ত বিষয়ের আলোচনা হয় ।

রুসিয়ার কার্যনির্বাহক সভাগুলি প্রধানতঃ দুই ভাগে বিভক্ত । প্রথম বিভাগ, সুপ্রিম গবর্নমেন্ট সম্বন্ধে এবং দ্বিতীয় বিভাগ নিম্নলিখিত হিসাবে—

১ম, বৈদেশিক কার্যনির্বাহক মন্ত্রিসভা (Ministry for Foreign Affairs) ।
২য়, সামুদ্রিক মন্ত্রিসভা (Ministry of the Marine) । ৩য়, অভ্যন্তরীণ কার্য-
নির্বাহক মন্ত্রিসভা (Ministry for International Affairs) বা হোম
ডিপার্টমেন্ট (Home Department), ইহার সহিত কার্যনির্বাহক ফৌজদারী
আদালত (Executive Police) সংযুক্ত আছে । ৪র্থ, সাধারণ শিক্ষাসভা
(Ministry of Public Instruction) ; এই সভায় বিশ্ববিদ্যালয়, সাধারণ
বিদ্যালয়, শিক্ষাসমিতি এবং ধর্মের বিষয় আলোচিত হয় । ৫ম, রাজস্ব, ব্যবসা
ও শিল্পকার্যসভা (Ministry of Finance, Trade, and Manufactures) ।
৬ষ্ঠ, বিচারসভা (Ministry of Justice) । এই সকল বিভাগের যে কোন
কর্মচারী জার কর্তৃক নিযুক্ত হন, তাঁহাকেই স্ব স্ব কার্যের দায়িত্ব বুঝাইয়া
দেন ।

বড় দুঃখের বিষয় যে, রুসিয়ার ন্যায় সর্ববৃহৎ রাজ্যের রাজশাসন বড়
স্বেচ্ছাচারপূর্ণ । এক ব্যক্তির হস্তে সর্বপ্রকার ভার থাকিলে বাস্তবিকই বড়
গোলযোগ ঘটে । একজন মানুষ হাজার বিজ্ঞ হইলেও সর্ববিধ কার্য সু-
শৃঙ্খল ও ন্যায়রূপে করিতে পারে না । রুসিয়ার দশাও তাই । কেবল জার
(সম্রাট্) বাহ্য করিবেন, তাহাই ঠিক, কাজে কাজে রাজ্যশাসনের প্রতি
হৃদয়রূপে দৃষ্টি পড়ে না । সম্রাট্ মন্দকে ভাল বলিলেন, কাজেই তা ভাল
হইল ; আবার ভালকে মন্দ বলিলেন, কাজেই মন্দ হইল । এইরূপ স্বেচ্ছায়
কার্য করিলে আলোক আঁধার দুইই দেখা যায় । আর এক কথা, সংবাদপত্র
রাজা প্রজা ও দেশের উন্নতির মূল । উহাতে ভিন্ন ভিন্ন ব্যক্তির ভিন্ন ভিন্ন
মনোভাব ব্যক্ত হইয়া বেশীর ভাগে সকলের মঙ্গল সম্পাদনই হইয়া থাকে,
কিন্তু বড় দুঃখের বিষয় যে, রুসিয়াতে যে সকল সংবাদপত্র আছে, সেগুলির
কোন ক্ষমতাই নাই, সাক্ষীগোপাল—কলের পুতুল । রুসরাজের ইচ্ছানুসারে
তাহাদিগকে চালিত হইতে হয় । রাজ্যে রাজকর্তৃক একটা অন্যায় বা ঐমা-
ন্যক কার্য হইল, সে কথা কাহারও সাধ্য নাই যে মুখ ফুটয়া বলে । সংবাদ-
পত্রসম্পাদকদিগকে মনের কথা মনেই চাপিয়া রাখিতে হয় । এই সকল অন্ত-
রায় থাকতে রুসগবর্ণমেন্টের প্রজাপালন, রাজ্যশাসন সকলই যেন বিভ্রাটের
ছায়া ।

যে সকল বিচারার্থী—কি রাজধানীর কি গ্রামের—সকলকেই স্বয়ং সম্রাটের নিকট আবেদন করিতে হয়। স্বয়ং সম্রাট সমস্ত কার্যের কর্তা অথচ একাকী সকল কার্য করিয়া উঠিতে পারেন না। এইজন্য অনেক ব্যক্তিকে অনেক কষ্ট পাইতে হয়। যাহারা দূর হইতে আসে, তাহাদের আরও কষ্ট। কার্য-সূত্রবশতঃ প্রত্যেক বিভাগে প্রজাগণকে ব্যতিবাস্ত হইতে হয়। ঐ সকল বিভাগে ঘূন্ লওয়ার বড় বাড়াবাড়ি দেখা যায়। ঘূন্ না দিলে কোন ব্যক্তি খ্রীষ্ট সম্রাটের নিকট হাইতে পারে না, কাজেই দ্বায়ে পড়িয়া রাজকর্মচারী-দ্বিগকে ঘূন্ দিতে হয়। রুসিয়ার গবর্ণমেন্ট আফিসগুলিতে প্রজার সর্বনাশ মূলক ঘূন্ লইবার যে রূপ অত্যাচার, পৃথিবীর অন্তান্ত কোন স্থানেই তেমন দেখিতে পাওয়া যায় না। রুসীয় গবর্ণমেন্ট আফিসগুলিতে এরূপ উৎকোচ প্রচলনের প্রধান কারণ, রাজকর্মচারীরা অল্প হারে বেতন পান, স্ত্রুতাং রাজার অবিচারে ও অত্যাচারে প্রজার সর্বনাশ হয়। এমন কি, রুসীয় ধর্ম্মাধিকরণেও (আদালতে) এই উৎকোচরূপ অধর্ম্মের স্রোত প্রবাহিত হইতেছে। যে সকল বিচারপতি রাজাজায় বিচারকার্যের ভার পাইয়াছেন, তাঁহারাও ঘূন্ খাইয়া দোষীকে নির্দোষী, ও নির্দোষীকে দোষী সাব্যস্ত করিয়া গুরুতর দণ্ড প্রদান করেন। ঘূন্দের অত্যাচারে অনেক সময় অনেক নিরীহ ব্যক্তিকেও প্রাণদণ্ড ভোগ করিতে হয়। লাএল সাহেব তদীয় “রুসচরিত্র” সমক গ্রন্থে লিখিয়াছেন, “রুসিয়ার রাজকীয় ক্যাবিনেট কাউন্সেল হটতে সামান্ত থানা পর্যন্ত সকল স্থানেই ঘূন্ ও অত্যাচারের বাড়াবাড়ি। এই সকল রাজকীয় কার্যালয়ে প্রত্যহ যে সকল উৎকোচ গ্রহণ ও অত্যাচার ঘটয়া থাকে, তাহা প্রতিদিন নোট-বুকে লিখিয়া রাখিলে এক বৎসরে একখানা বৃহৎ পুস্তক হইয়া পড়ে।” বিসপ্ জেম্ন্ সাহেবও এই কথা বলেন। তাঁহার মতে “রুসিয়ার সম্রাট স্বেচ্ছাচারপরতন্ত্র রাজা হওয়াতে প্রত্যেক রাজ কার্যালয়ে উৎকোচ গ্রহণ ও অত্যাচারে এত বেশী যে, শুনিলে অসম্ভব বলিয়া মনে হয়। রুসিয়ায় এই সকল কুপ্রথা বহুকাল হইতে চলিয়া আসিতেছে।” এক্ষণে আবার এই সকল কুরীতি কুনীতি এতদূর বদ্ধমূল হইতেছে যে, রুসিয়ায় যতকাল স্বেচ্ছাচারী রাজা থাকিবেন, ততকাল ইহার মূলোৎপাটন হইবে না।

রুসীয় সম্রাটের রাজনীতি ও শাসননীতির দোষে অনেক সময়ে প্রজাগণকে বার-পর-নাই ক্রেশ ভোগ করিতে হয়। রাজা সকল সময়ে সকল কার্য স্বয়ং দেখিতে পান না, সুতরাং রাজকর্মচারীদের কথায় বিশ্বাস করিয়া এক একটা ভয়ানক অন্যায্য কার্য করিয়া বসেন। সময়ে সময়ে এইরূপ অন্যায্য কার্যের ফলভোগও তাঁহাকে করিতে হয়। এ বিষয়ে একটি দৃষ্টান্ত দেওয়া বাইতেছে ; —প্রথম আলেকজান্ডার এক সময়ে সাইবিরিয়ার গবর্নরু জেনেরেল স্পিরান্স্কী (General Speranskii)র কথায় ৫০০ সাইবিরীয় প্রজাকে কারারুদ্ধ করিয়া ছিলেন। তাহারা ভাবিয়াছিল, সম্রাট সুবিচার করিবেন, কিন্তু এক্ষণে অন্যায্যরূপে কারারুদ্ধ হওয়াতে সকলেই সম্রাটের উপর বড় বিরক্ত হইয়া উঠিল। অন্তান্ত প্রজারাও রাজার এই গর্হিত কার্যে ক্রুদ্ধ হইয়া, বড়বজ্ঞ করিয়া তাঁহাকে হত্যা করিবার চেষ্টা করিতে লাগিল। যদিপি সম্রাট আজফ সমুদ্রস্থ টেগানরগ্ নামক দ্বীপে স্বাভাবিক মৃত্যুমুখে পতিত না হইতেন, তা হইলে নিশ্চয়ই তাঁহাকে বড়বজ্ঞীদের হস্তে নিহত হইতে হইত।

রুসিয়ার সম্রাটদের এইরূপ ভয়ঙ্কর স্বৈচ্ছাচারিতা দোষেই নিহিলিষ্টদিগের দল সৃষ্ট হইয়াছে। পূর্বে ইহাদের কথা বলা হইয়াছে। এই দলে ক্রী পুরুষ উভয় প্রকার লোকই আছে। •

অষ্টম অধ্যায় ।

• সুক্ষ্মশিল্প ।

যে দেশের লোকদের সর্বদাই রাজার মুখ চাহিয়া চলিতে হয়, অনেক সময়েই তাহাদের আত্মোন্নতির ব্যাঘাত ঘটে। আত্মোন্নতির ব্যাঘাত ঘটিলে স্বদেশের উন্নতিরও অনেক ক্ষতি হয়। রুসিয়ার সাধারণ লোকের ও দেশের এইরূপ ব্যাঘাত ও ক্ষতি দেখিতে পাওয়া যায়। স্বয়ং রাজা স্বৈচ্ছাচারী হওয়াতে সাধারণ প্রজাবর্গের মনের ইচ্ছা মনেই রহিয়া যায়। সম্রাট বাহা নিজে পসন্দ করেন, সেইরূপ দ্রব্যেরই প্রয়োজন, অনুসন্ধান ও

কষ্ট হয়। তা' ছাড়া প্রায় অল্প নূতন বা প্রয়োজনীয় সামগ্রী রুসিয়ায় দেখিতে পাওয়া যায় না। এই জন্য রুসিয়ার এখনও অনেক প্রয়োজনীয় শিল্প সামগ্রীর অভাব রহিয়াছে। রাজার অনুরোধে বৈদেশিক বাণিজ্য রুসিয়া দেশে তত পসার বৃদ্ধি করিতে পারে নাই। রুস সম্রাটের রাজ-সভায় বস্ত্রী প্রভৃতি যে সকল অমাত্যবর্গ থাকেন, হুন্সশিল্প বিষয়ে তাঁহাদেরও তত জ্ঞান নাই। যত চুকু আছে, তা'ও আবার রাজার ইচ্ছার সহিত না মিশিলে কোন কার্যেরই হয় না। পূর্বে পিটার দি গ্রেট ছদ্মবেশে দেশ বিদেশে ভ্রমণ করিয়া শুলশিল্প ও হুন্সশিল্প শিক্ষা সম্বন্ধে যেরূপ মনোযোগ দিয়াছিলেন এবং কার্যেও যেরূপ কতকটা পরিণত করিয়াছিলেন, সেই প্রথা যদি আজও পরবর্তী সম্রাটদিগের দ্বারা চলিয়া আসিত, তাহা হইলে রুসিয়া আজ ইংলণ্ড, ফ্রান্স, ইটালি, আমেরিকা প্রভৃতি উন্নতিশীল রাজ্যের শিল্পকার্যের সহিত টেকর দিতে পারিত। রুসিয়াবাসী ধনিগণ ভূমি সম্পত্তি লইয়াই ব্যস্ত। তথাপি তাঁহাদিগের মধ্যে কেহ কেহ আজ কাল শিল্প-সামগ্রীর উন্নতি সম্বন্ধে মনোযোগ দিতেছেন। মধ্যবিত্ত লোকেরা এখনও অনেক দূরে পড়িয়া আছে। দরিদ্রদের তো কথাই নাই। তাহারা চালিত না হইলে চলিতে পারে না, কারণ তাহাদের নিতান্ত অর্থাতাব। ফল কথা, যত দিন স্বয়ং সম্রাট না এ বিষয়ে মনোযোগী হইতেছেন, তত দিন শিল্পের উন্নতি কোন মতেই হইতে পারিবে না।

নবম অধ্যায় ।

সৈন্য ও রণতরী ।

রুস-সম্রাটের আয় পৃথিবীর অন্য কোন রাজার সৈন্য-সংখ্যা প্রচুর নহে। এই অপর্যাপ্ত সৈন্যবলেই রুসরাজ সর্বাপেক্ষা বৃহৎ ভূখণ্ডের অধিকারী। রুসের সৈন্য দেখিয়া ইউরোপের অন্যান্য রাজারা রুসরাজের সহিত লড়াই স্বপ্না করিতে বড় সাহসী হন না। এই সৈন্য-সংখ্যার পরাক্রমেই রুসিয়ার ইংলণ্ডীয় বাণিজ্যের পথ প্রায় বন্ধ হইয়া রহিয়াছে। এই জন্যই

রুসের আমদানী অপেক্ষা রপ্তানির ভাগই বেশী। কাহারও কাহারও মতে রুস-সম্রাটের সৈন্যসংখ্যা দশ লক্ষ, কাহারও মতে বা আট লক্ষ। ইহার মধ্যে এক লক্ষ পঞ্চাশ হাজার সৈন্য সর্বদা রুসিয়ার সীমা রক্ষার জন্য নিযুক্ত আছে। বাকী সাড়ে আট লক্ষ সৈন্য তবে কি করে?—কারণ আছে। রুসরাজ অপরাপর রাজাদের যে সকল রাজ্য যুদ্ধক্ষেত্রে জয় করিয়া নিজের করিয়া লইয়াছেন, সেই সকল রাজ্য শত্রুভীতি হইতে নিৰ্ধিবান্ধে রাখিবার জন্য এ হেন প্রকাণ্ড সৈন্যমণ্ডলীর প্রয়োজন। রুসরাজ যে সকল রাজ্য স্ববশে আনিয়াছেন, তদ্রূপ লোকদিগকে মনে তেমন বিশ্বাস করেন না—বিশ্বাস করেন, এই দশ লক্ষ সেনার অন্তর্যুখে।

রুসীয় গবর্ণমেন্টের আর অপেক্ষা ব্যয় বেশী। সেনা-বিভাগে প্রতি মাসে যে রূপ অর্থ ব্যয় হয়, তাহা তুলনায় অতিরিক্ত হইয়া দাঁড়ায়। প্রত্যেক সৈনিকের বেতন ও রসদ অন্যান্য দেশের প্রত্যেক সৈনিকের অপেক্ষা পরতায় কম হইলেও রুসিয়ার পক্ষে বেশী। রুসীয় গবর্ণমেন্টের নিযুক্ত ক্রীতদাসেরা রাজার তরফে কৃষিকার্য্য করে। কিন্তু রাজার আদেশে তাহারা সকলে যুদ্ধ-বিদ্যাতেও শিক্ষিত। তাহারা সচরাচর যে রূপ ‘ভাতা’ ও মাহি-য়ানা পায়, তাহা রুসিয়ার অন্য কোন স্বাধীন কৃষকের পক্ষে হইলে বড় কষ্ট-কর হইয়া উঠে। কিন্তু ঐ সকল রাজভৃত্য অভ্যাস বশতঃ ঐরূপ সামান্য অবস্থাতে থাকিয়াও বেঙ্গ বলিষ্ঠ ও ছষ্ট পুষ্ট হয়। অল্প-পাইয়া, অল্প খাইয়া ঐরূপ পররাজ্য আক্রমণকারী সৈন্য কোন দেশে দেখা যায় না। তবে তা’দের একটি আশা থাকে, যখন তাহারা অল্প কোন রাজার রাজ্য জয় করিতে পারে, তদ্রূপ লুণ্ঠিত দ্রব্য হইতে সকলেই কিছু কিছু পুরস্কার পায়। যাহা হউক, প্রথম নিকোলাস্ (প্রথম আলেকজান্দার) ভূপতির সময় হইতে রুস সৈন্যদের অবস্থার কিছু উন্নতি হইয়াছে। ১৮৩০ খৃষ্টাব্দে পোলওদেশে বন বিভাগ এবং পারস্ত ও তুরস্কের রাজভাণ্ডার হইতে অপরিমিত পরিমাণে যে টাকা রুস রাজভাণ্ডারে জমা হইয়াছিল, এক্ষণে সেই টাকাতাই রুস সৈন্যগণের গ্রাসাচ্ছাদনের অনেকটা সুবিধা হইয়াছে। তদ্ব্যতীত সেই টাকার দেশের রাজপথ, সেতু, জলাশয়, রেলওয়ে, টেলিগ্রাফ প্রভৃতিতে ব্যয়িত হইতেছে।

পিটার দি গ্রেটের পূর্বে রুসিয়ার উচ্চদরের নৌ-বিদ্যা প্রচলন ছিল না। তিনি হলণ্ড, ইংলণ্ড প্রভৃতি দেশে গিয়া স্বয়ং উক্ত হিতকরী বিদ্যা শিখিয়া আসিয়াছিলেন। তাঁহার সময় হইতেই রুসিয়াতে রণতরীর স্থিতি হয়। এক্ষণে রুসিয়া রণতরীর বলে বলীয়ান হইয়া জলযুদ্ধেও ইতস্ততঃ অগ্রসর হইতেছে। এক্ষণে রুসিয়া তরফে বশ্টিক সাগর ও কৃক্সসাগরে ম্যান্ অব গুয়ার, ফ্রিগেট, করভেট্টী, ব্রিগ্, স্কুনার, কটার, ইয়াট, টিমার এবং অস্ফ্রাভ জলযানের সংখ্যা অনেক বাড়িয়াছে।

দশম অধ্যায় ।

পুলিষ, পোষ্ঠাপিস ইত্যাদি ।

আমাদের দেশেও পুলিষের বেক্রপ অত্যাচার, রুসিয়াতেও সেইরূপ। বিশেষতঃ রুসিয়া পুলিষ কর্মচারীদিগের নিকটে বৈদেশিকদিগকে সময়ে সময়ে বড় কষ্ট পাইতে হয়। রুসীয় পুলিষগুলি কেবল চোর ধরিবার জন্য নয়, সেখানে রাজনীতিরও চর্চা হইয়া থাকে। পুলিষের লোকসংখ্যাও অনেক। প্রত্যেক বড় বড় সহর, বিভাগ এবং উপবিভাগে বিভক্ত। প্রত্যেক স্থলেই এক একটি করিয়া পুলিষ-আপিস আছে। সেই সকল পুলিষ সর্কদা নগরবাসীদিগের কার্যের উপর দৃষ্টি রাখি; বিশেষতঃ বৈদেশিক লোকদিগের উপর উহাদের দৃষ্টি অচল। ডাক্তার লায়াল দেখিয়াছিলেন, মস্কাউনগরে এক জন হেড পুলিষ-মাষ্টার, একজন পলিটিক্যাল অফিসার, তিন জন উচ্চ গ্রেণীর পুলিষ-মাষ্টার, ২০ জন ইনস্পেক্টার এবং প্রত্যেক ইনস্পেক্টারের সহিত দুই জন সার্জন্স, ৮৮ জন সব-ইনস্পেক্টার এবং তাহাদিগের সহিত প্রয়োজনীয় লোক জন, ১০৮০ জন গোয়েন্দা এবং ২০০ শতের অতিরিক্ত কনেষ্টবল্ ছিল। ঐ সকল পুলিষ কর্মচারীদিগের মধ্যে কসাক এবং জেম্‌সারমিস্ লোকের সংখ্যাও বড় কম ছিল না। সে সময়ে মস্কাউনগরে দুই লক্ষ পঞ্চাশ হাজার লোক ছিল। তাহাদিগের রক্ষণাবেক্ষণ ও শাসনের

জন্য মস্কাউনগরের পুলিশ কর্মচারীদিগের সংখ্যা অতিরিক্ত। তথাকার পুলিশের লোকেরা প্রজা-রক্ষণের ভার-রক্ষার ভান করিয়া জবরদস্তীতে অর্থ ভক্ষণ করিত। প্রজারা প্রাণের দ্বায়ে ঐ সকল ধুরন্ধরকে ঘুস দিয়া ঘুসির দ্বা এড়াইত। মস্কাউ পুলিশের বড় বড় কর্মচারীরা বৎসরে কেবল ১৫০ টাকা বেতন পাইত। সেই বেতনে আবার ঘোড়ার খোরাক এবং পোষাকের খরচ যোগাইতে হইত। কাজেই ঘুসের বাড়াবাড়ি হুইত। লায়াল সাহেব যাহা দেখিয়া গিয়াছেন, রুসিয়ার আজিও তাহা বর্তমান।

রুসিয়া যেন ঘুসের দেশ! আপিসে আপিসে ঘুস, কথায় কথায় ঘুস! সেধানকার পোষ্ট আপিসেও চিঠি পত্রের সঙ্গে ঘুসের চলন! আমাদের এখানে রেলওয়ে, জেটিতে, আদালতে, পুলিশে এবং অগ্ন্যস্ত্র কার্যে অনেককে ঘুস দিয়া স্বকার্য-সাধন করিতে হয় বটে, কিন্তু রুসিয়ার কিছু বাড়াবাড়ি। ঘুস দাও, তোমার পত্রখানি শীঘ্র গন্তব্য স্থানে চলিয়া যাইবে, নহিলে হয়ত পত্রের কোন খবরই পাওয়া যাইবে না। রুসিয়ার কষ্টম-হাউসে মাল আম-দানী ও রপ্তানীর ঘুস বড় চড়া।

একাদশ অধ্যায় ।

ধর্ম ও ধর্মযাজকগণ ।

রুসিয়ার সম্রাট খৃষ্ট ধর্মাবলম্বী। প্রোটেস্ট্যান্ট, রোমান ক্যাথলিক, গ্রীক চর্চ, প্রিটেন্‌বেরিয়ান প্রভৃতি কয়েক সম্প্রদায়ে খৃষ্ট ধর্ম বিভক্ত। রুসিয়াধিপতি এবং তাঁহার রুসীয় প্রজাগণ গ্রীক-চর্চ-মতাবলম্বী। গ্রীক চর্চের মধ্যে সমাধিস্থ ব্যক্তিগণকে পূজা করিতে পারা যায় না, কিন্তু সেই সকল ব্যক্তির স্বতন্ত্র প্রতিমূর্তিকে পূজা করা যাইতে পারে। গ্রীক চর্চের মূল বিশ্বাস, রোমান ক্যাথলিক ধর্মের সহিত বড় বিভিন্ন নহে; কিন্তু ক্রিয়া-কলাপ সম্পূর্ণ বিভিন্ন। রুসীয় গির্জায় ভজনার সময়ে কোনরূপ বাদ্যযন্ত্র বাদন করা নিষিদ্ধ। কেবল ধ্বনীয় পুরোহিতেরা ভজনার সময় উচ্চ গম্ভীর স্বরে বাইবেল স্তত্র

পাঠ করেন। কোন পরীক্ষা, কি কোন বিশেষ ধর্মকার্যের সময়ে রুসিয়ার খৃষ্টানগণ খুব জাঁকজমকের সহিত ধর্মমন্দিরে গিয়া ভজনা করে। রোমান ক্যাথলিকেরা সে জাঁকজমকের সহিত টক্কর দিতে পারে না। যদিও অগ্রাগ্রা গ্রীকচর্চমতাবলম্বীরা কনস্টান্টিনোপলের পেরিয়াককে তাহাদের প্রধান ধর্মসমাজপতি বলিয়া বিশ্বাস করে, কিন্তু রুসীয়েরা তাঁহার সেই শ্রেষ্ঠতা স্বীকার করে না। তাহাদের মতে রুসের রাজাই তাহাদের ধর্মসমাজপতি। খৃষ্টীয় পুরোহিতেরা দুই ভাগে বিভক্ত—গার্হস্থ্য (Secular) এবং কোমারব্রতী (Monastic)। রোমীয় চর্চেও এই দুইটি বিভাগ আছে। গৃহস্থ পুরোহিতেরা সংসার-ধর্মও করে এবং ধর্মযাজনও করে। কোমারব্রতীরা যাবজ্জীবন অবিবাহিতাবস্থায় থাকিয়া ধর্মচর্চায় কালক্ষেপ করে। কোমারব্রতাবলম্বী খৃষ্টীয় সন্ন্যাসী বা সন্ন্যাসিনীরা উচ্চ দরের জ্ঞান ও সদাচরণবিশিষ্ট না হইলে এই উচ্চ পদ হইতে বিচ্যুত হয়। চির-কুমার-ব্রতধারীদিগের মধ্য হইতে উচ্চ দরের ধর্মযাজকদিগকে গ্রহণ করা যায়; এবং তাঁহাদিগকে ক্ষমতানুসারে মেটোপলিটান, আর্ক-বিশপ, বিশপ, আর্কি মণ্ট্রাইট বা য়্যাভট, হিগোমিনস্ বা প্রায়ার এবং মস্ক প্রভৃতি উপাধি দেওয়া হইয়া থাকে। গার্হস্থ্য ধর্মযাজকদিগের সংখ্যা বেশী। তাঁহাদিগের মধ্যে আঞ্চলিক পুরোহিত বা পোপেরা পরিগণিত। রুসিয়ার সাধারণ ধর্মযাজকেরা প্রায় মৃত্যু ও অলস এবং কতকটা কৃষিকার্যের জ্ঞান ব্যতীত অন্য বিষয়ে জ্ঞানশূন্য। তাঁহারা প্রায় সমাজের সহিত মিশ্রিত হয় না। ক্রীতদাসগণের উপরেই আধিপত্য করে। রুসিয়ার পৌরহিত্য পদ বংশানুক্রমিক হইয়া থাকে। গৃহস্থ ধর্ম-যাজকের বিবাহ করে, কিন্তু যদি কাহারও পত্নীবিয়োগ হয়, তবে তাহাকে জীবনের অবশিষ্ট কাল একাকী অতিবাহিত করিতে হয়। রুসিয়ার ধর্মযাজকেরা রাজার নিকট হইতে নিকর ভূমি প্রাপ্ত হয়। তা ছাড়া তাঁহারা পরলোকগত সন্ন্যাসীদের সমাধি-মুক্তিকা বা ছবি লইয়া ধনী ব্যক্তিদিগের বাটী গিয়া প্রসাদ স্বরূপ অর্পণ করে, এবং তৎপরিবর্তে কিছু কিছু অর্থ পায়। লোকের জন্ম, বিবাহ ও মৃত্যু হইলে, তাঁহার আত্মীয়েরা মঙ্গল লাভের আশায় ঐ সকল ধর্মযাজককে কিছু কিছু দর্শন দিয়া থাকে। রুসিয়ার ধর্মযাজকগণ ধর্মসম্বন্ধে কিছু না জানুক, কিন্তু আত্মগৌরবের জন্য বড় লালায়িত। ধর্মযাজকেরা মুখে ধর্ম

ধর্মের ভান করে, মনে তেমন নয়। উহাদের ত্রায় রুসিয়ার সাধারণ লোক-দিগেরও ধর্মবিশ্বাস মৌখিক। এক জন ধর্ম-বাজকের বন্ধঃহলে সিভিল অর্ডারের “জেন্টিল্ সোসাইটি” (Genteel Society)র পদক দেখিলে রুসেরা তাহাকে যত দূর খাতির করে, ধর্ম সম্বন্ধে তা’র সিকিও নহে।

আজ পর্য্যন্ত রুসিয়াতে রুসীয়-গ্রীকচর্চের অনুমোদিত ধর্মের কোনরূপ মতভেদ হয় নাই। ইহার প্রধান কারণ, রাজশাসন। রাজার আইনে এরূপ লিখিত আছে যে, কোন দেশীয় রুস সাইবিরিয়াতেও নির্বাসিত হইয়া যার-পর-নাই কষ্টভোগ করিলেও স্বেচ্ছায় এই ধর্ম ত্যাগ করিতে পারিবে না। এক সময়ে এই ধর্মের কতকগুলি লোক র্যান্‌কল্‌নিজ্‌ অর্থাৎ ধর্ম-স্ত্রগ্রাহী হইয়া ধর্মদ্রোহ উপস্থিত করিয়াছিল, কিন্তু রাজ-প্রতাপে তাহারা কৃতকার্য হইতে পারে নাই। ডাক্তার ম্যাক্‌মিচেল্‌ এই বিষয় লিখিয়া গিয়াছেন। তিনি আরও বলেন, তদানীন্তন রুস-সম্রাট্‌ ঐ সকল ধর্ম-দ্রোহীদের ভাবভঙ্গী দেখিয়া নিজের অনিষ্ট-চিন্তা করিয়াছিলেন। এই জন্য তাহাদিগকে যমালয় স্বরূপ সাইবিরিয়ার অভ্যন্তর অন্ধকারময় সুড়ঙ্গ-গর্ভে চিরকালের ন্যায় আটক রাখিয়াছিলেন।

দ্বাদশ অধ্যায় ।

চলিত মুদ্রা ও রাজস্ব ।

রুসিয়া রাষ্ট্রে সোণা রূপার খনি থাকিতেও টাকার চলনটা বড় ভাল নয়। স্বর্ণ-মুদ্রা তো দেখাই যায় না। রুবল নামে এক প্রকার রৌপ্য-মুদ্রার চলন আছে। ঐ রুবল যেমন পুরা আকারে চলে, সেইরূপ আবার আধ-সিকি দশা ও বিশাভাগেও রাজ্যময় চলিত হয়। বাজার-ভাও বুঝিয়া কখন একটি রুবলের মূল্য আমাদের টাকার হিসাবে ২০/১০ পড়তায় বাড়িয়াছিল, কখন আবার ১১/১০ পড়তায় কমিয়াছিল। কিন্তু এক্ষণে একটি রুবলের মূল্য ১৮০ টাকা। রুবল মুদ্রা রৌপ্য ব্যতীত গবর্ণমেন্ট কর্‌রেসি নোটরূপেও ব্যবহৃত হয়। প্রথমে যখন রুবল-নোট-প্রচলন আরম্ভ হইয়াছিল, তখন

রাজার মূল্য ছিল যে, রূপার রুবলের মত নোটেরও মূল্য সমান থাকিবে, কিন্তু প্রজা সাধারণে রূপার বদলে কাগজ দেখিয়া নোট গ্রহণে বড় সম্মত হইল না। সুতরাং কম দরে চলিতে লাগিল। একখানা রুবল নোটের মূল্য একটা রৌপ্য রুবলের সিকি মূল্যে দাঁড়াইল। তা' ছাড়া এক্ষেত্রে দর বুঝিয়া রুবল নোটের মূল্য কম বেশী হয়। যাহা হউক, মোটের উপর একখানা রুবল নোটের মূল্য সচরাচর আমাদের ১০/১০ দরে বিক্রয় হয়। রুসিয়াতে একটি রূপার সিকি রুবলে একখানা রুবল-নোট পাওয়া যায়।

কোপেক্ নামে এক প্রকার তাম্র-মুদ্রারও প্রচলন আছে। ১০০ কোপেকে একখানা রুবল নোট পাওয়া যায়। রুসিয়ায় রুবল অপেক্ষা কোপেকের চলনই বেশী। রুসায় টাকশালে এক সময়ে প্লাতিনা ধাতুর মুদ্রা তৈয়ার হইয়াছিল, কিন্তু অল্প দিনের মধ্যেই হঠাৎ ঐ ধাতুর মূল্য হ্রাস হওয়াতে মুদ্রারও দর কমিয়া গিয়াছিল। এইজন্য এক্ষণে প্লাতিনা-ধাতু-মুদ্রার আর প্রচলন নাই।

রুসিয়ায় যত সংখ্যক ব্যাঙ্ক নোট চলিতেছে, উহার মূল্য ১,০০,০০,০০,০০০ এক শত কোটি রুবল অর্থাৎ আমাদের পৌনে দুই শত কোটি টাকা। সেন্ট-পিটার্সবর্গের এসাইনেশিওনই ব্যাঙ্ক (-Assignationnoi Bank) হইতে রুবলনোটের আদান প্রদান হয়।

সাইবিরিয়া প্রদেশে ঔরাল পর্বতের খনিতে স্বর্ণ পাওয়া যায়। ঐ সকল স্বর্ণখনির কতকগুলি রুস গবর্ণমেণ্টের খাসে এবং অপরগুলি অন্যান্য সওদাগরের দখলে আছে। ১৮২৭ খৃষ্টাব্দে ঔরাল পর্বতের সমস্ত খনি হইতে ১২১ মোণ ৮৪ সের স্বর্ণ উঠিয়াছিল; উহার মূল্য ৬০,০০,০০০ বাট লক্ষ টাকা।

রুসিয়ার অন্তর্গত কলিভানোভস্কেসেক্‌স্ এবং ষ্টারশিক্‌স্ নামক দুইটি স্থানে যে সকল রৌপ্য-খনি আছে, তন্মধ্যে ১২টি খনি রুস গবর্ণমেণ্টের নিজেই। ঐ ১২টি খনি হইতে ১২০০ শত পাউণ্ড বা ইংরেজি ৪৩,২০০ তেঁতাল্লিশ হাজার দুই শত পাউণ্ড বা বাঙ্গালা ২২৩/৫ পাঁচ শত তেইস্ মোণ পাঁচ সের রৌপ্য উৎপন্ন হয়। ইহা ছাড়া ৩৮,০০০ আটত্রিশ হাজার পাউণ্ড সীস ধাতু পাওয়া যায়। ঔরাল পর্বতে ছয়টি এবং অর্টাই পর্বতে একটি রাজকীয় তাম্রখনি আছে। ঐগুলি হইতে ৫২,০০০ হাজার পাউণ্ড তাম্র উঠিয়া

থাকে। তা ছাড়া ২৭টি বেসরকারি খনি হইতে ১৫২,০০০ পাউন্ড তাম্র উৎপন্ন হয়। উহা হইতে শুদ্ধ স্বরূপ ২০,৮০০ পাউন্ড গবর্ণমেন্টকে দেওয়া হয়। সরকারী ও বেসরকারী লৌহখনিগুলি হইতে বাৎসরিক ২,০০০,০০০ পাউন্ড লৌহ উৎপাদিত হয়। বেসরকারী খনিগুলি হইতে রুসীয় গবর্ণমেন্ট প্রতিবৎসর ১,২০০,০০০ রুবল শুদ্ধ প্রাপ্ত হন। সকল প্রকার খনিতে ১৬০,০০০ এক লক্ষ ষাট হাজার মজুর থাকে। পূর্বাপেক্ষা এক্ষণে সমস্ত খনির কার্য অনেক বৃদ্ধি হইয়াছে। গবর্ণমেন্টও স্বতঃ পরন্তঃ বিলক্ষণ লাভ করিতেছেন। বেসরকারী খনিব্যবসায়ীগণকে পরিশ্রমের মূল্য দিয়া মজুর খাটাইতে হয়, কিন্তু রুসীয় গবর্ণমেন্ট নির্বাসিত লোকদিগের দ্বারা অধিকাংশ খনিকার্য্য সমাধা করিয়া থাকেন। কয়েদীদের মোটামুটি ভাতেপোড়া গোছের ষৎকিঞ্চিৎ আহাৰ দিয়া নিজের লভ্যাংশটা বেঙ্গ বুঝিয়া লন।

অন্ধ্রশতাব্দী পূর্বে রুসরাজ্যের বাৎসরিক রাজস্ব ৪৫০,০০০,০০০ পয়সা তাল্লিশ কোটি রুবল বা ৭৮,৭৫,০০,০০০ আটাত্তর কোটি পঁচাত্তর লক্ষ টাকা আদায় হইত। এক্ষণে একশত কোটিরও বেশী হইয়াছে। ক্রীতদাসদের মাথাগুস্তি কর (Capitation tax)*, সরকারি কৃষকদের খাজনা (Obrok), মুরা ও লবণের একচেটিয়া ব্যবসা, 'কষ্টম হাউস', খনি, টাঁকশাল, ষ্টাম্প, ব্যবসায়ীদের বাণিজ্য শুদ্ধ হইতে এই রাজস্ব আদায় হয়। এই টাকা হইতে সরকারি কর্জ করা টাকার মূল ৪০,০০০,০০০ চার কোটি রুবল বা তদপেক্ষা বেশী রুবল প্রতি বৎসর খরচ হইয়া যায়। অবশিষ্ট টাকা রাজকার্য্য-সংক্রান্ত ব্যাপারে ব্যয়িত হয়।

ত্রয়োদশ অধ্যায়।

ব্যবসায়, বাণিজ্য ও উৎপন্ন দ্রব্য।

রুসিয়ায় বহির্বাণিজ্য ও অন্তর্বাণিজ্য, দুই প্রকার বাণিজ্যই দেখা যায়,

* ১৮৬১ খৃষ্টাব্দে রুসগবর্ণমেন্ট ক্রীতদাসস্ব-প্রথা উঠাইয়া দিয়াছেন। ইহাতে ২,০০,০০,০০০ দুই কোটি ক্রীতদাস মুক্তিলাভ করিয়াছে।

তবে অন্তর্বাণিজ্যাপেক্ষা বহির্বাণিজ্যই বেশী। রুসিয়া যে সকল দেশের সহিত বাণিজ্য করে, তন্মধ্যে গ্রেট ব্রিটনই প্রধান। ১৮৩৫ খৃষ্টাব্দে রুসিয়াতে সর্বশুদ্ধ ৮,৭৩,৩৪,৪৮০ টাকার দ্রব্য আমদানি হইয়াছিল, তন্মধ্যে এক গ্রেট ব্রিটন হইতেই ৩১৭,১৫,৮৩০ টাকার সামগ্রী; বাকি টাকার জিনিষ অন্যান্য দেশ হইতে। সেই বৎসরের রুসীয় রপ্তানি দ্রব্যের মূল্য ৮,৬০,৬২,৬৭০ টাকা, তন্মধ্যে গ্রেট ব্রিটনে ৪০,১,৩০,৩৯০ টাকার দ্রব্য রপ্তানি হইয়াছিল। গ্রেট ব্রিটন হইতে আমদানি দ্রব্যের মধ্যে কাপড়, তুলামিশ্রিত পশম, দড়ির জন্য মোটা সূতা, তুলার জিনিষ, কাফি, নীল, সীসধাতু, মসলা, চিনি, রেশম, তামাক, জুতা, পশমী জিনিষ এবং ঔষধের গাছগাছড়াই প্রধান। রুসিয়া হইতে ঐ দ্বীপে রপ্তানি দ্রব্যের মধ্যে ধাতুভঙ্গা, পশুলোম, বাহাচুরী কাষ্ঠ, পাট, শোণ, চর্ম, লৌহ, তিসি, মাহুর, জাহাজের পালের কাপড়, পশম, ক্যান্সিস, সাবান, মোমবাতি, ধাতুর তার, পটাশ, পশম-জমানো কাপড়, লবণজারিত মৎস্ত ও মাংস, মৎস্তশিরাশ ও চর্কিই প্রধান। বিশেষতঃ এক চর্কির রপ্তানিতে রুসিয়ার অপরাপর রপ্তানি দ্রব্যের অর্ধেক লাভ হয়।

১৮৩৫ খৃষ্টাব্দে আমদানি ও রপ্তানি দ্রব্যের মানুশে রুসীয় গবর্ণমেন্ট ৩,৪৮,৬৪,২০০ টাকা পাইয়াছিলেন; তন্মধ্যে এক গ্রেট ব্রিটন হইতেই ১,১৬,৯৯,৮৬০ টাকা শুদ্ধ আদায় হইয়াছিল। রুসিয়ার যে সকল বন্দর হইতে মাল আমদানি ও রপ্তানি হয়, তাহাদের মধ্যে বস্টিক সাগরে, সেন্টপিটার্সবর্গ, রিভেল এবং রিগা; খেত সমুদ্রে, আর্কেঞ্জেল এবং কুসসাগরে ওডেসা বন্দর। সেই সকল বন্দরে বিদেশীয়েরা কেবল বহির্বাণিজ্য করিতে পায়, কিন্তু অন্তর্বাণিজ্য দেশীয়দিগের একচেটিয়া।, গ্রেট ব্রিটনের সহিত রুসিয়ার বাণিজ্য-সম্বন্ধ বৃদ্ধি না হইয়া বরং হ্রাস হইয়াছে। এরূপ হইবার কারণ এক্ষণে রুসিয়া, আমেরিকা এবং তুরস্কের সহিত প্রচুর পরিমাণে মাল আমদানি ও রপ্তানি করিয়া থাকে। ফ্রান্স, অষ্ট্রিয়া এবং হলণ্ড প্রভৃতির সহিতও রুসিয়ার বাণিজ্য সম্বন্ধ বৃদ্ধি হইয়াছে। বহির্বাণিজ্য ব্যতীত রুসিয়ার অন্তর্বাণিজ্য বড় কম নহে। রাজ্যের ভিন্ন ভিন্ন অংশে দেশীয়েরা মাল আমদানি ও রপ্তানি করিয়া থাকে। ১৮৩৬ খৃষ্টাব্দে অন্তর্বাণিজ্যের জন্য বল্টিক সাগরে ১১২৫ এবং কুসসাগরে ৪৩৫৬ খানি বাণিজ্যপোত ছিল। সেই বৎ-

সরে বৈদেশিক মাল খালাস করিবার জন্য রুসিয়া ১৪২ খানি জাহাজ রাখিয়াছিল ।

পূর্বে রুসিয়ায় বৈদেশিকেরা বিনাশুল্কে বাণিজ্য করিতে পাইত, কিন্তু এক্ষণে শুল্ক দিতে হয় । রুসিয়ায় দেশীয় সওদাগরেরা মূল ধনের তারতম্যে তিন ভাগে বিভক্ত । ১৮২৯ খৃষ্টাব্দে যে সকল সওদাগরের প্রত্যেকের পঞ্চাশ হাজার রুবল মূলধন ছিল, তাহাদের সংখ্যা ১৪৯৭ । উহারাই প্রথম শ্রেণীর সওদাগর । দ্বিতীয় শ্রেণীর প্রত্যেক সওদাগরের মূলধন ২০ হাজার রুবল । উহাদের সংখ্যা ৩৯৯৮ । এবং তৃতীয় শ্রেণীর প্রত্যেক সওদাগরের মূলধন ৮ হাজার রুবল । উহাদের সংখ্যা ৬৮,২১২ । ঐ সকল সওদাগরের মধ্যে ৭৫২৫ জন যিহুদী এবং ১০৫০ জন মুসলমান ছিল । এক্ষণে ক্রমে ক্রমে সওদাগরের সংখ্যা খুব বৃদ্ধি হইতেছে । ১৮৬১ হইতে ১৮৭১ খৃষ্টাব্দ পর্য্যন্ত ১০ বৎসরের মধ্যে রুসিয়ায় বৈদেশিক বাণিজ্য দ্বিগুণ বাড়িয়াছে । ১৮৭০—১৮৮০ খৃষ্টাব্দে চুয়ান্ন হইতে একানব্বই কোটি টাকার জিনিস আমদানি ও পঞ্চাশ কোটি হইতে ছিয়ানব্বই কোটি টাকার জিনিস রপ্তানি হইয়াছিল । রুসিয়ায় রেলওয়ের বিস্তার হওয়াতে অভ্যন্তরীণ বাণিজ্য পূর্বা-পেক্ষা খুব বাড়িয়াছে । ১৮৮৩ খৃষ্টাব্দে প্রায় ১৫,০০০ পনের হাজার মাইল রেলপথ খোলা হইয়াছিল । বর্তমান সময় পর্য্যন্ত আরও বেশী হইয়াছে । বিশেষতঃ ভারতাক্রমণের অভিপ্রায়ে রুস-রেলওয়ে আফগানিস্তানের সীমা পর্য্যন্ত আসিয়া উপস্থিত । ১৮৮২ খৃষ্টাব্দ পর্য্যন্ত রুসীয় টেলিগ্রাফ লাইন ৬০,০০০ ষাট হাজার মাইল বিস্তৃত হইয়াছিল ; এক্ষণে আরও অগ্রসর হইয়াছে ।

এইবার রুসিয়ায় উৎপন্ন দ্রব্যের বিষয় কিছু বলা যাউক । রুসিয়ায় অত্যন্ত দেশের জায় বহুপূর্বে ব্যবহারিক শিল্পের (Manufacture) এর চলন হইয়াছিল, কিন্তু পঞ্চদশ ও ষোড়শ শতাব্দীতে জার প্রথম ইভান ও দ্বিতীয় ইভানের রাজত্বকালে রুসিয়া স্বাধীন হইয়াছিল বলিয়া উক্ত উভয় জার স্ব স্ব সময়ে রুসিয়ায় উন্নতির জন্য জর্মণি, নিদারলণ্ড ও ইতালী দেশ হইতে ভাল ভাল শিল্পকর অনাইয়াছিলেন । ঐ সকল শিল্পী রজাক্তায় মস্কোড, ইয়ারোস্লা, স্মোলেন্স্ক এবং কীব নামক নগরগুলিতে কার্য আরম্ভ করিয়া-

ছিল। তৎকালে ঐ সকল স্থানের কারখানায় পশমী কাপড়, লিনেন কাপড়, অস্ত্রশস্ত্র প্রভৃতি তৈয়ার হইত। কিন্তু রমানফ পরিবারের সিংহাসনশাস্তির পূর্বে আত্মবিগ্রহ উপস্থিত হওয়ায় এবং সুইডেন ও পোলণ্ডের রুসিয়ার প্রতি দৃষ্টি পড়ায়, রাজ্যশাসন বিশৃঙ্খল হইয়া পড়িয়াছিল। সুতরাং সে সময়ে রুসিয়ার নবজাত ব্যবহারিক শিল্পেরও সর্বনাশ ঘটিয়াছিল। এইরূপে কিছুকাল গেলে পর পিটার দি গ্রেটের সময় হইতে পুনর্বীর রুসীয় শিল্পের উন্নতি আরম্ভ হয়।

১৮১৫ খৃষ্টাব্দে সর্বসমেত ৩২৫০টি কারখানা ছিল। সেই সকল স্থানে এক লক্ষ পঞ্চাশ হাজার কারিকর ও মজুর খাটিত। ১৮২৯ খৃষ্টাব্দে কারখানার সংখ্যা বাড়িয়া ৫২৬৯টি হইয়াছিল। ঐ সকলের কারিকর ও মজুরের সংখ্যা ২৩:৬২৪। ১৮৩৯ খৃষ্টাব্দের প্রারম্ভে ৬,৮৫৫টি কারখানা ছিল এবং উহাতে ৪,১২,৯৩১ মজুর খাটিত। ঐ সময়ে রুসিয়ায় পশমী জিনিষের ৬১৬, রেশমী জিনিষের ২২৭, তুলার জিনিষের ৪৬৭, লিনেন কাপড়ের ২৬৭, চর্কি গলা-ইবার ৫৫৪, মোমবাতি তৈয়ার করিবার ৪৪৪, সাবান তৈয়ার করিবার ২৭০, ধাতুর তার তৈয়ার করিবার ৪৮৬ এবং চামড়া তৈয়ার করিবার ১৯১৮টি কারখানা ছিল। কারখানা সম্বন্ধে মস্কাউ নগর সর্বাপেক্ষা প্রসিদ্ধ ছিল। তার নীচে ব্লডিমির, নিজনী-নবগরদ, সরাতোব্ এবং সেট পিটার্সবর্গের খ্যাতি ছিল। এক্ষণে এই সকল কল-কারখানার সংখ্যা প্রায় দ্বিগুণ হইয়াছে, সুতরাং মজুরের সংখ্যাও তদুপযুক্ত বাড়িয়াছে। রুসিয়ার কারখানাগুলিতে কয়েক প্রকার লৌহকার্য্য, পালের কাপড়, থলে, চর্ম্ম, শোণ ও পাটের পদ্দা বাতীত প্রায় অন্যান্য সামগ্রী তেমন উৎকৃষ্ট নয়। খোলাভাঁটির মদের দৌলতে ২৭ কোটি রুবল উপার্জিত হয়। তদ্ব্যতীত রুসীয় গবর্ণমেন্ট শুদ্ধরূপে ৯ কোটি রুবল পাইয়া থাকেন। রুসিয়ায় মদ ও মদের ব্যবসাতে খুব ঘুষ ও ঘুষি চলে।

মস্কাউ প্রদেশে রেশম ও তুলার কতকগুলি কারখানা আছে। সেখানে কতকটা কার্য্যসিদ্ধিও হইয়া থাকে। ইংলণ্ড এবং ফরাশি প্রভৃতি দেশ হইতে ভাল ভাল শিল্পকরেরা সেখানে আসিয়া নৃশিক্ষণ-শিল্পের বিশেষ উন্নতি করিয়াছে।

পিটার্সবর্গ নগরের সহস্র তলীতে কতকগুলি বড় বড় রাজকীয় কল-কার-

খানা আছে। সেই সকল কারখানায় গবর্ণমেন্ট তরফের মজুরেরা কাজ করে। ঐ সকল কারখানায় কাচ ও চীনা বাসনের কার্খা বেশীর ভাগে হইয়া থাকে। উহাদের মধ্যে একটি কারখানায় দুইটি বৃহৎ দৰ্পণ প্রস্তুত হইয়াছিল। একখানি দৰ্পণ টোরিডার রাজপ্রাসাদে এবং অপরখানি অপ্লি হাউসে ডিউক অব ওয়েলিংটন কর্তৃক উপহার প্রদত্ত হইয়াছিল। ঐ দুই-খানি বৃহৎ দৰ্পণের মধ্যে একখানির দৈর্ঘ্য ১৯৪ ইঞ্চি এবং প্রস্থ ১০০ ইঞ্চি। তত বড় আয়না পৃথিবীর আর কোথাও নাই। আলেকজান্দ্রাস্কি জাবদ নামক তুলার কারখানাটি খুব বড়। ঐ কারখানায় যেমন জিনিষপত্র প্রস্তুত হয়, তেমনি ঐ সকল জিনিষপত্র প্রস্তুত করিবার যন্ত্রাদিও ঢালাই হয়। অধিকন্তু সেখানে খেলিবার তাসও তৈয়ার হয়। ঐ তাস বিক্রয় করিয়া বাৎসরিক দুই লক্ষ টাকা লাভ হয়। সেটপিটার্সবর্গ হইতে ৩৪ ভাষ্ট* (রুসীয় পথমান বিশেষ) দূরে কোলপিংসই গ্রামে জাহাজ তৈয়ার করিবার একটি বৃহৎ কারখানা আছে। উহাতে ইংলণ্ডের ন্যায় পোত-নিৰ্মাণের ভাল ভাল জিনিষ তৈয়ার হয়।

রুসিয়ায় লোহার কারখানার সংখ্যাই সৰ্ব্বাপেক্ষা বেশী। উহার কতকগুলি সরকারী ও কতকগুলি বেসরকারী। ঐ সকল কারখানায় যুদ্ধাস্ত্র ও ছুরি, কাঁচি, কাঁটা প্রভৃতি সকল প্রকার লোহার জিনিষ প্রস্তুত হয়। সাই-বিরিয়ার সীমান্তে একাটারিনবর্গ নগরের নিকট ইয়াকড্‌লেফ পরিবারের লোহ-কারখানাটি বিশেষ প্রসিদ্ধ। উহাতে প্রত্যহ ছয় হাজারের অতিরিক্ত মজুর কাজ করে।

রুসিয়ার আরমেনীয়, বুকারীয় এবং য়িহুদীরা প্রধানতঃ তদ্দেশজাত বাণিজ্য-দ্রব্য লইয়া চীন, পারস্য, এসিয়ামাইনর প্রভৃতি দেশে বিক্রয় করে।

পূর্বে ভল্গা নদীর উত্তর তটস্থ মকারিফ নগরে যথাসময়ে একটি বৃহৎ মেলা হইত। ঐ মেলাতে চারি দিকের লোক আসিয়া স্ব স্ব দ্রব্যাদি ক্রয় বিক্রয় করিত। কিন্তু ১৮১৭ খৃষ্টাব্দে, ঘটনাক্রমে হউক, বা কাহার ইচ্ছাক্রমেই হউক, তত্রস্থ বাজারের বহুসংখ্যক গৃহ অগ্নিযোগে ভস্মীভূত হওয়াতে ঐ মেলা এখন নিজনী নবগরদ নামক নগরে হইয়া থাকে। রুসিয়ায় দুইটি

* ইংরাজি দেড় মাইলে এক ভাষ্ট (Verst) হয়।

নবগরদ নগর আছে—একটি বৃহৎ নবগরদ, একটি নিজনী-(Nijni)-নবগরদ অর্থাৎ ছোট নবগরদ। নিজনী নগর পিটার্সবর্গ হইতে ৭৫০ মাইল এবং মস্কাউ হইতে ২৬০ মাইল দূরে, ভল্গা এবং ওকা নদীর সঙ্গমস্থলে অবস্থিত। নিজনী-নবগরদ নগর যে স্থানে অবস্থিত, সেখানে চতুর্দিক হইতে নানাবিধ বাণিজ্য দ্রব্যের ক্রয় বিক্রয়ের সুবিধা হয়। রুস সম্রাট পিটার দি গ্রেট এক সময়ে ঐ নগরেই রাজধানী স্থাপন করিতে ইচ্ছুক হইয়াছিলেন।

নিজনী-নবগরদ নগরে দেশীয় ও বিদেশীয় ক্রেতা বিক্রেতাদের জম্ম সারিবন্দি বাজার আছে। প্রতি বৎসর আগষ্ট ও সেপ্টেম্বর মাসে সেখানে দুই মাস কালব্যাপী একটি মহামেলা হইয়া থাকে। ঐ মেলাতে চীন, ভারত-বর্ষ, তাতার, পারস্য, সার্কেনিয়া, আর্মেনিয়া, বুকারিয়া, তুরস্ক, গ্রীস, ইতালী, পোলণ্ড, জার্মানি, ফ্রান্স, ইংলণ্ড, আসিয়া-মাইনর প্রভৃতি দেশের বণিক-গণ স্ব স্ব দেশীয় পরিচ্ছদে ভূষিত হইয়া, দীর্ঘশ্রমযুক্ত রুসীয়দের সহিত মিশিয়া এক অপূর্ব শোভা ধারণ করে। সেই মেলাতে বিদেশীর সংখ্যা ১,৩০,০০০ এবং দেশীয়দের সংখ্যা ২৫,০০০ মাত্র হয়। রুসীয় গবর্ণমেন্টের ব্যয়ে ১,০০,০০,০০০ রুবলে ঐ মেলাভূমির বাজার প্রস্তুত হইয়াছে। কিন্তু গবর্ণমেন্টের ইহাতে লাভ ভিন্ন ক্ষতি হয় নাই। কেন না প্রতি বৎসর সেই স্থান হইতে ৭৮ লক্ষ রুবল ভাড়া পাওয়া যায়। নিজনী-নবগরদ হইতে অনেকগুলি ষ্টীমার ভল্গা নদী বাহিয়া অজ্রাকান এবং কাস্পিয়ান হ্রদের নিকটবর্তী স্থানে মাল মসলার নেওয়া দেওয়া করে।

তিব্বতের সমতল প্রদেশের সীমান্তে লডক নামক স্থানেও একটি বৃহৎ মেলা হয়। নিজনী-নবগরদ হইতে তাতারদেশীয় বণিকেরা সেই মেলায় আসিয়া বস্ত্র বিক্রয় করে। চীনের বণিকেরা চৈন চা-র বিনিময়ে সেই সকল বস্ত্র ক্রয় করে। রুসিয়াবাসীরা সেই চা বিক্রয় করিয়া থাকে। ইংলণ্ডে যে চা যায়, তদপেক্ষা এই চা উৎকৃষ্ট।

চতুর্দশ অধ্যায় ।

ভাষা, সাহিত্য, ইতিহাস, বিজ্ঞান, পুস্তক ইত্যাদি ।

রুসিয়ার সাহিত্যের কথা বলিতে গেলে, প্রথমে ডাক্তার বাউরিং সাহেবের মন্তব্যটির প্রতি মনোযোগ করা উচিত । তিনি রুসীয় সাহিত্য-সার-সংগ্রহ (Russian Anthology) নামক গ্রন্থের ভূমিকায় লিখিয়াছেন, “রুসীয় মুদ্রাবল্ল হইতে যে সমস্ত গ্রন্থ বাহির হয়, তাহাতে জাতীয় উন্নতির বিষয় বড় লেখা থাকে না ।” রুসরাজ্যে উচ্চশ্রেণীর লোকদিগের মধ্যে যাহা কিছু পাঠক পাওয়া যায় । যদিও অনেকগুলি দেশীয় গ্রন্থকার, সম্রাট কিন্সা ধনী-দিগের অনুগ্রহভোগী, তবু তাঁহাদের পরিপ্রমাণসারে অর্থ লাভ হয় না । দেখিতে গেলে রুসিয়ার গ্রন্থকারেরা প্রায়ই সাধারণ লোকদিগের নিকট উৎসাহ পান না । আবার এ দিকে জ্ঞানচর্চার তেমন প্রথর স্রোতঃ না থাকাতে, কোন কোন গ্রন্থকার অপরের নিকট সহায়্য পাইয়াও, উচ্চদরের চিন্তাশক্তি-পূর্ণ পুস্তক লিখিতে পারেন না । যদিও লোমনসক্, মুরভিগ, করমুজিন্, পৌজিন্* প্রভৃতি গ্রন্থকারেরা রুসিয়ার মধ্যে প্রথম শ্রেণীর গ্রন্থকার বলিয়া পরিচিত, তথাপি তাঁহাদের গ্রন্থগুলি আজিও যেন চিন্তা ও ভাবার শৈশবাবস্থার পরিচয় দিতেছে । অধিক সংখ্যক পুস্তকই জর্ষণ ও ফরাসী ভাষা হইতে অনুবাদিত । ঐ সকল পুস্তকের কাট্টি বড় কম । করমুজিনের “রুসিয়ার ইতিহাস” রুসরাজ্য মধ্যে সর্বাপেক্ষা পরিচিত ও আদৃত । কিন্তু যেকালে সে পুস্তকখানিরও গ্রাহকসংখ্যা কম, তখন অন্য পরে কা কথা ? উক্ত ইতিহাস ১৮১৮ ও ১৮১৯ খৃষ্টাব্দে চাঁদা সংগ্রহ দ্বারা মুদ্রিত হইয়া কেবল চারি শত ছয় জন গ্রাহকের হাতে পড়িয়াছিল । ঐ গ্রাহকদিগের মধ্যে ৫ জন পাদরি, ৪০ জন সওদাগর, ও ৩ জন কৃষক ; বাকী ৩৫৮ খণ্ড অবশ্য সম্রাট ব্যক্তিরাই খরিদ করিয়াছিলেন । বহু দিনে ঐ ইতিহাস দুই বারে

* ব্রিট্রায় সাহেব বলেন, কবির পৌজিন্ রুসীয় বায়রন ।

১,৫০০ খণ্ড প্রকাশিত হইয়া বিক্রীত হইয়াছিল। ইহারই নাম রুসীয় সাহিত্যের উৎসাহ !

রুসীয় মুদ্রাযন্ত্রে যে সকল পুস্তক মুদ্রিত হয়, তত্তাবতের পাণ্ডুলিপি অগ্রে রুস গবর্ণমেণ্ট কর্তৃক পঠিত ও পরীক্ষিত হইয়া থাকে। ছাপিবার হুকুম হইলে ছাপ, নতুবা ছাপাইয়া রাখ। বৈদেশিক গ্রন্থাদিও বিনা জামিনে রুসিয়ার সীমায় প্রবেশ করিতে পারে না। বৈদেশিক ভ্রমণকারীদের ব্যবহার্য পুস্তকও বিনা পরীক্ষায় রুসিয়ার মুখ দেখিতে পায় না। বিশেষতঃ যে সকল বিদেশীয় গ্রন্থে রুসিয়ার প্রতি অল্পমাত্র তীব্র কটাক্ষের চিহ্ন থাকে, কাহার সাধ্য যে, সে সকল তথায় লইয়া যায় ?

যে কোন রুসীয় গ্রন্থকার গবর্ণমেণ্টের বিনামূল্যে রাজ্য-সংক্রান্ত উচিত কথা লিখিতে গিয়া স্বাভিমত প্রকাশ করেন, তাঁহার গ্রন্থ মুদ্রিত হওয়া ত দূরের কথা, তাঁহাকে চিরজীবনের জন্য সাইবিরিয়াতে গিয়া বাস করিতে হয়। রুসিয়ার সর্বপ্রধান কবি আলেক্সান্দার পৌজিনকে এইরূপে সম্রাট প্রথম আলেক্সান্দার কর্তৃক নির্দাসন-দণ্ড ভোগ করিতে হইয়াছিল। এই সকল কারণেই রুসিয়ার রাজভয়ে ভাল ভাল পুস্তক প্রচারিত না হইয়া জঙ্গলের ভাগই বৈশী। তবে যে সকল গ্রন্থ কেবল বিজ্ঞান-সম্বন্ধীয়, তাহাদেরই বিনা বিঘ্নে বংশ বৃদ্ধি হয়। এইরূপ বৈজ্ঞানিক গ্রন্থ রুসিয়ার বৈজ্ঞানিক সভাগুলি হইতে ফরাসী ও প্লাভিনিক ভাষায় অনবরত দেখা দিতেছে। ঐ সকল গ্রন্থ গুণের ও গৌরবের বটে।

যাই হউক, রাজদৌরাত্ম্যে ভীত হইয়া রুসিয়ার গ্রন্থকারেরা যেমন স্বাধীন-মত-পূর্ণ গ্রন্থ লিখিতে পারেন না, তেমনি কিন্তু অন্যরূপ ভাল গ্রন্থও সময়ে সময়ে প্রকাশিত হয়। ম. সফিকফ্ রুসীয় পুরাতত্ত্বসম্বন্ধীয় একটি রচনাতে লিখিয়াছিলেন, যখন ১৫৫১ খৃঃ অব্দে রুসিয়ার সর্বপ্রথম মুদ্রাযন্ত্রের আরম্ভ হয়, তখন হইতে ১৮১৩ খৃঃ অব্দ পর্যন্ত রুসরাজ্যে রুসো-প্লাভিনিক ভাষায় সর্বশুদ্ধ ৮০,০০০ আশী হাজার গ্রন্থ প্রকাশিত হইয়াছিল। ডাক্তার গ্রান্ডিল বলেন, এক্ষণে ঐরূপ গ্রন্থে ধারাবাহিক সংখ্যা অনেক হইয়াছে।

সেন্ট পিটার্সবর্গের ছাপাখানাগুলিতে ছাপিবার জন্য যে সকল সীসার অক্ষর ব্যবহৃত হয়, উহা অতি উৎকৃষ্ট। রুসীয় অক্ষরনির্মাতাদিগকে তজ্জ

ভাষা, সাহিত্য, ইতিহাস, বিজ্ঞান, পুস্তক ইত্যাদি । ৩৩

বথেষ্ট প্রশংসা করা উচিত । এ বড় আশ্চর্যের কথা যে, জৰ্ম্মণি আধুনিক সাহিত্য ইত্যাদি সম্বন্ধীয় ভূরি ভূরি গ্রন্থ প্রকাশ করিবার জন্য রাশি রাশি অক্ষর ঢালাই করিতেছে, কিন্তু রুসীয় মুদ্রাক্ষরের নিকট চমৎকারিত্বে দাঁড়াইতে পারে না । তাহা ছাড়া জৰ্ম্মণির লিপজিগ্‌ নগরে হাজার হাজার পুস্তক ছাপিবার জন্ত যে কাগজ প্রস্তুত হয়, তা'ও রুসীয় কাগজ অপেক্ষা অনেক নিকৃষ্ট । কিন্তু তাহা হইলে কি হইবে ? রুসেরা অনন্ত দেশের লোকের জায় কাগজ ব্যবহার করিতে জানে না । সম্প্রতি কৃষিগেজেটে কাগজ ব্যবহার সম্বন্ধে একটি প্রস্তাব লিখিত হইয়াছে । উহা এই ;—“আপাততঃ ইউরোপে কাগজ প্রস্তুত সম্বন্ধে একটি * * * হিসাব সংগৃহীত হইয়াছে । সমগ্র পৃথিবী মধ্যে ৩,৯৮৫টি কাগজ প্রস্তুত করা কল ; তাহাতে প্রতিবৎসর ২ কোটী ৩৮ লক্ষ মণ কাগজ প্রস্তুত হয় । ইহার অর্ধেক ছাপার জন্য ব্যবহার হয়, অপর অর্ধেক অন্তর্জাল জরুরি । বিগত দশ বৎসরের মধ্যে কেবল ছাপার জন্য ২৮ লক্ষ মণ কাগজ বাড়িয়াছে । মাথাপিছু কত কাগজ খরচ হয়, তাহারও হিসাব বাহির হইয়াছে । ইংরেজে পাঁচ সের আড়াই পোয়া ; মার্কিন পাঁচ সের এক ছটাক ; জৰ্ম্মণ চারি সের ; ফরাসী তিন সের আড়াই পোয়া ; ইতালী ও অস্ট্রিয়াবাসী এক সের আড়াই পোয়া ; স্পেন দেশের লোক আড়াই পোয়া ; রুস আধ সের ; এবং মেক্সিকো দেশীয় লোক এক সের ।” এই হিসাব-তালিকায় রুসেরাই সকলের নীচে দাঁড়াইতেছে । বিদ্যাচর্চার দৌড় খুব যে !

সেন্ট পিটার্সবর্গের পুস্তকের দোকানগুলির অপেক্ষা মস্কো নগরের দোকানগুলি বেশ পরিপাটী ; পুস্তক সাজাইবার কেতাও বেশ । ইংলণ্ডের লণ্ডন নগর, ফ্রান্সের প্যারিস নগর এবং অস্ট্রিয়ার ভিয়েনা নগরের পুস্তকের দোকানগুলি যেমন রাস্তার সঙ্গে সমান জমি, কিন্তু মস্কো নগরের পদ্ধতি আর এক রকম । সমস্ত দোকান দোতালার উপর । অত্রস্থ কোন কোন পুস্তকের দোকানে রুস গ্রন্থকারগণের নামতালিকা আছে । সেই সকল গ্রন্থকারের নামাবলী একত্র ছাপাইলে আট পেজী ফর্ম্মার দুই শত পৃষ্ঠার একখানি পুস্তক হইতে পারে । অন্যান্য দেশের বড় বড় নগরে ফরাসী, ইতালীয়, জৰ্ম্মণ ও ইংবেজি ভাষার পুস্তক যে পরিমাণে পাওয়া যায়, রুসিয়ার বড় বড়

নগরেও সেই পরিমাণে পাওয়া যাইতে পারিত, কিন্তু রুসদের অজ্ঞতা প্রযুক্ত আজিও সেরূপ হইতে পারে নাই ।

রুস-গবর্ণমেণ্টের কড়া মেজাজে পড়িয়া কখন কখন গ্রন্থকারদের ছাপা বহি জলসিঁহ হয় । আজ কাল রুসরাজ্যে যে সকল পুস্তক মুদ্রিত হয়, গ্রন্থকার ও পুস্তকবিক্রেতাদের উপর তাহার দায়িত্ব সম্পূর্ণ । অনেক পুস্তক-বিক্রেতা রাজভয়ে স্বাধীনভাবে পুস্তক বিক্রয় করিতে পারে না । কোন কোন দোকানদার পুস্তকের দোকান খুলিয়া লোকুমানের উপর লোকুমান সহ্যে । কেহ বা বিরক্ত ও ভীত হইয়া অপর কোন সাহসিক লোককে দোকান আধা-দরে বেচিয়া ফেলে । কখন কখন দোকানদারদের প্রতি এরূপ কঠিন রাজাজ্ঞা হয় যে, উহাদের মধ্যে কতকগুলি লোককে বহুমূল্যের নূতন চক্চকে গ্রন্থরাশি জ্বলন্ত অগ্নির মুখে আহুতি দিতে হয় । অনেক টাকার জিনিষ পোড়াইয়া দোকানদারকে দেউলিয়া হইতে হয় । কি বিভাট !

এত কষ্টে পড়িয়াও পেটের দায়ে অনেক দোকানদার পুস্তক বিক্রয় করে । সেণ্ট পিটার্সবর্গ এবং মস্কো নগরের মধ্যে ও সহরতলীতে যে সকল ধনী ও জমীদার বাস করেন, তাঁহাদেরই দ্বারা উহাদের জীবিকা নির্বাহ হয় । রুসীয় ধনী ও জমীদারদের মধ্যে অনেকে পুস্তক পাঠ অপেক্ষা আলমারি সাজাইয়া রাখিতে ভালবাসেন । যদি এই সখটুকুও না থাকিত, তা' হইলে রুসিয়ায় পুস্তক ব্যবসায়ের বড় ব্যাঘাত ঘটিত । ঐ সকল বড় বড় লোকের নিকট পুস্তকবিক্রেতারার সময়ে সময়ে এক এক থোকে অনেক টাকার পুস্তক বেচে । *

রুসীয় ধনী পাঠকেরা গ্রন্থের মধ্যে উপাত্তাসটাই বেশী পড়েন । ফরাসী ভাষার আদিরসাত্মক পুস্তকগুলিও তাঁহাদের পক্ষে সংক্রামক রোগ । ইংরেজি হইতে ফরাসী ভাষার অনুবাদিত অদ্ভুত রসের উপভাস পড়া ঐ সকল লোকের বড় ভাল লাগে । কিন্তু অল্পরূপ অনুবাদিত পুস্তক ভাল হইলেও, রুসীয় সম্ভ্রান্তদের কাছে “আঃ ছ্যা !” হইয়া পড়ে ।

* রুসিয়ার রাণী দ্বিতীয় ক্যাথারাইনের এক জন প্রিয়পাত্র এক সময়ে এক জন পুস্তক-বিক্রেতাকে বলিয়াছিলেন, “নীচে বড় বড় ও উপরে ছোট ছোট সুন্দর পুস্তকরাশিতে আমার জন্য একটি পরিপাটী গ্রন্থমন্দির (Library) সাজাইয়া দাও ।” আজ কাল অনেক সৌধীন ধনী ও জমীদার, পুস্তকবিক্রেতাদের এই ধরনের ছক্স দিয়া থাকেন ।

ভাষা, সাহিত্য, ইতিহাস, বিজ্ঞান, পুস্তক ইত্যাদি । ৩৫

এক্ষণে আমরা সেণ্টপিটার্সবর্গ, মস্কো ও অন্যান্য স্থানের কতকগুলি সাময়িক ও সংবাদপত্রের তালিকা দিতেছি ।

সেণ্ট পিটার্সবর্গ হইতে—

১। জর্নাল ডি সেণ্ট পিটার্সবর্গ পলিটিক্ এন্ড লিটারেরি Journal de St. Petersburg Politique et Litteraire) । সপ্তাহে তিন বার রুসীয় ভাষায় ছাপা হয় । রাজকীয় সংবাদপত্র ।

২। দি ইনভালিড (The Invalid) । রুসীয় ভাষা, প্রাত্যহিক, সমর-সংক্রান্ত বিষয় লিখিত হয় ।

৩। সেণ্ট পিটার্সবর্গ-গেজেট (Gazette of St. Petersburg) । রুসীয় ও জার্মান ভাষায় সপ্তাহে দুই বার স্বতন্ত্র মুদ্রিত হয় । বিজ্ঞান বিদ্যালয় হইতে প্রকাশিত । রুস গবর্ণমেন্টের উপদেষ্টা ।

৪। সিনেট গেজেট (Gazette of the Senate) । রুসীয় ভাষা ; সাপ্তাহিক । ইহাতে সিনেটের আইন কানুন প্রকাশিত হয় ।

৫। জর্নাল অব কমার্স (Journal of Commerce) । রুসীয় ও জার্মান ভাষা । সপ্তাহে তিন বার প্রকাশিত হয় ।

৬। দি নর্দার্ন বী (The Northern Bee) । সাহিত্য ও রাজনীতি-বিষয়ক সংবাদপত্র ; সপ্তাহে তিনবার প্রকাশিত হয় ।

৭। দি পেট্রিয়ট্ (The Patriot) । রুসীয় ভাষা । রাজনীতি ও সাহিত্য বিষয়ক । পাক্ষিক ।

৮। আর্চিভ্‌স অব্ দি নর্থ (Archives of the North) । রাজনীতি, ইতিহাস ও লোকবিজ্ঞানমূলক । পাক্ষিক ।

৯। স্লাভোনিয়ান্ (Slavonian) । সাহিত্য ও যুদ্ধসংক্রান্ত । পাক্ষিক ।

১০। ন্যাশন্যাল মিসেলেনি (National Miscellany) । ইতিহাস, সাহিত্য ও লোকবিজ্ঞানসম্বন্ধীয় । রুসীয় ভাষা । মাসিক ।

১১। রেজিষ্টার অব্ ডিস্কভারিজ (Register of Discoveries) । প্রাকৃতিক ইতিহাস, শারীর বিদ্যা ও ক্রিমীয় বিদ্যাবিষয়ক ।

১২। জর্নাল অব্ মেনুফেক্‌চরস ও কমার্স (Journal of Manufactures and Commerce) ।

tures and Commerce)। রাজস্ব-সচিব কর্তৃক প্রতিমাসে প্রকাশিত। ইহাতে জাতীয় শিল্পের আবিষ্কার, পরীক্ষা, ব্যবস্থা ও নিয়ম সকল যথাযথ বিবৃত হয়।

১৩। গেজেট অব্ কমার্স (Gazette of Commerce)। সপ্তাহে দুই বার প্রকাশিত। রুস ও জার্মান ভাষা। ইহাতে বিদেশীয় ও স্বদেশীয় বাণিজ্যের বিষয় লিখিত হয়।

১৪। জর্ণাল অব্ দি মাইনিং কোর্পস্ (Journal of the Mining Corps)। রুস ভাষা।

১৫। জর্ণাল অব্ দি মিনিষ্টার অব্ পব্লিক্ ইন্সট্রাক্শন্স্ (Journal of the Minister of Public Instruction)। রুস ভাষা।

১৬। জর্ণাল অব্ ওয়েজ এণ্ড্ কমিউনিকেশন্স্ (Journal of Ways and Communications)। ফরাসী ও রুস ভাষা।

১৭। সেন্ট পিটার্সবার্গার জীটং (St. Petersburg Zeitung)।

১৮। নবয় ব্রিমিয়া (Novoy Bremya)। রুস ভাষা।

১৯। নিবস্তি (Nevosti)।*

২০। সুয়েৎ (Suiett)।

২১। অফিসিয়াল্ মেসেঞ্জার (Official Messenger)।

মস্কাউ নগর হইতে—

২২। দি মস্কাউ গেজেট (The Moscow Gazette)। রুস ভাষা।

২৩। দি মস্কাউ কুরিয়ার (The Moscow Courier)।

২৪। দি মস্কাউ টেলিগ্রাফ (The Moscow Telegraph)।

২৫। দি কুরিয়ার অব্ ইউরোপ্ (The Courier of Europe)।

২৬। দি জর্ণাল অব্ এগ্রিকল্চার (The Journal of Agriculture)।

ত্রৈমাসিক। ইহা অতি উৎকৃষ্ট সাময়িক পত্র।

২৭। দি জর্ণাল অব্ ফিজিক্স্ (The Journal of Physics)। মাসিক পত্র।

আজকাল এই সংবাদপত্রখানায়, বাহাতে রুস ইংরেজী লিঙ্গ যুক্ত বাধে, তাহাই দিনরাত্রি লিখিত হইতেছে।

২৮। দি জর্ণাল অব্ ফ্যাশন্স (The Journal of Fashions) ।

২৯। দি রেসিং ক্যালেন্ডার বা আমেচিয়র্স মেগেজিন্ (The Racing Calender or Amateur's Magazin) ।

অন্যান্য স্থান হইতে—

৩০। ওয়ারসা হইতে টাগব্লাট্ (Tagblatt) ।

৩১। ফিন্লণ্ড হইতে ফিন্লণ্ড (Finland) ।

৩২। হেলসিংফর্স হইতে ডাগব্লাড্ (Dagblad) ।

৩৩। লেন্সর্গ হইতে প্রেগলণ্ড (Przegland) ।

৩৪। টফ্লিস্ হইতে কাব্‌কাজ (Kabkaz) । ইহাতে রাজকর্মচারী প্রিন্স্ দণ্ডকফ্ কসাকফের রাজকার্যের বিষয় লিখিত হয় ।

এতদ্ব্যতীত রুসরাজ্যে আরও অনেকগুলি সংবাদপত্র আছে । সকলেই একযোগে একস্থরে ইংরেজের বিরুদ্ধে রুসিয়াকে উত্তেজিত করিতেছে । সকলেরই ইচ্ছা, রুসভল্লুক ব্রিটিশসিংহকে পরাজিত করিয়া ভারত আক্রমণ করুন । আজ কাল এই সকল সংবাদপত্রে যুদ্ধ সম্বন্ধে অনেক অন্যান্য কথা লিখিত হইতেছে ।

পঞ্চদশ অধ্যায় ।

সাধারণ শিক্ষা ।

কৃষক, ক্রীতদাস ও সাধারণ ব্যক্তি এই তিন ভাগে রুসিয়ার প্রজাগণ বিভক্ত । তন্মধ্যে কৃষক ও ক্রীতদাসের সংখ্যা চারি ভাগের তিন ভাগ অপেক্ষাও বেশী । উহারা সকলেই কৃষি ও মজুরের কার্য করে । গবর্নমেন্টে হইতে বিদ্যা-শিক্ষার উৎসাহ পায় না । কেবল কোন কোন স্থলে দুই এক জন পর-হিতৈষী বেসরকারী ধনী ব্যক্তি ঐরূপ লোকদের জন্য নিজ ব্যয়ে বিদ্যালয় স্থাপন করিয়া উহাদিগকে বাহা কিছু শিক্ষা দেন । কিন্তু ঐরূপ হিতৈষী

ধনীদিগের সংখ্যা এত অল্প যে, তদ্বারা শিক্ষা সম্বন্ধে কোন সুফল ফলে না। সুতরাং, রাজ্যের বার আনা অপেক্ষা বেশী লোক চিরমূর্থ। মূর্থের অশেষ দোষ, শিক্ষা দিলেও শিথিতে চায় না। শিক্ষাদাতাকে ঠাট্টা বিদ্রূপ করে। ডাক্তার লায়াল রুসিয়ায় অবস্থানকালে দেখিয়াছিলেন, এক জন ধনশালী ব্যক্তি তাঁহার অধীনস্থ মজুরদিগকে লেখা পড়া শিখাইবার জন্য, ল্যান্ডান-টেরিয়ান্ ধরণের একটি স্থল খুলিয়াছিলেন; কিন্তু সাধারণ লোকে তাঁহাকে উপহাস করিয়াছিল।

ঐ সকল লোকের কথা ছাড়িয়া দিলে সাধারণ বিদ্যা-শিক্ষার চলনটা কেবল ধনী ও ধর্ম-বাজকদের মধ্যে প্রচলিত দেখা যায়। ধনী সম্ভ্রান্তেরা বাড়ীতে শিক্ষক রাখিয়া স্ব স্ব সম্ভ্রানগণকে লেখা পড়া শিখান। দরিদ্র সম্ভ্রান্তেরা সাধারণ শিক্ষাগারে স্ব স্ব সম্ভ্রানদিগকে, বিদ্যা শিক্ষার্থে পাঠাইয়া থাকেন।

সমস্ত রুসরাজ্য সাধারণ শিক্ষা সম্বন্ধে সাত ভাগে বিভক্ত। এক এক ভাগের প্রধান নগরে এক একটি বিশ্ববিদ্যালয় আছে। সেই সকল বিশ্ব-বিদ্যালয় এই;—পিটার্সবর্গ, মস্কাউ, উইল্‌না, ডরপাট, খারকব্, কাজান্ এবং ফিন্লণ্ডের অন্তর্গত হেলসিন্‌ফর্স। এতদ্ব্যতীত পোলণ্ড প্রদেশ রুসিয়ার অন্তর্গত হওয়ায় ওয়ার্সার বিশ্ববিদ্যালয়টি অষ্টম স্থানীয় হইয়াছে। ঐ সকল বিশ্ববিদ্যালয়ে জন্মগ-প্রণালীতে শিক্ষা দেওয়া হয়। ধর্মশাস্ত্র, চিকিৎসা-শাস্ত্র, ব্যবহার-শাস্ত্র (আইন) ও দর্শন-শাস্ত্রের আলোচনা অধিক পরিমাণে হইয়া থাকে। রুসীয় গবর্ণমেণ্টের কঠিন শাসনে অধ্যাপকেরা ছাত্রদিগকে সকল রূপ বিদ্যা শিখাইতে পারেন না। রুসিয়ার যে কয়েক প্রকার বিদ্যার অনুশীলন হয়, তন্মধ্যে চিকিৎসা-শাস্ত্রের ফলই বেশীর ভাগে দেখা যায়। ঐ আটটি বিশ্ববিদ্যালয়ের সহিত সম্বন্ধ রাখিয়া প্রত্যেক বড় বড় নগরে গবর্ণমেণ্টের তরফে এক একটি ব্যায়াম ও প্রাথমিক শিক্ষার বিদ্যালয় আছে। ১৬৭৬ খৃষ্টাব্দে ঐরূপ ধরণের বিদ্যালয়গুলিতে ৪৬০৮ চারি হাজার ছয় শত আট জন অধ্যাপক ও শিক্ষক, ৮০,০০০ আশী হাজার ছাত্র এবং ৮,০০০ আট হাজার ধাত্রী ছিল।

রুসিয়ার ধর্মসম্রাজ্য বিদ্যালয়ের সংখ্যা ১,৪৯৮ এক হাজার চারি শত আটান্বব্বই। উহাতে ছাত্রসংখ্যা প্রায় ৫৫,০০০ পঞ্চাশ হাজার। *এই

হিসাবে ঐ রাজ্যে ধর্ম ও সাধারণ শিক্ষা সম্বন্ধে ১,৫০,০০০ এক লক্ষ পঞ্চাশ হাজারও হয় কি না সন্দেহ। গড়ে প্রতি ৪০০ চারি শত লোকের মধ্যে এক জনের শিক্ষালাভ হয়। কয়েকটি বিশ্ববিদ্যালয়ের অধীনে আরও কয়েকটি বিদ্যালয় আছে। সেখানে কেবল সৈনিক, নাবিক, ইঞ্জিনিয়ার এবং চিকিৎসকেরাই শিক্ষা লাভ করেন। সাধারণ শিক্ষা সচিব এবং রুসীয় গ্রীক ডাইরেক্টিং সাইনট্‌দের অধীনে ব্যায়াম-বিদ্যালয়, ধর্ম-বিদ্যালয়, এবং সাধারণ বিদ্যালয়গুলি চালিত হয়; কিন্তু সাময়িক বিদ্যালয় প্রভৃতি চারি প্রকার বিদ্যালয়ের ভার যুদ্ধ-মন্ত্রী এবং হোম-ডিপার্টমেন্ট-মন্ত্রীর হস্তে থাকে।

রুসীয় আদালতে ফরাসী ভাষা প্রচলিত। যদিও রুসিয়ায় সাধারণের বিদ্যাশিক্ষার চর্চা নাই, কিন্তু বাহারা শিক্ষা করে, তাহারা কেবল নিজের রুসীয় ভাষা নহ্ন, জর্মণ ও ফরাসী ভাষাতেও বেশ বুৎপন্ন হয়।

ষোড়শ অধ্যায় ।

রাজদণ্ড ।

রুসীয় গবর্ণমেন্ট অনেক সময় ইচ্ছা করিয়া গুরুতর দোষীদিগকে ছাড়িয়া দেন। ইহাতে অপকার ভিন্ন উপকার হয় না। ঐ সকল দোষীরা আবার অত্যাচার করে, সুতরাং প্রজাদের বড় ক্ষতি হয়। এক সময়ে রুসিয়ার রাণী এলিজাবেথ ফরাসী পণ্ডিতমণ্ডলীর নিকট প্রশংসা পাইবার জন্য খুনীদিগকেও বিনা দণ্ডে নিষ্কৃতি দিয়াছিলেন। এইরূপ রুসিয়ার অগ্রান্ত্র সম্রাটেরাও কখন কখন করিয়া থাকেন। ইহাতে লোক-সাধারণের নিকট প্রশংসা পাইবার পরিবর্তে অখ্যাতিই লাভ করিয়া থাকেন।

এক দিকে এইরূপ হয়, অল্প দিকে আবার আর এক রূপ। রুসিয়ায় দুই প্রকার ভয়ানক রাজদণ্ড প্রচলিত আছে;—বেত্রাঘাত ও সাইবিরিয়ায় নির্বাসন। বেত্রাঘাত এত কঠিন যে, অনেক সময়ে যন্ত্রণায় অপরাধীদের মৃত্যু পর্যন্ত ঘটয়া থাকে। সাইবিরিয়ায় নির্বাসন, সাধারণ দণ্ডের মধ্যে পরিগণিত; কিন্তু বিচারের দোষে নির্দোষীদিগকেও নির্বাসিত হইতে

হয়। দণ্ডিত ব্যক্তির দুরন্ত সৈনিকদিগের দ্বারা পশুবৎ নিপীড়িত হইয়া পূর্ণ শীতের সময় সাইবিরিয়ায় রাজদণ্ড ভোগ করিতে যায়। বোধ হয়, অনবরত পায়ে হাঁটিয়া এক হাজার ক্রোশ গমন করিলেও তত কষ্ট হয় না, যেত কষ্ট রুসীয় গবর্ণমেণ্টের বেত্নাঘাতে ও অস্ত্রাঘাতে হইয়া থাকে। সাইবিরিয়ায় নির্কাসিত অপরাধীদিগের মধ্যে সৈনিকদের গাড়ীতে অনেক ব্যক্তিকেই পথিমধ্যে হুইলোক ত্যাগ করিতে হয়। একখানা কাপড় দিয়া অপরাধীদের চক্ষু ও মুখ ঢাকা দেওয়া হয়।

মর্টন বলেন, রুস রাজ্যের অন্তর্গত ওডেসা নগরের কারাগারে এক সময়ে রুস গবর্ণমেণ্ট ভয়ানক অত্যাচার করিয়াছিলেন। নিকোলাস বা প্রথম আলেক্সান্ডার বর্ণা আক্রমণের সময় হুকুম দিয়া দুই জন ইংরেজ-চিকিৎসককে ধৃত করিয়া, ওডেসার কারাগারে রাখিয়াছিলেন, পরে তাঁহা-দিগকে দারুণ শীতের সময় সাইবিরিয়ায় নির্কাসন করিয়াছিলেন। ঐ সময়ে উঁহারা পীড়িতাবস্থায় অনাচ্ছাদিত শরীরে ও নগ্ন-পদে তথায় গমন করিয়াছিলেন।

ডাক্তার ক্লার্ক বলেন, যে সময়ে তিনি রুসিয়ায় গিয়াছিলেন, সে সময়ে সম্রাট পল সিংহাসন ভোগ করিতেছিলেন। পল ভয়ানক দুরন্ত ও পাগল রাজা ছিলেন। তিনি জোর করিয়া প্রজাদিগকে সং-সাজার মত পোষাক পরিতে আজ্ঞা করেন। অনেকে উহা পরিধান করিতে অনিচ্ছুক হওয়াতে সাইবিরিয়ায় নির্কাসিত হয়। তা' ছাড়া আরও অনেক ভদ্র ও ইতর লোককেও ঐ দণ্ডভোগ করিতে হইয়াছিল। এই জন্ত কয়েক জন সম্রাট ব্যক্তি ষড়যন্ত্র করিয়া ১৮০১ খৃষ্টাব্দের ১লা মার্চ মেণ্ট পিটার্সবর্গের রাজপ্রাসাদে তাঁহাকে নিহত করিয়াছিল।

সপ্তদশ অধ্যায় ।



রাজদত্ত গৌরব-চিহ্ন ও উপাধি ।

অতীত সভ্য দেশে যেমন রাজোপাধির চলন আছে, রুসিয়াতেও সেইরূপ দেখা যায় । রুসিয়ার রাজোপাধি সমরসংক্রান্ত ব্যক্তিদিগকেই অধিক পরিমাণে দেওয়া হইয়া থাকে । এক জন সিভিলিয়ানের অপেক্ষা এক জন মিলিটারী কর্মচারীর রাজদত্ত উপাধির সম্মান বেশী, এই জন্য সিভিলিয়ানেরাও যুদ্ধসংক্রান্ত কার্য-ভার পাইবার চেষ্টা করেন । রুস গবর্ণমেন্টের এ ফিকির মন্দ নহে । এক উপাধির ভারতম্য দেখাইয়া দেশময় যুদ্ধ-নীতি শিক্ষার বেস্ ফাঁদ পাতিয়াছেন । আমাদের ইংরেজ গবর্ণমেন্ট উপাধি দেওয়া দূরে থাকুক, ভারতবর্ষীয়দিগকে ভলন্টিয়ার করিতে চাহেন না । ইহাতে রাজার রাজ্য-রক্ষার সুবিধা বই অসুবিধা নাই, তবু কেন ইংরেজরাজ ভয় করেন, বলিতে পারি না । যাহা হউক, এই সমর-সঙ্কটের সময় ভারত-বর্ষীয়েরা ইংরেজ গবর্ণমেন্টের ভারতবর্ষের সর্বপ্রধান রাজকর্মচারী লর্ড ডফারিনের নিকট ভলন্টিয়ার হইবার যেন একটু আশা পাইতেছেন । ঈশ্বর আমাদের মনোবাঞ্ছা পূর্ণ করুন ।

ইউরোপীয় ও আসিয়িক রুসিয়া, ফিন্‌লণ্ডের গ্রাণ্ড ডিচি এবং ককেসীয় শাসন-বিভাগ ব্যতীত ৬০ খাটটি গবর্ণমেন্টে বিভক্ত । এই সকলের উপর সুপ্রিম গবর্ণমেন্ট । জার (Czar) উহার সর্বময় হর্তা কর্তা বিধাতা । তিনি যেমন রাজকর্মচারিগণকে নিজে নিযুক্ত করেন, সেইরূপ উপযুক্ত ব্যক্তিদিগকে গৌরবশূচক উপাধিও দিয়া থাকেন ।

ক্রাফ বেলেন, রুসিয়ায় সর্বশুদ্ধ ছয়টি প্রধান অর্ডার (Orders) বা রাজদত্ত সম্মানশূচক উপাধি আছে । ঐ উপাধিগুলির প্রত্যেকের অপর কয়েকটি করিয়া শাখা-উপাধি আছে । রুসীয় সম্রাট ব্যক্তিগণের মধ্যে বাঁহারা রাজদত্ত উপাধি পাইবার যোগ্য, তাঁহারা চতুর্দশ শ্রেণীতে বিভক্ত, ঐ সকল লোক গুণানুসারে 'প্রথম, দ্বিতীয় ও তৃতীয় শ্রেণীর সম্মানপ্রাপ্ত' ইত্যাদি রূপে গণ্য

হইয়া থাকেন। ঐ চতুর্দশ শ্রেণীর প্রথম ৮টির উপাধি বংশানুক্রমিক। উহা নূতন লোকে পায় না। বাকী ৬টি শ্রেণীর উপাধি ব্যক্তিগত; কিন্তু বংশগত নহে। যে সর্বোচ্চ ছয়টির উপাধির কথা বলা হইল, উহার প্রথম ও দ্বিতীয়টি কেবল রাজের উচ্চদরের কর্মচারীরাই পাইয়া থাকেন। এই দুইটি উপাধির প্রথমটি বাঁহাকে দেওয়া হয়, তাঁহাকে “হাই এক্সেলেন্সি” (High Excellency), এবং দ্বিতীয়টি বাঁহাকে দেওয়া হয়, তাঁহাকে কেবল “এক্সেলেন্সি” (Excellency) গৌরবার্থভূচক শব্দ প্রয়োগে সম্বোধন করিতে হয়। অবশিষ্ট উপাধিধারিগণের গৌরব-ভূচক সম্বোধন শব্দ “নোবল্‌নেস্” (Nobleness)। যে ব্যক্তি যেরূপ রাজদত্ত উপাধিধারী, তাঁহাকে পত্র লিখবার সময় সতর্ক হইয়া পত্রের শিরোনামে ও সম্বোধনপদে উপাধির সেইরূপ কথাগুলি লিখিয়া দিতে হয়। ডাক্তার লায়ালের “রুস-ভ্রমণ” পুস্তকের (২য় খণ্ড) ৪৫০ পৃষ্ঠায় লিখিত আছে যে, এক সময়ে রুসিয়ার পোষ্ট অফিস-গুলিতে চিঠিপত্র গ্রহণের বিষয় কায়দা ছিল। যে লোকের নামে পত্র লিখিত হইত, যদি উহাতে তাহার উপাধি (Title) না থাকিত, তাহা হইলে কোন পোষ্ট অফিস ঐ পত্র গ্রহণ করিত না। সে দিন এখন আর নাই।

ডাক্তার ক্লার্ক (L. L. D.) সাহেবের মতে রুসিয়ার সর্বোচ্চ দরের ছয়টি রাজদত্ত উপাধি (Orders) আছে, কিন্তু ডাক্তার রাজা স্যার শেরীল্ল-মোহন ঠ কুর (Kt. Mus. Doc.) প্রণীত “অর্ডারস্ অব্ নাইটহুড্” (Orders of Knighthood) নামক পুস্তকের ২য় খণ্ডে লিখিত আছে যে, তথায় নয়টি সর্বোচ্চ রাজদত্ত উপাধির প্রচলন দেখা যায়। সেই নয়টি উপাধি (Orders) এই;—১, সেন্ট এণ্ড্রু উপাধি (Order of St. Andrew); ২, সেন্ট ক্যাথারাইনের উপাধি (Order of St. Catherine); ৩, আলেক্সান্ডার নিউস্কির উপাধি (Order of Alexander Nevsky [বা Nevskoi]); ৪ সেন্ট এনের উপাধি (Order of St. Ann); ৫, সেন্ট জর্জের সামরিক উপাধি (Military Order of St. George); ৬, সেন্ট ব্রডিমিরের উপাধি (Order of St. Vladimir); ৭, সেন্ট জনের উপাধি (Order of St. John); ৮, সেন্ট ইগলের উপাধি (Order of the White Eagle) এবং ৯, সেন্ট টানিস্লেবের উপাধি (Order of St.

Stanislaus)। এই সকল উপাধিধারীরা সচরাসর “নাইট” (Knight) বলিয়া অভিহিত হন।

নিম্নে ঐ ছয়টি উপাধির বিশেষ বিবরণ দেওয়া যাইতেছে ;—

রুস সম্রাট সমস্ত রুসীয় উপাধির গ্রাণ্ড্‌ মাস্টার, কিন্তু “সেন্ট ক্যাথারাইন্” উপাধিটি কেবল স্ট্রোলোকবের জন্য বলিয়া তিনি উহার গ্রাণ্ড্‌ মাস্টার নন। রুসিয়ার গ্রাণ্ড্‌ ডিউকগণ স্বষ্ট্যর্থে দীক্ষিত হইবার সময় “সেন্ট এণ্ড্‌”, “আলেক্সান্ডার নিউস্কি”, “হোয়াইট্‌ (শ্বেত) স্ট্রগল” এবং “সেন্ট এন্” উপাধি নাইট (Knight) হন। অন্যান্য রাজবংশীয়েরা নির্দ্বিগত হইয়া ঐ সকল উপাধি পাইয়া থাকেন। গ্রাণ্ড্‌ ডচেসেরা স্বষ্ট্যর্থে দীক্ষিত হইবার সময় “সেন্ট ক্যাথারাইন্” উপাধি পান, কিন্তু অন্যান্য ডচেসেরা বেশী বয়স না হইলে পান না।

“সেন্ট এণ্ড্‌” উপাধিধারী নাইটগণের নির্দ্বিগত অনুসার উপাধিদান-সভার এক জন চ্যান্সলর নিযুক্ত হন। তা ছাড়া ঐ সভায় এক জন ধনাধ্যক্ষ এবং এক জন কার্যাব্যক্ষ থাকেন। ঐ তিন জন কর্মচারী রাজসভা হইতে নির্দ্বিগত হন। উহাদের দ্বারা উপাধিদান-সভার সমস্ত কার্যের নিয়মাবলী নির্দ্ধারিত হয়। ঐ উপাধিদান-সভা (Chapter) একটি মহৎ কার্যে ব্রতী। উহার ২,০০,০০০ টুই লক্ষ রুবলের একটি ফণ্ড আছে। সেই অর্থ হইতে সেন্ট পিটার্সবর্গের রাজকীয় বিদ্যালয়ে দরিদ্র রাজবংশীয়া বালিকারা বিদ্যা শিক্ষা করিয়া থাকেন। তা ছাড়া অন্যান্য দরিদ্র সম্রাট-বংশীয়া নারীরাও সেখানে শিক্ষিতা হন। রুসরাজ্যে এই মহৎ কার্যের প্রতিষ্ঠাতা।

যে সকল মেম্বরের বংশগত মর্যাদা আছে, তাঁহাদিগকে ব শাসুক্রমিক উপাধি দেওয়া হয় ; কিন্তু ক্ষত্রীতদাসগণকে ব্যক্তিগত উপাধি দেওয়া যায়। বাসকারগণ ব্যক্তিগত সম্মানসূচক উপাধি প্রাপ্ত হন। রুসীয় সপ্তদশবৎসর ১৮৩১ খৃষ্টাব্দে ১০ই এপ্রিল হইতে বংশগত উপাধি পাইয়া আসিতেছেন।

যে সকল উপাধিধারীরা মসহরা (পেন্সন) পান, তাঁহাদের সংখ্যা সীমাবদ্ধ। ষাঁহাণ মসহরা পান না, তাঁহাদের সংখ্যা অপেক্ষাকৃত বেশী। প্রত্যেক উপাধিযোগ্য ব্যক্তিকে উপাধির বেশী অনুসারে অর্থ দিয়া উপাধি লাভ করিতে হয়। উহাদের প্রদত্ত অর্থ রুসিয়ার খাজনাখানার জমা হয়।

সেই টাকা আবার দুর্বল ও অকর্মণ্য রাজকর্মচারীদের ভরণ পোষণ জন্য ব্যয়িত হয়। বৈদেশিক, মার্কেসীয় এবং অপরাপর যাঁহারা উপাধি-পদক প্রাপ্ত হন, তাঁহাদিগকে আর রাজকর দিতে হয় না।

প্রতি বৎসর ৮ই নবেম্বর “সেন্ট মাইকেলের দিন” (St. Michael's day) নামক পর্বাহে উপাধিদানের সাধারণ সভা হয়। সেই দিন সেন্ট-পিটার্সবর্গ ও মস্কাউ নগরনিবাসী নাইটগণ প্রত্যেক উপাধির জন্য ছয় জন মেম্বর নির্বাচন করিয়া কার্য-নির্বাহক সভার হস্তে তাঁহাদের ভার্য্যপণ করেন।

সাইবিরিয়া ও সার্কেসিয়া প্রদেশে যে সকল রাজকর্মচারী অন্ততঃ পাঁচ বৎসর কাল বিশেষ গুণের সহিত কার্য করেন, তাঁহারা স্ব স্ব গুণানুসারে উপাধি পান। সৈন্যসংক্রান্ত কর্মচারীরা অন্ততঃ পনের বৎসর কার্য না করিলে কোনরূপ উপাধি পান না। রাজকার্যের শ্রেণী অনুসারে প্রত্যেক মেম্বরের উপাধিরও শ্রেণী আছে।

এক বারেই কোনও ব্যক্তি সর্বোচ্চ উপাধি পাইতে পারেন না। প্রথমে নিম্ন দরের উপাধি, পরে উচ্চ দরের উপাধি-পদক প্রাপ্ত হন। কিন্তু সময়ে সময়ে এ নিয়ম খাটে না। উপাধিপ্রাপ্ত লোকেরা অপরাধ বা অপমানের কার্য করিলে, তাঁহাদের নিকট হইতে উপাধি-পদক ও সনন্দ ফিরিয়া লওয়া হয়। যে সকল রাজকর্মচারী ও ধর্ম-যাজক কার্যদোষে পদচ্যুত হন, তাঁহারাও আর উপাধির অধিকারী থাকিতে পারেন না।

সেন্ট পিটার্সবর্গের বিজ্ঞান-বিদ্যা-মন্দির হইতে প্রতি পাঁচ বৎসরে উপাধি-পদক ও উপাধি-সনন্দ-প্রাপ্ত মেম্বরগণের একখানি পুরা তালিকা প্রকাশিত হয়।

উপাধির অর্ডার (Order) এবং পদক (Medal) ভিন্ন রুসিয়ার সম্রা-নের আরও কএকটি অলঙ্কার প্রভৃতি উপাধি-চিহ্ন আছে। যুদ্ধসংক্রান্ত উপযুক্ত অফিসার ও জেনেরলদিগকে স্বর্ণ ও হীরকমণ্ডিত তরবারি দেওয়া হয়। উহাতে “টু করেজ” (To courage) শব্দটি লেখা থাকে। কখন কখন ঐ সকল ব্যক্তিকে এক একটি গৌরবশূচক পদও দেওয়া যায়।

রুস-সম্রাজ্ঞীর সহচরীরা (Ladies in waiting) তাঁহার প্রতিমূর্তি-শোভিত হীরক-মণ্ডিত এক প্রকার অলঙ্কার ধারণ করেন। সভ্যা রমণীরা

(Court Ladies) সাধারণতঃ সম্রাজ্ঞীর নাম-স্বাক্ষরিত হীরকমণ্ডিত পদক ব্যবহার করিয়া থাকেন । ঐ সকল অলঙ্কার (Decorations) এবং পদক (Medals) নীল রঙের ফিতায় বাঁধিয়া অঙ্গে ধারণ করিতে হয় ।

১৮৩৪ খৃষ্টাব্দের মার্চ মাসে রুস-সম্রাট্ এবং সম্রাজ্ঞীর আদেশানুসারে ভিন্ন ভিন্ন উপাধিদারী ও উপাধিদারীগণের যেরূপ মসহরার হার নির্দ্ধারিত হইয়াছিল, তাহা নিম্নে প্রদর্শিত হইল ;—

১।	সেন্ট্ এণ্ড্রু নাইটগণ	...	৮০০ হইতে ১০০০	রুবল
২।	„ ক্যাথারাইন (১ম শ্রেণী)	...	৩৫০ „ ৪৬০	„
৩।	„ „ (২য় শ্রেণী)	...	৯০ হইতে ১৩০ বা ২০০	„
৪।	„ আলেক্সান্দার নিউস্কি	...	৫০০ হইতে ৭০০	„
৫।	„ জর্জ	...	১৫০,২০০,৪০০ বা ১০০০	„
৬।	„ ব্রডিমির	...	১০০,১৫০,৩০০ বা ৬০০	„
৭।	„ এন্ (১ম শ্রেণী)	...	২০০ হইতে ৩৫০	„
৮।	„ „ (২য় শ্রেণী)	...	১২০ „ ১৫০	„
৯।	„ „ (৩য় শ্রেণী)	...	৯০ „ ১০০	„
১০।	„ „ (৪র্থ শ্রেণী)	...	৪০ „ ৫০	„
১১।	„ স্ট্যানিস্লেয়স্	...	৮৬,১১৫ বা ১৪৩	„

যে সকল বিদেশীয় যোক রুস সরকারে কার্য করেন, তাঁহারা কেবল উপাধি-ভূষণ পান, মসহরা পান না । ব্রডিমির নাইটগণের সংখ্যা ৬০ । ঐ ৬০ জনের বাৎসরিক মসহরা ১,৫৮,৬৬০ রুবল ।

সেন্ট্ এণ্ড্রু উপাধি ।

(THE ORDER OF ST. ANDREW.)

১৬৯৮ খৃষ্টাব্দের ২০এ ডিসেম্বরে পিটার দি গ্রেট্ কর্তৃক এই উপাধি স্থাপিত হইয়াছিল । ইউরোপের অন্যান্য সভ্য রাজসভার সহিত স্বীয় রাজসভার গৌরববৃদ্ধি এবং ভুরস্কের সহিত স্বীয় রাজ্যস্থ সম্রাটগণের উৎসাহ বর্জন জন্য পিটার দি গ্রেট্ এই উপাধি প্রচলন করিয়াছিলেন ।

সেন্ট এণ্ড্রু রুস-সাম্রাজ্যের পরম দ্বিতীয় মহাপুরুষ। মোস্কভী ৭ ন-
শ্রুতি অনুসারে জানা যায় যে, সেন্ট এণ্ড্রু, নাগাব্‌নিবাসী সু্যাতোনীয়দের
নিকট সর্বপ্রথম খৃষ্টধর্ম প্রচার করিয়াছিলেন। এই জন্য তাঁহার গৌরবর্ধ
তন্ম্যে এই উপাধি সৃষ্টি হয়। সেন্ট এণ্ড্রু উপাধি রুসসাম্রাজ্যের সর্বশ্রেষ্ঠ
সম্মানসূচক। সম্রাটের বিশেষ অনুগ্রহ না হইলে এই উপাধি কেহই পায়
না। এই উপাধির সহিত আলেক্সান্ডার নিউস্কি, সেন্ট এন্ এবং সেন্ট
ষ্টানিস্লেয়স্ উপাধিও একত্রে প্রদত্ত হয়।

“সেন্ট এণ্ড্রু” উপাধিলাভার্থী নাইটকে ২৪০টি রৌপ্য রুবল ফৌ দিতে
হয়। এই উপাধিধারী দ্বাদশ জন সাধারণ মেম্বর এবং তিন জন পাদরী
মেম্বর বাৎসরিক ৬,০৯২ রুবল মসহারা ভোগ করেন।

এই উচ্চতম উপাধির পদক বা ভূষণ অনেক দিন ধরিয়া অনেক রকমের
হইয়া আসিতেছিল, কিন্তু এক্ষণে ইহার আকার ক্রেশের ন্যায় হইয়াছে।
সেই ক্রেশপেটের উপরে নীল মিনা নির্মিত সেন্ট এণ্ড্রুর প্রতিমূর্তি। সেন্ট
এণ্ড্রুর উভয় হস্তে “*Sanctus Andreus Protector Russie*” পদাঙ্কিত
বাণ্যগুলির প্রথম অক্ষর *S. A. P. R.* লিখিত। তা ছাড়া তিনটি রাজকুটের
সহিত সাম্রাজ্যের ঈগল পক্ষীর উপর, সেই মূর্তি সংস্থাপিত। আশমানী ও
নীল রঙের চওড়া ফিতা দক্ষিণ স্কন্ধ হইতে বাম দিকের উরুসন্ধি পর্য্যন্ত
উত্তরীয়ের ন্যায় ঝুলিয়া, তত্পরি এই পদক ব্যবহার করিতে হয়।

সেন্ট এণ্ড্রু ক্রেশধারী নাইটগণের তত্ত্বাবধায় সাজ মঞ্চমলের এক
প্রকার ঝোঁকা আছে, কোন উৎসবের সময় বা নিমন্ত্রণ-সভায় এই পদক
বক্ষোলম্ব করিয়া গমন করিলে সেই গৌরব-পরিচ্ছদ পরিধান করিতে হয়।
তা ছাড়া তাঁগাদের বক্ষোদেশের দক্ষিণাংশে আর একটি স্বর্ণক্ষতপদক
থাকে। সেই পদকের উপর সাম্রাজ্যের দুইটি ঈগল পক্ষী অঙ্কিত এবং রুস
ভাষায় “বিশ্বাস ও রাজভক্তির জন্ত” পদটি লিখিত থাকে।

সেন্ট ক্যাথারাইনের উপাধি।

(THE ORDER OF ST. CATHERINE.)

১৭১৪ খৃষ্টাব্দের ৭ই ডিসেম্বর পিটার দি এট্ কর্তৃক এই উপাধি সৃষ্টি
হইয়াছিল। এই উপাধির দুইটি শ্রেণী আছে। রাজপরিবারস্থ নারীগণ

ব্যতীত, কেবল অপর দ্বাদশটি সম্রাটবংশীয়া রমণীর ভাগ্যে এই উপাধি ঘটিয়া থাকে ।

সেন্ট ক্যাথারাইন উপাধির দ্বিতীয় শ্রেণীর পদক বিদেশীয় উচুপদস্থা রমণীরা পাইয়া থাকেন । উহার সংখ্যা ৯৪টি । তা ছাড়া রাজবংশীয়া নারীরাও এই উপাধি পাইয়া থাকেন ।

এই উপাধি-পদকের আকার অষ্টকোণবিশিষ্ট নক্ষত্র । ইহার মধ্যস্থল লোহিত বর্ণ । মধ্যস্থলে রুসীয় রাজমুকুট অঙ্কিত আছে । রাজমুকুট বেঠন করিয়া পতিপাণ্য শ্লোক (Motto) লিখিত থাকে । বামবক্ষে এই উপাধি-পদক ধারণ করিতে হয় ।

রুসীয় আইনানুসারে এই উপাধিধারিণী স্ত্রীলোকেরা প্রত্যহ ঈশ্বরের নিকট প্রথম শিটারের যুক্তি এবং রাজপরিজনের সহিত বর্তমান সম্রাটের কুণল প্রার্থনা করেন । এই সকল নারী স্ন স্ন বায়ে অসভ্যদিগের হস্ত হইতে স্বষ্টাশ্রাবলম্বিগণকে উদ্ধার করেন । সেন্ট ক্যাথারাইন ইন্সটিটিউশনের কার্য-নির্বাহ-ভার এই সকল নারীদের হস্তে অর্পিত হয় ।

প্রতি বৎসর ২৫এ নবেম্বর এই উপাধির বাৎসরিক উৎসব হয় ।

আলেকজান্ডার নিউস্কির উপাধি ।

(THE ORDER OF ALEXANDER NEWSKY.)

এক সময়ে রুসিয়ার অন্তর্গত নবগরদ নগর ইয়ারোস্লাব পুত্র আলেকজান্ডারের অধীনে ছিল ।

১২৪০ খৃষ্টাব্দে নবগরদ নগর লইয়া আলেকজান্ডারের সহিত সুদি, ফিন্, সুইড এবং লিভোনীয় ও জর্মণ নাইট্ গের যুদ্ধ ঘটে । সুইড গণ বলপূর্বক নিভা নদার নিকট পরাস্ত প্রবেশ করিয়াছিল । কিন্তু ইয়ারোস্লাব পুত্র আলেকজান্ডার ভয়ানক যুদ্ধ করিয়া তাহাদিগকে তাড়াইয়া দিয়াছিলেন । এই বীরত্ব প্রদর্শনের জন্ত সে সময়ে তিনি রুসগণের নিকট “নিউস্কি” (Newsky) এই নব নাম প্রাপ্ত হইয়াছিলেন ।

পিটার দি গ্রেট নিভা নদীর তীরে নব রাজধানী সেন্ট পিটার্সবার্গ নগর স্থাপনের সময় এই মহাপুরুষের নাম চিরস্মরণীয় করিবার জন্ত ইচ্ছুক হইয়া-

ছিলেন। নিউস্কির নামে তিনি একটি উপাধি সৃষ্টি করিতে চেষ্টা করিয়াছিলেন, কিন্তু মনের চেষ্টা কার্যে পরিণত করিবার পূর্বেই তাঁহার মৃত্যু হইয়াছিল। যাই হোক, তাঁহার পত্নী রাণী ক্যাথারাইন্ স্বামীর ইচ্ছা পূর্ণ করিয়াছিলেন। ক্যাথারাইন্ এই উপাধি সৃষ্টি করিয়া তদীয় সর্বশ্রেষ্ঠ বন্ধু মেন্সিকফকে সর্বাগ্রে ইহা দ্বারা গৌরবিত করিয়াছিলেন। এই উপাধি-দান-কার্য ১৭২৫ খৃষ্টাব্দের ১৮ই এপ্রিলে হইয়াছিল।

আলেক্সান্দার নিউস্কির উপাধিপদক লাল মিনা করা অষ্ট কোণাকার। প্রত্যেক কোণে এক একটি করিয়া সুবর্ণ ঈগল পক্ষী উপবিষ্ট। ইহার মধ্য-ভাগে শাদা মিনার কার্য। সে স্থানে অশ্বপৃষ্ঠে সেন্ট আলেক্সান্দার নিউস্কির প্রতিমূর্তি। রুস-ভাষায় পদকের প্রতিপাদ্য শ্লোক “আমাদের পিতৃ-ভূমির গুণজ্ঞাত” লিখিত থাকে।

সিভিল ও মিলিটারী উভয় শ্রেণীতেই এই উপাধি বর্তে। ইহার আর শ্রেণীবিভাগ নাই। সামরিক বিষয় সম্বন্ধে যাহারা মেজর-জেনারেল (Major-General), তাহারাই এই উপাধি প্রাপ্ত হন।

এই উপাধিপ্রাপ্ত নাইটের-সংখ্যা কেবল বার জন। উহার মধ্যে পাঁচ জন পাদরী ও সাত জন অপর মেম্বর। এই বার জন নাইট বৎসরে ৭০১৪ রুবল ও ৮ কোপেক বৃত্তি পান।

৩০এ সেপ্টেম্বর এই উপাধির সাম্বৎসরিক উৎসব হয়।

সেন্ট এনের উপাধি ।

(THE ORDER OF ST. ANN.)

এই উপাধি পূর্বে হলষ্টইন্ সুন্দুইগ্ পরিবারের ছিল। সম্রাজ্ঞী এন্ এবং তৃতীয় পিটারের কন্যা ডচেস্ এন্ পেট্রোনার সম্মানার্থ ডিউক্ চার্লস্ ফ্রেডরিক্ কর্তৃক (১৭৩৫ খৃষ্টাব্দের ১৪ই ফেব্রুয়ারি) কীল (Kiel) নগরে সৃষ্ট হইয়াছিল।

প্রথমে এই উপাধির একটি শ্রেণী ছিল, ও পনের জন নাইট এই উপাধি-পদক পাইতেন। এই উপাধির সৃষ্টিকর্তা চার্লস্ ফ্রেডরিকের পুত্র সম্রাট তৃতীয় পিটার রুসিয়ায় এই উপাধি আনয়ন করেন। রুস-সম্রাজ্ঞী দ্বিতীয়

ক্যাথারাইনের রাজত্বকালে গ্রাণ্ড্ ডিউক্ এই উপাধির বিতরণকর্তা ছিলেন। এই গ্রাণ্ড্ ডিউক্ই পরে সম্রাট প্রথম পল্ নাম ধারণ করেন। ১৭৯৬ খৃষ্টাব্দে সম্রাট পল রাজসিংহাসনে আরোহণ করিয়া হলষ্টীন্-স্লেস্‌উইগ্ পরিবারের এই উপাধিকে রুসীয় উপাধি বলিয়া ঘোষণা করিয়া দেন। পূর্বে ইহার শ্রেণী-বিভাগ ছিল না, কিন্তু সম্রাট পল্ কর্তৃক বিদেশীয় ও দেশীয়দের জন্য ইহা তিন শ্রেণীতে বিভক্ত হইল। আরও তিনি আদেশ দিলেন যে, সেন্ট্ এণ্ড্রু উপাধিপদকধারীরা সেন্ট এনের উপাধি-পদকও ব্যবহার করিতে পারিবেন।

১৮১৫ খৃষ্টাব্দে সম্রাট প্রথম আলেক্সান্দার আবার ইহাতে চতুর্থ শ্রেণী যোগ করিলেন। ঐ শ্রেণী কেবল সামরিক লোকদের জন্য হইল। চতুর্থ শ্রেণীর মেম্বরেরা স্ব স্ব তরবারির মুষ্টিস্থানে উপাধিপদক ব্যবহার করিবার আদেশ পাইলেন।

১৩ ই ও ১৪ ই ফেব্রুয়ারি এই উপাধির বাৎসরিক উৎসব হয়।

এই উপাধিপদকের মধ্যস্থলে সেন্ট্ এনের নামের আদ্য অক্ষর ও নক্ষত্র অঙ্কিত থাকে। ইহার প্রতিপাদ্য শ্লোক “ঈশ্বরভয়, ন্যায় ও বিশ্বাসের বন্ধুগণের প্রতি” (Amant. just. piet. fidem.)।

যে সকল বিদেশীয় ব্যক্তি রুসীয় রাজসরকারে কার্য করেন না, অথচ উপযুক্ত, “সেন্ট্ এন্” উপাধি বেশীর ভাগ তাঁহাদিগকেই দেওয়া হইয়া থাকে।

সেন্ট জর্জের সাময়িক উপাধি।

(THE MILITARY ORDER OF ST. GEORGE.)

১৭৬৯ খৃষ্টাব্দের ২৬এ নবেম্বরে (কেহ কেহ বলেন, ৭ই ডিসেম্বরে) রুসসম্রাজ্ঞী দ্বিতীয় ক্যাথারাইন্ কর্তৃক এই উপাধি সৃষ্ট হয়। সৈন্য ও নৌবিভাগীয় উপযুক্ত কর্মচারিগণকে গুণের পুরস্কার দিবার জন্য এই উপাধির সৃষ্টি। ইহা চারি শ্রেণীতে বিভক্ত। উন্নয়নে মেজর জেনেরেলরাই কেবল প্রথম ও দ্বিতীয় শ্রেণীর নাইট্ হইতে পারেন। তৃতীয় ও চতুর্থ শ্রেণীর পদক কেবল কর্নেলদের প্রতিই বর্তে।

সেন্ট জর্জ উপাধি পাইবার নিমিত্ত কাহাকেও কী দিতে হয় না। এই উপাধিধারিগণের সর্বশুদ্ধ বার্ষিক রুতি ১০৯১ রুবল।

যে দিবস এই উপাধি স্বেচ্ছা হয়, প্রতি বৎসর সেই দিবস ইহার উৎসব হইয়া থাকে। উৎসবের সময় কেবল জেনেরেলদিগকে সমপরিচ্ছদে উপস্থিত হইতে হয়, অন্যান্য মেম্বরদের পক্ষে সে নিয়ম নাই।

সেন্ট ব্লাডিমিরের উপাধি।

(THE ORDER OF ST. VLADIMIR.)

১৭৮২ খৃষ্টাব্দের ২২এ সেপ্টেম্বর (কাহার কাহার মতে ৪ঠা অক্টোবর) মহারাজা দ্বিতীয় ক্যাথারাইন, তাঁহার সাম্বৎসরিক রাজ্যাভিষেক মহোৎসবের সময়ে মহাপুরুষ ব্লাডিমিরের নাম স্মরণার্থ এই উপাধির সৃষ্টি করেন। ব্লাডিমির ৯৭৬ খৃঃ অব্দে রুসিয়ার খৃষ্টধর্ম প্রচার করিয়া রুসদের নিকট ধর্ম-প্রচারক (Apostle) আখ্যা প্রাপ্ত হইয়াছিলেন। সম্রাট প্রথম পল তাঁহার রজত্ব সময়ে এই উপাধির প্রথা উঠাইয়া দিয়াছিলেন। কিন্তু তাঁহার পুত্র আলেকজান্ডার সেন্ট জর্জ উপাধির সহিত পুনর্ব্বার ইহা প্রচার করিয়া যান।

যে সকল ব্যক্তি দেওয়ানী ও মুকবিষয়ে এবং সাহিত্য শিল্প ও বিজ্ঞানে বিশেষ পরাকাষ্ঠা লাভ করেন, তাঁহাদিগকে এই উপাধি অর্পিত হয়। এই উপাধি চারি শ্রেণীতে বিভক্ত। প্রতি বৎসর উপাধিদান-সভা হইতে একদিন এই উপাধি বিতরিত হয়। এই উপাধিপদকে হীরকাদি মণ্ডিত থাকে না। সেন্ট-ব্লাডিমির-উপাধি-পদকের এক পৃষ্ঠে এই উপাধি সৃষ্টির তারিখ রুসীয় ভাষায় লিখিত থাকে। প্রথম ও দ্বিতীয় শ্রেণীর উপাধিধারীরা বেশীর ভাগ দক্ষিণ বক্ষে একটি নক্ষত্র-চিহ্ন ব্যবহার করিতে পারেন। বক্ষের মধ্যস্থলে ৪খানি পত্রে (S, R, K, W.) অর্থাৎ সেন্ট ব্লাডিমির দি এপসোল লিখিত থাকে। উপাধি-পদকের মধ্যস্থলস্থ বেস্ত্রীতে রুস ভাষায় লিখিত থাকে—“উপযোগিতা সম্মান ও গৌরব”। ২৭এ সেপ্টেম্বর এই উপাধির বার্ষিক উৎসব হয়। যদি এই উপাধিধারী কোন নাইটের মৃত্যু হয়, তাহা হইলে তাঁহার বিধবা পত্নী স্বামীর মৃত্যুর পর এক বৎসর কাল পুরা মসহরা পান।

সেন্ট জনের উপাধি।

(THE ORDER OF ST. JOHN.)

১৭৭৬ খৃষ্টাব্দে প্রথমতঃ পোলণ্ডে এই উপাধির সৃষ্টি হয়। প্রথম পলের সময় হইতে প্রবর্তিত হইয়া এক্ষণে দুই শ্রেণীতে বিভক্ত হইয়াছে। এক শ্রেণী গ্রীক চার্চ এবং অপর শ্রেণী রোমান ক্যাথলিক ধর্মাবলম্বীদের জন্য। এক্ষণে প্রথম শ্রেণীর উপাধিধারী নাইটের সংখ্যা ৯৮টি, কিন্তু পূর্বে ৩৯৩টি ছিল। তাহা ছাড়া এতৎ সম্বন্ধীয় গ্রাণ্ড ক্রসের নাইটের সংখ্যা ৩২টি পর্যন্ত হইত।

শ্বেত ঈগলের উপাধি।

(THE ORDER OF THE WHITE EAGLE.)

চতুর্থ রুডিমিরের সময়ে জর্জ অসিলিন্‌স্কি সাধারণ তত্ত্বের পোলণ্ড রাজ্যের চ্যান্সেলার ছিলেন। তিনি টেনেক্‌জিনের সেনারি (seignory) প্রাপ্ত হইয়া আপনাকে কাউন্ট বলিয়া পরিচিত করিয়াছিলেন। সেই সময়ে তিনি রুসিয়ার সম্রাট এবং পোপকে অনুরোধ করিয়াছিলেন যে, তাঁহার। তাঁহাকে কুমার (Prince) বলিয়া অভিহিত করেন। যাই হউক, তিনি এই উপাধি পাইতে না পাইতেই আপন ইচ্ছায় ‘নিষ্কলঙ্ক কুমারী’ (Immaculate Virgin) নামে একটি উপাধি সৃষ্টি করিলেন। ১৬৩৪ খৃষ্টাব্দে অষ্টম পোপ আর্কান এই উপাধির ব্যবস্থা অধিকতর পাকা করিলেন। এক্ষণে এই উপাধি “শ্বেত ঈগলের উপাধি” (Order of the White Eagle) নামে প্রচলিত হইয়া আসিতেছে। ইহার কেবল একটি শ্রেণী আছে।

এই উপাধির সনন্দ পত্র সর্বদা জার কর্তৃক স্বাক্ষরিত হয়। রুসদের জন্য রুসীয় ভাষায় এবং পোলদের জন্য পোল এবং রুসীয় উভয় ভাষায় এই সনন্দ লিখিত হইয়া থাকে। অন্যান্য রুসীয় উপাধিগুলি কেবল খৃষ্ট ধর্মাবলম্বীদিগকে প্রদত্ত হইয়া থাকে; কিন্তু এই উপাধি অন্যান্য ধর্মাবলম্বীরাও পাইয়া থাকেন। পারস্যিয়ার শাহ এবং অন্যান্য প্রাচ্য রাজারা রুস সম্রাটের নিকট হইতে এই উপাধি পাইয়াছেন। এই উপাধির ফী ১৫০ রুবল।

সেন্ট ষ্টানিস্লেয়সের উপাধি ।

(THE ORDER OF THE ST. STANISLAUS.)

১৭৬৫ খৃষ্টাব্দের ৭ই মে ষ্টানিস্লেয়স্ অগষ্টস্ পনিয়াটস্কি, তাঁহার বন্ধু এবং সিংহাসনাধিকারীদিগের জন্য এই উপাধির সৃষ্টি করেন। তিনি তদীয় রাজ্যের পরম হিতৈষী মহাপুরুষ সেন্ট ষ্টানিস্লেয়স্ এবং আপনার নামে ইহা প্রচলিত করেন। এই উপাধির নাইট সংখ্যা ১০০ শত নির্দ্ধারিত আছে। ইহা ছাড়া বিদেশীয়েরাও এই উপাধি স্বতন্ত্র পাইয়া থাকেন। ইহা তিন শ্রেণীতে বিভক্ত। শ্রেণী অনুসারে নাইট গণকে, ২০।৩০ বা ১৫ রুবল ফী দিতে হয়। প্রথম শ্রেণীর ৩০ জন, দ্বিতীয় শ্রেণীর ৬০ জন, তৃতীয় শ্রেণীর ৯০ জন নাইট্ ১৪২, ১১৪ এবং ৮৫ রুবল বাৎসরিক বৃত্তি পাইয়া থাকেন। যাহারা যখন নিম্ন শ্রেণী হইতে উচ্চ শ্রেণীতে উত্তীর্ণ হন, তখন উচ্চ শ্রেণীর বৃত্তি পাইবার মধ্যসময়ের মধ্যে কোনরূপ বৃত্তি পান না। যে সকল উপাধিধারী সন্ন্যাস আশ্রম গ্রহণ করেন, তাঁহারা আর বৃত্তি পান না। উপাধিধারীদের বিধবারা স্বামীর মৃত্যুর পর এক বৎসর কাল পুরা মসহারা পাইয়া থাকেন। উপাধিধারীর মৃত্যু হইলে উপাধি-পদক অবশ্যই সম্রাটকে ফিরাইয়া দিতে হয়; না দিলে উহার মূল্য ফেরত দিতে হয়। ২৩ এ এপ্রেল, বা ৭ই মে এই উপাধির বার্ষিক উৎসব হয়।

গত ২০ এ এপ্রেল সেন্টপিটার্সবর্গের “সেন্টপিটার্সবর্গার জীটজ্” নামক সংবাদপত্রে লিখিত হইয়াছে, বর্তমান রুস সম্রাট তৃতীয় আলেকজান্দার, জেনারেল কমারকের নিকট সেন্ট জর্জ্ উপাধির অনেকগুলি পদক (Crosses) পাঠাইয়াছেন। তাঁহার যে সকল সৈন্য খুব নদী-তটে আফগান-দিগের সহিত যুদ্ধকালে যৎপরোনাস্তি বীরত্ব দর্শাইয়াছে, তাহাদিগকে ঐ পদকগুলি দেওয়া হইবে। তা ছাড়া রুস-সেনাপতিকে বলা হইয়াছে, অন্ত্যাত্ম বীরগণের নাম লিখিয়া শীঘ্রই যেন সম্রাটের নিকট পাঠান হয়। জেনারেল কমারফ আফগান-যুদ্ধে জয়লাভ করিতে, সম্রাট সন্তুষ্ট হইয়া তাঁহাকে একখানি হীরকমণ্ডিত তরবারি পারিতোষিকস্বরূপ প্রদান করিয়াছেন। তাহার পর তারের সংবাদে জানা গিয়াছে যে, এই সকল পারিতোষিক-প্রদান-ব্যাপার সমাধা হইয়া গিয়াছে।

অষ্টাদশ অধ্যায় ।

ব্যবহারিক শিল্প (INDUSTRIAL ART) ; স্থপতি (ARCHITECTURE) ; ভাস্করীয় কার্য (SCULPTURE) ; সূক্ষ্মশিল্প (FINE ART), ইত্যাদি । •

রুসসাম্রাজ্যে ব্যবহারিক শিল্পের অভাব নাই। নিম্নে কয়েকটি প্রসিদ্ধ স্থানের বিবরণ সহ উহার দৃষ্টান্ত দেওয়া গেল।

সেন্ট পিটার্সবর্গ ।

এই মহানগর রুসিয়ার রাজধানী। সুইডেনের অধিপতি একাদশ চার্লসের সময় কতকগুলি সুইড্‌সৈন্য নিভা নদীর তীরে নিষ্কর ভূমি পাইয়াছিল। তখন ঐ স্থান অস্বাস্থ্যকর ছিল। এক্ষণে সেই স্থানেই বর্তমান মহানগর সেন্ট পিটার্সবর্গ স্থাপিত আছে। ১৭০৩ খৃষ্টাব্দে বণ্টিক্‌ সমুদ্র-তটে পিটার দি গ্রেট রুস-সাম্রাজ্যের একটি নূতন রাজধানী নিৰ্ম্মাণ করিবার সঙ্কল্প করিয়াছিলেন। তথায় তিনি এই উদ্দেশ্যে প্রথমে একটি গৃহ নিৰ্ম্মাণ করাইয়াছিলেন। সেই গৃহটি কাষ্ঠ-নিৰ্ম্মিত। আজিও পর্য্যটকেরা উহা দেখিতে পায়। তাহার উপরিভাগে এক্ষণে ইষ্টকরাশি রহিয়াছে। সময়ে কত পরিবর্তন ঘটে। যে স্থান এক সময়ে অতিসামান্য ছিল, আজ তথায় পৃথিবীর অন্যতম শ্রেষ্ঠ অলঙ্কার স্বরূপ সেন্ট পিটার্সবর্গ শোভা বিস্তার করিতেছে। ক্রমে ক্রমে যেমন রাজার পর রাজা হইতেছেন, সেইরূপ সেন্ট পিটার্সবর্গের শোভার পর শোভা বাড়িতেছে। এই জন্ত কলিকাতার শ্রায় সেন্ট পিটার্সবর্গেরও নাম হইয়াছে “প্রাসাদ-নগর” (The City of Palaces.)।

সেন্ট পিটার্সবর্গে কেবল সম্রাটভবনের মৌন্দর্য্য নয়, অপরাপর ধনীদেও মনোহর অট্টালিকাএণীর শোভা ক্রীড়া করিতেছে। চারি দিকে সুবিস্তৃত রাজপথ। প্রত্যেক রাজপথের দুই পার্শ্বে বড় বড় অট্টালিকা। রুসগবর্ণ-মেণ্টের আদেশে কুন্তী ও অস্বাস্থ্যকর গৃহ রাখিবার ঘো নাই। রাজাজায়

প্রত্যেক গৃহস্থামীকে প্রতিৎসর একবার করিয়া বাড়ী মেরামৎ ও চুণকাম করিতে হয়। অটালিকাক্রোশী যদিও ইষ্টকনির্মিত, কিন্তু সর্বদা সূক্ষ্মবলে ধবলিত থাকায় সুন্দর দেখায়। রাজপুতানার জয়পুর নগরও এই ধরণের রাজধানী, তবে ইষ্টকের বদলে প্রস্তরের বাড়ীই যথেষ্ট।

নিভা নদী ও তাহার শাখা-নদীগুলি কর্তৃক কতিপয় দ্বীপ সৃষ্ট হইয়াছে। সেই সকল দ্বীপের উপর সেণ্ট পিটার্সবর্গ রাজধানী নির্মিত। এই নগর দ্বাদশ-পল্লী বা মহল্লায় বিভক্ত। সেণ্ট পিটার্সবর্গের পরিধি ৯ ক্রোশ এবং ব্যাস ৩ ক্রোশ। প্রত্যেক পল্লী বা মহল্লার সীমা শাখানদী বা খালের দ্বারা নির্ধারিত হইতেছে। সুতরাং লোকজনের গতয়াতের জন্ত সেতুর সংখ্যা সত্তরটি। তন্মধ্যে অর্ধেকগুলি প্রস্তরনির্মিত, বাকি অর্ধেকগুলির কতকগুলি লৌহ ও কতকগুলি কাষ্ঠগঠিত। প্রতিবৎসর বসন্তকালে লাডোগা হ্রদ হইতে রাশি রাশি বরফ ভাসিয়া আসিয়া নিভা নদীতে জমাট হইয়া পড়ে, এইজন্য ঐ নদীর উপর কোন স্থায়ী থেমনো বা পিল্প-পুল (Pillar bridge) নির্মিত হয় নাই। সকলের যাওয়া আসার জন্ত উহার উপর দোল-পুল (Hanging bridge) আছে। টেম্‌স্‌ নদীর উভয় পারে যেমন লণ্ডন নগর অবস্থিত, সেইরূপ নিভা নদীরও উভয় তটে সেণ্ট পিটার্সবর্গ নগর দাঁড়াইয়া আছে। গ্রীষ্মকালে ঐ নগরের দুই তীরস্থ দুই অংশ এক করিবার জন্ত তিনটি বৃহৎ বৃহৎ ভাসা-পুল (Pontoon bridge) নির্মিত হয়। ঐ তিনটির মধ্যে যেটি সর্বশ্রেষ্ঠ সেতু, তাহার দৈর্ঘ্য ১২৫০ এবং বিস্তার ৬০ ফুট, নাম “ইসাহাক সেতু” (Isaac Bridge)। অপর দুইটির মধ্যে একটির নাম “ট্রয়েস্কয় সেতু” (Troitskoi Bridge), দৈর্ঘ্য ২৪০৬ ফুট; অপরটির নাম “ভস্ক্রেসেনস্কয় সেতু” (Voskresenskoi Bridge), দৈর্ঘ্য ১২৬০ ফুট। ঐ তিনটি সেতুর উপরিভাগে বড় বড় তক্তা পাতা, দুই দিকে মানুষের যাতায়াতের জন্ত পদপথ (Foot-path) এবং স্থিরভাবে ভাসিয়া থাকিবার জন্ত বড় বড় লৌহ-খোল (Pantoon) গুলি নঙ্গর করা থাকে। নিভা নদীর উপর ২৪১৬ ফুটের অপেক্ষা দীর্ঘাকার সেতু নাই, কিন্তু ঐ নদীর এক এক স্থলের বিস্তার ৩৫০০ ফুট পর্য্যন্ত দেখা যায়। ইউরোপের কোন রাজধানীই নিভার স্থায় মনোহর নদীতে স্থাপিত নয়।

বসন্ত, গ্রীষ্ম ও বর্ষা কালে সেন্ট পিটার্সবর্গের সেতুগুলির যেমন প্রয়োজন হয়, শীতকালে তেমন নয়। শীতের সময় নিভা ও তাহার শাখানদীগুলি জমাট বরফে আচ্ছন্ন হইয়া থাকে। তখন তাহার উপর দিয়া হাঁটিয়া পারাপার হওয়া যায়। কেবল নদী নয়, তখন পথ ঘাট সমস্তই বরফে ঢাকিয়া যায়।* পথে গাড়ী চলে না, নদীতে নৌকা চলে না। তখন লোকেরা নৌকার স্থায় এক প্রকার চক্রহীন গাড়ী (Sledge) ব্যবহার করে। রুসিয়ায় বন্ধা হরিণ নামে এক জাতীয় হরিণ আছে। বন্ধা হরিণ, মানুষ বা বড় বড় কুকুরে ঐ সকল নৌকা টানিয়া লইয়া যায়। প্রকৃতির কাণ্ড অদ্ভুত! জলে স্থলে নৌকা চলে।

গ্রীষ্মের সময় বরফ গলিয়া যায়, সুতরাং তখন ঠেলাগাড়ীর (Sledge) এর ব্যবহার বন্ধ হয়। তখন পথে ড্রস্কি (Drosky) † নামক চারি চাকার ঘোড়ার গাড়ী চলে। প্রকৃত নৌকা জলে ভাসে।

সেন্ট পিটার্সবর্গের রাস্তাগুলি বড় ভাল নয়। প্রত্যেক রাস্তায় পাথরের টুকরা বিছাইয়া দেওয়া হয়। শীত ও গ্রীষ্মকালে বরফ ও জলের সঞ্চার জন্য রাস্তা বন্ধুর হইয়া পড়ে। গাড়ী ও লোকের যাতায়াতের বড় হুবিধা হয় না। সম্রাট প্রথম আলেক্সান্দার, এক বার ইংলণ্ডে গিয়াছিলেন, সেই সময়ে তিনি তত্রস্থ রাস্তাগুলি দেখিয়া আসিয়া স্বীয় রাজধানীর দুর্দশা মোচনে মন দিয়াছিলেন। তাহার দ্বারা সেন্ট পিটার্সবর্গের পথে পথে ফুটপাথ নির্মিত হয়। যাই হউক, পূর্বাপেক্ষা এক্ষণে সেন্ট পিটার্সবর্গের পথগুলি অনেক ভাল হইয়াছে।

সেন্ট পিটার্সবর্গ নগরের মধ্যে জলযুদ্ধ-ব্যবস্থাপক-সমাজ-প্রাসাদই (Admiralty) সর্বাপেক্ষা উৎকৃষ্ট। এই প্রাসাদ নিভা নদীর তটে অবস্থিত।

* অত্যন্ত শীতের সময় যখন তাপমাত্রা (Thermometer) যন্ত্রের পায়দ খুব নিচে নামিয়া পড়ে এবং বাতাস বন্ধ হয়, তখন আকাশ হইতে অববরত ক্ষুদ্র ক্ষুদ্র বরফখণ্ড পড়িতে থাকে। উহাতে রুসিয়ার রাজধানী সেন্ট পিটার্সবর্গও তদ্বৎসরস্থ স্থান সকল কতক কতক আচ্ছন্ন হয়। প্রত্যেক বরফ টুকরা ছয়টি সমভুজ ও সমকোণবিশিষ্ট। প্রত্যেকের আকার একটি মটরের আঁধ খানি।

† ড্রাস্কি এক রকম বেঞ্চ-সাজানো গাড়ী। ইহাতে শকটচালক ব্যতীত ৪ হইতে ৬ জন লোক গিঠাপিঠি করিয়া বসিতে পারে। বেঞ্চের শেষ ভাগে কোচম্যান বসিয়া গাড়ী হাঁকায়।

ইহা দীর্ঘে ১৪০০ এবং প্রস্থে ৬৭২ ফুট। যুদ্ধ-জাহাজ নির্মাণ করিবার জন্য এখানে চারিটি স্থান আছে। এই প্রাসাদের মধ্য হইতে তিনটি বড় বড় রাস্তা বাহির হইয়া গিয়াছে।

ইহার পরেই উইণ্টার প্রাসাদ (Winter Palace) গণ্য। ইহাও নিভা নদীর তীরে সুশোভিত। ইহার যে অংশ নদীর দিকে, তাহার দৈর্ঘ্য ৭২১ ফুট। ১৮৩৭ খৃঃ এই রাজপ্রাসাদ অগ্নি-সংযোগে দগ্ধ হইয়াছিল। পরে পুনর্নির্মাণ করিয়া হইয়াছে। উইণ্টার প্রাসাদের বাহিরের ও ভিতরের গঠন-সৌন্দর্য্য খুব চমৎকার।

উইণ্টার প্রাসাদের কিঞ্চিৎ দূরে বড় হার্মিটেজ্ ও ছোট হার্মিটেজ্ নামে অপর দুইটি সুন্দর প্রাসাদ আছে। একটি সুচারু সেতু পথের উভয় পার্শ্বস্থ এই দুইটি প্রাসাদকে এক করিয়া রাখিয়াছে।

ইহা ছাড়া সেন্ট পিটার্সবর্গে আরও অনেকগুলি রাজপ্রাসাদ আছে। তন্মধ্যে মর্ম্মর-প্রাসাদ (Marble Palace) এবং টৌরিডা প্রাসাদ (Taurida Palace) অতি পরিপাটি। রুসরাজ্যী দ্বিতীয় ক্যাথারাইন্ তঁাহার সর্ব্বশ্রেষ্ঠ প্রিয়পাত্র কাউন্ট অর্গফের জন্ত মর্ম্মর-প্রাসাদটি নির্মাণ করাইয়াছিলেন। পরে সম্রাট পলের সময় পোলণ্ডের শেষ রাজারা এই প্রাসাদে বাস করিয়াছিলেন। সেনাপতি পোটেমকিন্ কর্তৃক টৌরিডা প্রাসাদ নির্ম্মিত হইয়াছিল। রুসীয় ইতিহাসে লিখিত আছে যে, পটেমকিন্ ক্রিমিয়া-যুদ্ধে গিয়া প্রাণ হারাইবার অব্যবহিত পূর্বে এই প্রাসাদে মহারাণী ক্যাথারাইন্কে একটি মহা-ভোজ দিয়াছিলেন।

১৮২৫ খৃঃ গ্রাণ্ড্ ডিউক্ মাইকেলের একটি বৃহৎ অট্টালিকা নির্ম্মিত হয়। ইহাও সেন্ট পিটার্সবর্গের অগ্রতম অলঙ্কার স্বরূপ।

রুস-গবর্ণমেণ্টের রাজকার্য্য নির্ব্বাহের জন্ত সেন্ট পিটার্সবর্গে অনেকগুলি বড় বড় অট্টালিকা আছে। তন্মধ্যে ইন্সহাক্ স্কোয়ারে সিনেট্ হাউস নামক অট্টালিকাটি অগ্রতম।

এটাট্ মেজর (Etat Major) নামক অট্টালিকা খুব প্রকাণ্ড। এই স্থানে যুদ্ধ-সংক্রান্ত বিষয়ের আলোচনা হয়। তা' ছাড়া রুস-রাজ্যের মানচিত্র (Map) অঙ্কিত হয়। মানচিত্র আঁকিবার জন্ত অমেক লোক নিযুক্ত

আছে। ঐ সকল মানচিত্র বিক্রীত হয়। তা ছাড়া এ স্থলে মুদ্রাযন্ত্র আছে। উহাতে রাজকার্য্যসম্বন্ধীয় কাগজপত্র ছাপা হয়। এটাট্ মেজর অটালিকার একটি বৃহৎ লৌহগৃহ আছে। উহা ২৫০ ফুট দীর্ঘ, ১০০ ফুট প্রস্থ এবং ৭০ হইতে ৮০ ফুট উচ্চ। ঐ লৌহ-গৃহে ১৭১৯ খৃষ্টাব্দ হইতে যুদ্ধসংক্রান্ত সমস্ত কাগজ পত্র রক্ষিত হইয়া আসিতেছে। কাগজগুলি একুপ ভাবে শ্রেণীবদ্ধ আছে যে, প্রয়োজন হইলে তৎক্ষণাৎ যে কোন কাগজ বাহির করা যায়। এটাট্ মেজরের ১২০০ লোক কর্ম্ম করে। তন্মধ্যে ১০০০ লোক সেইখানে বরাবর থাকে। ২০০ লোক কার্য্য করিতে আসে, কার্য্য সারিয়া বাড়ী যায়।

সেন্ট মাইকেল প্রাসাদে সম্রাট পল্ ষড়ষষ্ঠীদের হস্তে গোপনে নিহত হইয়াছিলেন বলিয়া আজ পর্য্যন্ত রুসিয়ার কোন রাজা বা রাজবংশীয় লোক সেখানে বাস করেন না। এক্ষণে এই প্রাসাদে “হোটেল ডু জেনী” (Hotel du Genie) নামে একটি সামরিক বিদ্যালয় স্থাপিত আছে। ইঞ্জিনিয়ারেরা ঐ বিদ্যালয়ে শিক্ষা করে।

নূতন ও পুরাতন অস্ত্রাগার, অস্ত্রনিৰ্মাণাগার, পোষ্ট অফিস্ এবং টঙ্ক-শালা এই কএকটি অটালিকাও দেখিবার যোগ্য। উইণ্টার প্রাসাদের সম্মুখ দিকে একটি দ্বীপের উপর নগর রক্ষার্থ যে দুর্গটি নিৰ্ম্মিত হইয়াছে, উহাও অতি বৃহৎ ও চমৎকার।

বিজ্ঞান ও হুম্ম শিল্প শিক্ষা দিবার জন্য সেন্ট পিটার্সবর্গে কএকটি বৃহৎ বৃহৎ অটালিকা আছে। প্রত্যেকটিই দেখিবার যোগ্য। তাহাদের মধ্যে রাজকীয় বিজ্ঞান-মন্দিরটিই সর্বাপেক্ষা ভাল। পিটার দি গ্রেট্ নিজা নদীর দক্ষিণ তটে এই অটালিকাটি স্থাপন করিয়া গিয়াছেন। ইহার মধ্যে নানাবিধ বহুমূল্য সামগ্রী সংগৃহীত আছে। ইহাতে পশুশালা, খনিজ পদার্থ-শালা, আসিয়িক ও মিশ্রদেশীয় চিত্রশালা, শুষ্ক উদ্ভিজ্জ ও শুষ্ক কীটসংগ্রা-হিকা, প্রাচীন মুদ্রা-সংগ্রাহিকা, আসিয়িক রুসীয় এবং অন্যান্য দেশীয় বর্ত্তমান মুদ্রাসংগ্রাহিকা, এবং একটি বৃহৎ পুস্তকালয় সমেত অদ্বুত দ্রব্য-শালা আছে। এই বিজ্ঞান-মন্দিরে পিটার দি গ্রেটের একটি সামগ্রীকক্ষ আছে। উহাতে তাঁহার নিজের হস্তকৃত অনেকগুলি শিল্প-সামগ্রী ও

তাঁহার একটি প্রতিমূর্তি আছে। তিনি পল-টোয়াতে যে আরবীয় অশ্বে আরোহণ করিয়াছিলেন, সেই অশ্ব এবং আর দুইটি তাঁহার স্নেহের পাত্র কুকুরের মৃতদেহ জীবিতের ন্যায় শোভা পাইতেছে।

নিভা নদীর দক্ষিণ তটে রাজকীয় শিল্পাগারটিও খুব বড়। রাণী এলিজাবেথ কর্তৃক ইহার ভিত্তি স্থাপন হয়, কিন্তু কার্যতঃ রাণী দ্বিতীয় ক্যাথারাইনের সময়ে নিৰ্ম্মিত হয়। এই আগারে বহুসংখ্যক চিত্র, খোদিত মূর্তি সজ্জিত আছে। এখানে প্রতি তৃতীয় বৎসরে দেশীয় শিল্পকরদের কারুকার্যের একটি প্রদর্শনী হইয়া থাকে। এই শিল্পাগার-সংলগ্ন একটি শিল্পবিদ্যালয় আছে। উহাতে সম্রাটের ব্যয়ে তিন চারি শত ছাত্র শিল্প-বিদ্যা শিক্ষা করে। যথাসময়ে যে ছাত্র যে বিষয়ে উপযুক্ত হয়, তাহাকে সরকার হইতে সেইরূপ কার্য দেওয়া হইয়া থাকে। আবার যে সকল ছাত্র সর্বোৎকৃষ্ট হয়, তাহারা রুস গবর্ণমেণ্টের ব্যয়ে নানাদেশে ভ্রমণ করিয়া শিক্ষার মাত্রা পূর্ণ করে। হুন্স-শিল্প সম্বন্ধে অপরাপর সম্ভাব্যদেশোপেক্ষা রুসিয়া যে, এখনও নীচে পড়িয়া আছে, তাহা এই পুস্তকের অষ্টম অধ্যায়ে বলা হইয়াছে। যাই হউক, এক্ষণে রুসসম্রাট রুসছাত্রগণকে বিদেশে গিয়া শিল্প শিক্ষা করিবার যে প্রথা বাহির করিয়াছেন, ইহা রুসিয়ার মঙ্গলের বিষয়।

ইহার পর “হোটেল দিস্ মাইন্স” (Hotel des Mines) নামক শিক্ষালয়। এখানে রাজ্য ও সৈন্যসংক্রান্ত কার্য পাইবার জন্য অনেকগুলি ছাত্র আকরিক ইঞ্জিনিয়ারি শিক্ষা করে। এখানে প্রায় ৩৪ শত ছাত্র শিক্ষা পায়।

প্রথম আলেকজান্দারের সময় সেন্ট পিটার্সবর্গ বিশ্ববিদ্যালয় স্থাপিত হয়। রাজকীয় রুসবিদ্যালয় নামে আর একটি উচ্চ দরের বিদ্যালয় আছে। সেখানে দেশীয় সাহিত্যের উন্নতিবিষয়ক চর্চাটা বেশী হইয়া থাকে। তা ছাড়া সেন্ট পিটার্সবর্গে দুইটি স্ত্রীবিদ্যালয় আছে। একটি সম্ভ্রান্ত নারী-বিদ্যালয়, অপরটি ক্যাথারাইনের বিদ্যালয়। প্রথমটিতে আট শত এবং দ্বিতীয়টিতে ছয় শত ছাত্রী অধ্যয়ন করে। রাজ্ঞী ক্যাথারাইন্ এই দুইটি বিদ্যালয়ের চিরস্থায়িত্বের জন্য অনেক টাকা দিয়া গিয়াছেন।

সেন্ট পিটার্সবর্গে “আওয়ার লেডি অব্ কজান”, সেন্ট আলেকজান্ডার নিউস্কি, সেন্ট পিটার, সেন্ট পল, ক্যাথলিক গির্জা, ইংলিস্ চার্চ, আরমানী গির্জা, লুথারীয় গির্জা এবং একটি মহম্মদীয় মসিদ বিশেষ প্রশংসার যোগ্য।

বগো ডি লুইয়া হাসপাতাল, দরিদ্রের হাসপাতাল প্রভৃতি কএকটি চিকিৎসালয়ও প্রশংসার যোগ্য। প্রথম চিকিৎসালয়টিতে প্রায় দুই হাজার রোগী থাকিতে পারে।

ইস্‌হাক স্কোয়ারের মধ্যস্থলে সেন্ট পিটার্সবর্গের স্থাপনকর্তা পিটার দি গ্রেটের একটি বৃহৎ মূর্তি আছে। ১৫০০ টন ওজনে এক খণ্ড বৃহৎ লোহিত প্রস্তরের চূড়ার উপর পিটার দি গ্রেটের মূর্তি স্থাপিত। একটি বৃহৎ পিত্তল-নির্মিত বোটকীর উপর পিটার দি গ্রেটের পিত্তলনির্মিত মূর্তি। দেখিলে বোধ হয় যেন মহাবীর পিটার পর্বতের উপরেও অবলীলাক্রমে অশ্বারোহণে ধাবিত হইতে পারিতেন। ২ ক্রোশ দূর হইতে ঐ বৃহৎকায় লোহিত প্রস্তর-খণ্ড আদ্রীত হইয়াছিল। দ্বিতীয় ক্যাথারাইনের আদেশে ফরাসী ভাস্কর “ফাল্কনেট্‌ এই অদ্ভুত পর্বত ও মূর্তি নির্মাণ করিয়াছিলেন। পর্বতগাত্রে ল্যাটিন ও রুস ভাষায় লিখিত আছে :—

“To PETERS the First, Catherine the Second, 1782.”

ক্রন্‌ষ্টাড্‌ ।

সেন্ট পিটার্সবর্গের দশ ক্রোশ দূরে নিভা নদীর মোহানাস্থিত একটি দ্বীপের উপর ক্রন্‌ষ্টাড্‌ নামক নগরও দুর্গ স্থাপিত। দুর্গটির চারি ধারে বহুসংখ্যক কামান আছে। এই নগরস্থ নদীগর্ভে রুসীয় যুদ্ধ পোতগুলি থাকে। এই নগরের বারাকগুলিতে ২৫ হাজার সৈন্য থাকিবার স্থান আছে।

সার্স্কোসিলো ।

সেন্ট পিটার্সবর্গ হইতে ২২ ভাষ্ট্‌ দূরে এই নগর অবস্থিত। এখানে ইষ্টকনির্মিত ও পথের কাজ করা একটি বৃহৎ রাজপ্রাসাদ আছে। উহার সম্মুখভাগে প্রায় ৮০০ ফুট জমী। সেই জমীর উপর ইতস্ততঃ খাম, বিলান ইত্যাদি শোভা পাইতেছে। রাণী এলিজাবেথ এই প্রাসাদ নির্মাণ

করিয়াছিলেন। রাণী ক্যাথারাইন জীবনের শেষভাগে এই প্রাসাদেই অবস্থিতি করিতেন। এই প্রাসাদসংলগ্ন উদ্যানগুলি ইংরেজি ধরণে নির্মিত। প্রাসাদের অভ্যন্তরস্থ গৃহগুলি ফ্রেমশূন্য নানাবিধ চিত্রপটে সজ্জিত। ঐ সকল গৃহের যে গৃহটিতে প্রিন্স পট্টেমকিন্ থাকিতেন, উহার মেজে কাষ্ঠের অদ্বুত কারুকার্যে সুশোভিত। ইহার অন্তর্গত নৃত্যশালা দীর্ঘে ১৪০ এবং প্রস্থে ৫২ ফুট। ইহা দ্বিতল গৃহ। ইহা ভিন্ন আর একটি গৃহ আছে, তাহার নাম সিন্-মহল (Cabinete of Mirrors)। ঐ গৃহের মধ্যে দর্পণসজ্জিত ২৬০ ফুট দীর্ঘে একটি কাষ্ঠমঞ্চ (Gallery)। এই প্রাসাদের যেখানে যেখানে প্রস্তর ও ধাতুনির্মিত প্রতিমূর্তি আছে। এই প্রাসাদের অন্তর্গত ভজনালয়টি নানাবিধ মনোরম সজ্জায় সজ্জিত। ভজনালয়টি আগাগোড়া গিল্টি করা কাষ্ঠে গঠিত। অল্প চেসমীর জলবুদ্ধে তুর্কীদিগকে পরাজিত করিতে, তাহার সম্মানের জন্য এই প্রাসাদসংলগ্ন একটি উদ্যানে বৃহৎ জলস্তম্ভ দণ্ডায়মান আছে। ঐ স্তম্ভ দেখিবার যোগ্য।

নবগরদ।

নবগরদ নগরে যতগুলি সুন্দর জিনিষ আছে, তন্মধ্যে সেন্ট সোফিয়ার গির্জা একটি। কনস্টান্টিনোপল নগরে জুস্তিনিয়াস্ বৈরূপ ধরণের একটি বৃহৎ ধর্ম-মন্দির নির্মাণ করিয়াছিলেন, ইহা তাহার অনুকরণ। বোধ হয়, নবগরদের সেন্ট সোফিয়া গির্জা রুসরাজ্যের মধ্যে সর্বাপেক্ষা প্রাচীন ধর্মমন্দির। ৯৮৮ খৃষ্টাব্দে ব্লাডিমির দি গ্রেট কর্তৃক সর্বপ্রথম ইহার ভিত্তি স্থাপিত হয়। তার পর ১০৫১ বা ১০৫৭ খৃষ্টাব্দে নবগরদের গ্রেট ডিউক ব্লাডিমির যারস্লাভিচ্ প্রস্তর বা ইষ্টকে ইহার নির্মাণ-কার্য সমাধা করেন। অনন্তর ১৩৪০ খৃষ্টাব্দে এই গির্জা অগ্নিতে পুড়িয়া যায়। নবনির্মিত গির্জার সঙ্গে তদানীন্তন গির্জার কোন কোন অংশ আজিও দৃষ্ট হয়। এই গির্জায় আজিও অনেক পুরাতন চিত্র আছে। সেই সকল চিত্রে মেরী, যিশুখৃষ্ট ও অন্যান্য সেন্টদের মূর্তি অঙ্কিত আছে। ডাক্তার ক্লার্ক বলেন, খৃষ্টধর্মাস্তর্গত চিত্রপটই রুসিয়ায় খৃষ্টধর্মের সূত্রপাত করিয়াছে। ঐ সকল ছবি আসিবার পূর্বে সেখানে পৌত্তলিক ধর্ম প্রচলিত ছিল। ১১১ খৃষ্টাব্দে ব্লাডিমির দি গ্রেট

খৃষ্টধর্ম্মে দীক্ষিত হন। রুডিমির প্রথমে পুতল, পূজক ছিলেন। তাঁহার ৮০০ প্রণয়িনী ছিল। কিন্তু গ্রীক সম্রাটের ভগিনীর সহিত যখন তাঁহার বিবাহ-সম্বন্ধ ঠিক হয়, তখন তাঁহাকে পুতল-পূজা ও ঐ ৮০০ প্রেমিকার প্রেম বিসর্জন দিয়া খৃষ্টধর্ম্ম গ্রহণ করিতে হইয়াছিল। এরূপ না করিলে তাঁহার এই খৃষ্টানী বিবাহ হইবার উপায় ছিল না। তার পর, বিবাহের দিন রুডিমিরের ২,০০০০ কুড়ি হাজার প্রজা ও ছয়টি পক্ষীর গর্ভজাত বারটি পুত্র এক সঙ্গে খৃষ্টধর্ম্মে দীক্ষিত হয়। রুডিমির গ্রীকরাজ-ভগিনীকে বিবাহ করাতোই সেই সময় হইতে রুসিয়ায় আজ পর্য্যন্ত গ্রীক চর্চ মতানুযায়ী খৃষ্টধর্ম্ম চলিয়া আসিতেছে। এক দিনে এত লোকের খৃষ্টধর্ম্ম গ্রহণ আর কোথাও হইয়াছে কি না, তাহা আমরা জানি না। খৃষ্টধর্ম্মাবলম্বীরা তা বলিতে পারেন।

নবগরদ ও রুসরাজ্যের অন্যান্য স্থানে গ্রীক চর্চ মতানুসারে যিশুখৃষ্ট ও সেণ্টগণের ধোদিত মূর্ত্তি এবং চিত্রপট পূজিত হয়। ঐ সকল দেখিতে সুন্দর ও তাহাদের ভাস্করীয় এবং চৈত্র কার্য্য রুস কারিকরগণের ক্ষমতা-পরিচায়ক।

নবগরদের দুর্গটি যদিও মোটামুটি ধরণের, কিন্তু শত্রু-বিজয়ের গঠন-প্রণালীতে হীন নহে। পঞ্চদশ খৃষ্টাব্দে মস্কাউ নগরের ক্রেমলিন নামক দুর্গের ধরণে ইহার অনেকটা নূতন আকার হইয়াছে।

ভাইস্‌নি ভলোসক্ ।

এই স্থান বড় বড় খালের জন্য প্রসিদ্ধ। ঐ সকল খাল কাশ্পীয় হ্রদ ও বল্টিক্ সমুদ্রে গিয়া মিশিয়াছে। উহাদের দৈর্ঘ্য মোটের উপর প্রায় ৫০০০ ভাষ্ট্ৰ অর্থাৎ ৩৭৫০ ক্রোশ। প্রতি বৎসর ঐ সকল খালে পাঁচ ছয় হাজার বাণিজ্য-নৌকা যাতায়াত করে। ইহাতে স্থানীয় অন্তর্বাণিজ্যের বড় সুবিধা হইয়াছে।

টর্শক্ বা টর্জক্ ।

এই নগর ভাইস্‌নি ভলোসক্ হইতে ৭১ ভাষ্ট্ৰ দূরে অবস্থিত। এখানে উত্তম জুতা, পরিষ্কৃত চর্ম্ম এবং সোণা রূপার জরির কাজ করা কোমরবন্ধ

প্রস্তুত হয়। ওক গাছের ছালের সহিত মোটা চামড়াকে পাতলা করা হয় এবং উহাকে লালরঙে রঞ্জিত করিবার জন্য এক প্রকার পোকা শুকাইয়া রাখা হয়। সুগন্ধ করিবার জন্য এক প্রকার গুঁড়িজ্জ তৈল উহাতে রাখান হইয়া থাকে। এই চর্ম “রুসচর্ম” নামে প্রসিদ্ধ। ইহা ছাড়া এই নগর রুস্‌ খৃষ্টানদের একটি তীর্থ। এখানে একটি উষ্ণপ্রস্রবণ আছে। তদুপলক্ষে প্রস্তর ও ইষ্টকনির্মিত কুড়িটি গির্জা স্থাপিত হইয়াছে। চতুর্দিক হইতে যাত্রীরা আসিয়া এখানে ধর্মোৎসব করে।

ভার্।

টর্শক নগর হইতে ৬৩ ভাষ্ট্‌ দূরে ভল্গা নদীর উপর ভার্ নগর অবস্থিত। এখানে অনেকগুলি বড় বড় বাড়ী ও দোকান আছে। ইতালীদেশস্থ পর্যটক ব্যবসায়ীরা এখানে আসিয়া নগরবাসীদিগকে নানাবিধ দ্রব্য বিক্রয় করে।

মস্কাউ (মস্কো) ।

সেন্ট পিটার্সবর্গের পরেই এই নগরটির প্রশংসা করা করা যায়। কিবিট্‌কি (Kibitki)* শব্দটি আরোহণ করিয়া ভার্ নগর হইতে ১৫ ঘণ্টায় মস্কাউ নগরে যাওয়া যায়। এই নগরের প্রায় ৪ ভাষ্ট্‌ দূরে পেত্রোস্কির রাজপ্রাসাদ। সেন্ট পিটার্সবর্গ হইতে মস্কাউ নগরে যাইবার সময় রুস-সম্রাটেরা ঐ প্রাসাদে কিয়ৎকাল বিশ্রাম করেন। প্রাসাদটি যদিও ইষ্টক-নির্মিত ও যদিও উহার গঠনপ্রণালী তেমন সুন্দর নয়, তথাপি খুব প্রকাণ্ড।

মস্কাউ নগরে এসিয়া ও ইউরোপের অন্তর্গত অনেক স্থানের স্থপতি ও ভাস্করীয় কার্যের নমুনা দেখা যায়। সুদূর উত্তর সমুদ্র-তীরস্থ স্থান হইতে কাষ্ঠগৃহ; সুইডেন ও ডেনমার্ক হইতে পঙ্খের কাজ করা ইষ্টকালয়; টাই-রোল হইতে চিত্রিত প্রাচীর; কনস্তান্তিনোপল হইতে মসিদ; বুকারিয়া

* এই শব্দটি প্রাচীন শব্দ (Sythian) জাতি ব্যবহার করিত। এক্ষণে কালমুখ্যেও নগর ইহাভার জাতির মধ্যে ইহার বেশী প্রচলন। তাহারাই ইহাকে কিবিট্‌কি বলে। রুসিয়ার প্রায় সর্বত্র এই শব্দট দৃষ্ট হয়।

হইতে তাতারী মন্দির ; চীন হইতে কাঠমন্দির, বারাণ্ডা ও মণ্ডপ ; স্পেন হইতে কাবারেং ; ফ্রান্স হইতে সোঁড়জিক কারাগার (Dungeon), কারাগার ও সাধারণ কার্য্যালয় ; রোম হইতে স্থাপত্যের ধ্বংসাবশেষ ; নেপল্‌স্ হইতে ছাদ, চাতাল ও বাগানের রেলিং আসিয়া মস্কাউ নগরের শোভা বর্দ্ধন করিতেছে। এখানে যেমন ভিন্ন ভিন্ন দেশের গৃহ, সেইরূপ ভিন্ন ভিন্ন দেশের ভিন্ন ভিন্ন পরিচ্ছদধারী লোকের ভিড়ে রাজপথগুলি সর্বদা অস্থির হইতে থাকে। গ্রীক, তুর্কী, তাতার, কসাক, চীনে, মস্কোভীয়, ইংরেজ, ফরাসী, ইতালীয়, পোল, জার্মান প্রভৃতি বহু জাতির লোক মস্কাউ নগরে বাস করে। এখানে নানাবিধ মনোহর ছবি বিক্রয় হয়।

ক্রেমলিন্ দুর্গের সম্মুখভাগে “প্লেস ডি গালিজিন” নামক একটি বৃহৎ ভূখণ্ডে হাট বসে। ঐ স্থানে শ্বেত ময়ূর, পালকের পাখা, পায়রা, সকল প্রকার কুকুর, গায়কপক্ষী, বন্দুক, পিস্তল প্রভৃতি বিক্রীত হয়।

মস্কাউ হইতে ২০ ক্রোশ দূরে ট্রিনিটির কন্ভেন্ট (The Convent of Trinity) অবস্থিত। উহার সৌন্দর্য্য ও ঐশ্বর্য্য অনেক। উহার এক ক্রোশ দূরে আর একটি কন্ভেন্ট আছে। উহার প্রাচীরাবেষ্টনের মধ্যে একটি গথিক গির্জা নিশ্চিত। ঐ গির্জা একটি উন্নত স্তূপের উপর শোভা পাইতেছে। স্তূপের তলদেশে একটি মন্দির মধ্যে লেজারসের মোম-নিশ্চিত চমৎকার প্রতিমূর্তি আছে।

ক্রেমলিন্ দুর্গের সম্মুখে সেণ্ট বেসিল্ গির্জা দাঁড়াইয়া আছে। ১৫৩৮ খৃষ্টাব্দে দ্বিতীয় ইভান্ বাসিলোভিচ্ তাতারীয় রুচি অনুসারে ঐ গির্জা নিৰ্ম্মাণ করাইয়াছিলেন। ঐ গির্জার মধ্যে স্বৰ্ণরসরঞ্জিত অনেকগুলি ক্রুশ আছে। সেগুলির শোভা বড় মনোহর।

মস্কাউ নগরে যতগুলি প্রসিদ্ধ স্থান আছে, তন্মধ্যে ক্রেমলিন্ বা ক্রেমল্ দুর্গ একটি। ইহার প্রধান ফটকের নাম পবিত্র তোরণ (Holy Gate)। এই স্থানের গৌরব বড়, স্ততরাং মাথার টুপী হাতে না লইয়া কেহই ইহার মধ্যে প্রবেশ করিতে পায় না। এই দুর্গের মধ্যে একস্থলে ভূগর্ভে একটি বিরাট ঘটা আছে। ঐ ঘটা ঢালাই হইয়া অবধি আজ পর্যন্ত এক স্থানেই পড়িয়া আছে। উহা এত ভারি যে, আজ পর্যন্ত কোন স্থলে

টাঙানো হইতে পারে নাই। ক্রেমলিন্ হুর্গে এক সময় আগুন লাগাতে ঐ ষণ্টা বড় তাতিয়া উঠে। তত্রস্থ লোকেরা ঠাণ্ডা করিবার জন্য উহাতে জল ঢালিয়া দেয়। গরমে নরম—কাজেই ষণ্টার গায়ে একটা ভয়ানক চিড় ফুটিয়া কতকটা অংশ ভাঙিয়া গিয়াছে। আজিও সে দাগুটা রহিয়াছে। ঐ বিরাট ষণ্টার পরিধি (বেড়) ৬৭ ফুট ৪ ইঞ্চি, ব্যাস (বেড় লম্বাই) ২২ ফুট ৫ ইঞ্চি এবং উচ্চতা (খাড়াই) ২১ ফুট ৪ ইঞ্চি। ঐ ষণ্টা ওজনে ৪,৪৩,৭৭২ পাউণ্ড*। যদি ১১০ টাকা হিসাবে প্রতি পাউণ্ড ধরা যায়, তাহা হইলে উহার মূল্য ৬,৬৫,৬৫৮ টাকা হয়। ঐ ষণ্টাতে পিত্তল, রূপা ও কতকটা সোণা আছে শুনা যায়। পাঠক মহাশয়! আমাদের দেশে, “হাতীর গলায় ষণ্টা” বলিয়া একটা প্রবাদ আছে, কিন্তু রুসিয়ায় “ষণ্টার গলায় হাতী” প্রবাদটা খাটিতে পারে কি না ?

রুসিয়ার সামান্য লোকেরা প্রতি বৎসর এক দিন ষণ্টা করিয়া ঐ ষণ্টাকে ভক্তিভরে প্রদক্ষিণ ও সেলাম করে। যাই হউক, এরূপ একটা প্রকাণ্ড হইতে প্রকাণ্ডতর ষণ্টা পৃথিবীর আর কোথাও নাই।

ইহা ছাড়া মস্কাউ নগরে আরও কএকটি বৃহৎ ষণ্টা আছে। তন্মধ্যে সেন্ট ইভানের বেল্‌ফ্রিতে যে মহাষণ্টাটা টাঙানো আছে, তাহার ওজন সাতান্ন টনেরও বেশী। ঐ ষণ্টা যখন বাদিত হয়, তখন সমস্ত মস্কাউ নগর গম্ভীর শব্দে পরিপূর্ণ হইয়া উঠে।

ক্রেমলিন্ হুর্গে বিরাট ষণ্টা ছাড়া একটি বিরাট কামান আছে। উহার ফাঁড় এত বড় যে, এক জন মানুষ সটান হইয়া তন্মধ্যে বসিতে পারে। ঐ কামান ১৮ ই ফুট লম্বা এবং উহার পাটা ১০ ইঞ্চি পুরু। ১৬৯৪ খৃষ্টাব্দে উহা নিশ্চিত হইয়াছিল। বিরাট কামানের নিকট আরও কতকগুলি বৃহৎ কামান আছে। যদিও সে গুলির ব্যাস (বেড়) তত বড় নহে, কিন্তু দৈর্ঘ্য ঐ কামানের অপেক্ষা বেশী।

ক্রেমলিন্ হুর্গে রুস্সজাটদের প্রাচীন বাসগৃহ আছে। উহা গথিক ধরণে নিশ্চিত। হুর্গস্থ রাজকীয় ধনাগার খুব প্রশংসার যোগ্য নহে। উহার গঠনপ্রণালী মোটামুটি রকমের। ক্রেমলিন্ হুর্গের পুরাতন রাজপ্রাসাদে

* ইংরেজি ২ পাউণ্ডে বাঙ্গালী দু/১০ ছটাক হয়।

পিটার দি গ্রেটের জন্ম হইয়াছিল। নেপোলিয়ন্ বোনাপার্ট মস্কাউ নগরে অবস্থান কালে এই প্রাসাদেই বাস করিয়াছিলেন। পর্ষাটকেরা এই প্রাসাদকে “বেলভিডিয়ার প্রাসাদ” বলিয়া থাকে।

রুসকর্তৃক পরাজিত কজান, সাইবিরিয়া, অস্ট্রাকান্, ক্রিমিয়া প্রভৃতি রাজ্যের রাজমুকুট এই দুর্গস্থ রাজভাণ্ডারে সংরক্ষিত আছে। রুস সম্রাজ্ঞী এন্ এবং সম্রাট দ্বিতীয় পিটার প্রভৃতিরও রাজ-মুকুট এখানে রহিয়াছে। কিক্ মূল্যবান্ মাণিক্যাদি রত্নগুলি অনেক মুকুটে নাই। সেগুলি লইয়া তাহাদের স্থানে অল্প মূল্যের প্রস্তর সংলগ্ন করা হইয়াছে। রাজভাণ্ডারের এক স্থানে একখানি হস্তিদন্তের বড় চিরুণী ও সোণা রূপার নানাবিধ কুঁজা, বাটি, গেলাস, রেকাব প্রভৃতি শোভা পাইতেছে। রুসিয়ার পূর্বতন রাজারা সেই চিরুণীতে স্বাক্ষর পরিষ্কার করিতেন। এক স্থানে একটি গোলাকার রৌপ্য বাস্ম আছে। পিটার দি গ্রেটের পিতা আলেক্সিস্ সাম্রাজ্যের ভিন্ন ভিন্ন প্রদেশের আইন কানুন সংগ্রহ করিয়া তন্মধ্যে রাখিয়া গিয়াছেন।

একটি কক্ষে পূর্বতন দেশোদ্ধারকারীদের পরিচ্ছদ ও অলঙ্কার সজ্জিত আছে। অলঙ্কারগুলি বহুমূল্য নানাবিধ রত্নে মণ্ডিত হওয়াতে তত্তাবতের শোভা ও চাক্চিক্য বিশেষরূপে বৃদ্ধি হইয়াছে। এক স্থলে মেরী মাগ্‌ডেলিনের অস্থি সংগৃহীত রহিয়াছে। রুসেরা বলে, ঐ সকল অস্থির রোগ প্রভৃতি বিনাশ করিবার ক্ষমতা আছে। অপর একটি ক্ষুদ্র কক্ষে ওনিফ্ নামক মণির উপরে ভার্জিন মেরী ও বিশুদ্ধষ্টের প্রতিমূর্তি খোদিত রহিয়াছে। ঐ মণিটির আকার দীর্ঘে ৩½ ইঞ্চি এবং প্রস্থে ২ ইঞ্চি। ঐ কক্ষের এক স্থানে অনেকগুলি রৌপ্যনির্মিত বৃহদাকার জালা আছে। সম্রাট পল ঐ সকল জালা দান করিয়াছিলেন। তন্মধ্যে ষোলটি জালা এত বড় যে, তন্মধ্যে তিন হইতে চার গ্যালন পর্য্যন্ত তৈল থাকিতে পারে। ঐ সকল জালায় উৎকৃষ্ট পবিত্র তৈল আছে। মস্কাউ হইতে ঐ তৈল চালান হইয়া সমস্ত রুসিয়ার অন্তর্গত গ্রীক চার্চে ধর্মকর্মের জন্ত ব্যবহৃত হয়।

ক্রেমলিন্ দুর্গের অন্তর্গত একটি ধর্মমন্দিরে গ্রীক ও স্লাভোনিক ভাষার অনেকগুলি হস্তলিখিত পুঁথি আছে। তন্মধ্যে শেষোক্ত ভাষারই পুঁথি অধিক। তা ছাড়া সেখানে মাইকেল ফিওডরোভিচের কত্কা এনের

স্বহস্ত-লিখিত একখানি বাইবেল আছে। উহার কাগজ, কালি ও লেখা বড় সুন্দর।

সেন্ট পিটার্সবর্গের চিত্রশালায় পিটার দি গ্রেটের স্বহস্তনির্মিত অনেক-গুলি জিনিষের কথা পূর্বে বলা হইয়াছে। মস্কাউ নগরের ক্রেম্লিন্ দুর্গেও তৎকৃত অনেকগুলি জিনিষ আছে। তন্মধ্যে একটি কাষ্ঠনির্মিত বাস্কের ভিতর পিটার দি গ্রেটের স্বাক্ষরিত একখানি পত্র আছে। তিনি ১৬৯৭ খৃষ্টাব্দে হলণ্ডের অন্তর্গত সার্ডম্ হইতে মস্কাউ নগরস্থ ধর্ম্মাধ্যক্ষকে উহা লিখিয়াছিলেন।

ক্রেম্লিন্ দুর্গে আর একটি অপূর্ণ সামগ্রী আছে। উহা “ক্রেম্লিন্ দুর্গের আদর্শ”। রাণী দ্বিতীয় ক্যাথারাইনের আদেশে ও ব্যয়ে জনৈক পারিস হইতে শিক্ষাপ্রাপ্ত রুস-ভাস্কর উহার নির্মাণ-ভার লইয়াছিলেন। নির্মাণ-কার্য সম্পূর্ণ না হইতেই উহার একটি ভিত্তি ভাঙ্গিয়া পড়ে। সুতরাং রাণীর আদেশে নির্মাণ-কার্য স্থগিত হইয়া যায়। বাই হোক, উহা যত দূর নির্মিত হইয়াছে, তাহাতে ৫০,০০০ পঞ্চাশ হাজার রুবল খরচ গড়িয়াছে। কিন্তু সম্পূর্ণ হইলে ৫,০০,০০,০০০ পাঁচ কোটি রুবল ব্যয় হইত।

এইবার মস্কাউ নগর সম্বন্ধে আরও কএকটি কথা বলিয়া এই অধ্যায় শেষ করা যাউক।

মস্কাউ নগর একটি বিস্তৃত সমতলভূমির উপর অবস্থিত। ইহার পরিধি ১৩ ক্রোশ, দৈর্ঘ্য ৪ ক্রোশ এবং বিস্তার ৩ ক্রোশ। এখানে মস্কুয়া, যাওসা ও নেগলিনিয়া নামে তিনটি নদী প্রবাহিত হইতেছে। ১৮১২খৃষ্টাব্দে নেপোলিয়ন্ বোনাপার্টের রুসিয়া আক্রমণের সময় এই নগরের তিন ভাগের দুই ভাগ অগ্নিতে দগ্ধ হইয়া গিয়াছিল। তার পর ১৮২৪ খৃষ্টাব্দে আবার নির্মিত হইয়াছে। ইহা চারি ভাগে বিভক্ত, ১ ক্রেম্লিন্ বা ক্রেমল* ; ২ কিতাই-গরদ ; ৩ বিলয়-গরদ বা শাদা শহর ; এবং ৪ জেমলিয়ানয়-গরদ বা মাটীর শহর। তা ছাড়া “প্লবডি” অর্থাৎ শহরতলী আছে।

প্রথম।—ক্রেম্লিন্ বা ক্রেমল। “মস্কুয়া নদীর উত্তর তটে এই অংশ

* তাতার ভাষায় ক্রেম্ বা ক্রেম্ অর্থে দুর্গ, কেল্লা, গড়। তা হইতেই ক্রেম্লিন্ বা ক্রেমল হইয়াছে।

অবস্থিত। ইহার চারি দিকে উচ্চ প্রাচীর। ক্রেমলিন ত্রিকোণাকার, প্রত্যেক কোণে বৃহৎ গোলাকার স্তম্ভ আছে। ক্রেমলিনের অন্তর্গত গৃহগুলি প্রায় প্রস্তর-নির্মিত। যেগুলির সমস্ত ভাগ প্রস্তরের-নয়, তাহাদের ভিত্তি প্রস্তরের ও উপরিভাগ ইষ্টকের। গৃহগুলির গায়ে শাদা, নারঙ্গী, হলুদে, নীল, সবুজ প্রভৃতি নানাবিধ রঙ। ক্রেমলিন বিভাগে বহু অটালিকা আছে, তৎসমস্তই রুস্ গবর্ণমেন্টের নিজের। এখানে অপর লোকের একখানিও বাড়ী নাই। ক্রেমলিনে ভার্জিন্ মেয়ী, সেন্ট মাইকেল প্রভৃতি চারিটি উৎকৃষ্ট ধর্মমন্দির আছে। ক্লার্ক সাহেব অত্রস্থ প্রাচীন রাজপ্রাসাদের কথা যাহা বলিয়াছেন, তাহা পূর্বে বলিয়াছি। তা ছাড়া এখানে একটি নূতন রাজপ্রাসাদ আছে। রাণী এলিজাবেথ্ উহা আরম্ভ করেন, কিন্তু সম্রাট পলের সময়ে উহার নির্মাণ-কার্য সমাধা হয়। ১৮১২ খৃষ্টাব্দে নেপোলিয়ন্ বোনাপার্টের সময়ে ঐ রাজপ্রাসাদ ধ্বংস হইয়া যায়। তার পর ১৮১৭ খৃষ্টাব্দে সম্রাট আলেকজান্ডার কর্তৃক উহা পুনর্নির্মিত হইয়াছে। উক্ত সম্রাট ইহা ছাড়া ক্রেমলিনে রাজকীয় চিত্রশালা নামে একটি বৃহৎ ও পরিপাটী বাটী নির্মাণ করেন। প্রাচীন রাজপ্রাসাদস্থ অনেকানেক অদ্বুত সামগ্রী সেই বাটীতে আনীত হইয়াছে। অত্রস্থ অস্ত্রাগার খুব বড়। ১৮১২ খৃষ্টাব্দে উহার কিয়দংশ বারুদাগ্নিতে উড়িয়া যায়। মস্কাউ হইতে নেপোলিয়ন্ বোনাপার্টের হাট্টিয়া যাইবার সময় রুস-সৈন্যগণ তাঁহার ৯০০ কামান কাড়িয়া লইয়াছিল। ঐ সকল কামান ক্রেমলিনের অস্ত্রাগারের চতুর্দিকে সজ্জিত আছে। ক্রেমলিনে অনেকগুলি সরকারী আফিস আছে, তন্মধ্যে রাণী দ্বিতীয় কাথারাইন্ কর্তৃক স্থাপিত সিনেট-গৃহই খুব উৎকৃষ্ট। কুডোফ্ মনাষ্টারি ও ভগ্নেনসেন্‌স্কই ননাবিও দেখিবার যোগ্য।

দ্বিতীয়।—কিতাই-গরদ বা চীনে শহর। ইহা মস্কাউ নগরের দ্বিতীয় অংশ, কিন্তু ক্রেমলিন্ বিভাগ অপেক্ষা আকারে বড়। অত্রস্থ গৃহগুলি ইষ্টক ও প্রস্তর-নির্মিত এবং নানা বর্ণে চিত্রিত। গৃহগুলির উপরে লোহার ছাদ। কিতাই-গরদের মধ্যস্থলে একটি উচ্চ স্তম্ভ আছে। সম্রাট পল, মিনি ও পোজাভ্‌ নামক দুই জন রুস-বীরের নামে উহা উৎসর্গ করিয়া

গিয়াছেন। ঐ দুই বীর সপ্তদশ খৃষ্টাব্দের প্রারম্ভে 'মস্কাউ হইতে' পোল-দিগকে তাড়াইয়া দিয়াছিলেন। এই বিভাগে ৯১০ হাজার দোকান আছে। ঐ সকল দোকানে নানাবিধ দ্রব্য বিক্রয় হয়। ক্রেতার দোকানের মধ্যে প্রবেশ করিতে পারে না, বাহিরে দাঁড়াইয়া ইচ্ছামত সামগ্রী ক্রয় করে। রাত্রিকালে কোন দোকানের মধ্যে আগুন বা আলো রাখিবার হুকুম নাই।

কিতাই-গরদে অনেকগুলি গির্জা আছে, তন্মধ্যে সেণ্ট নিকোলাস্ নামক গির্জাই সর্বাপেক্ষা প্রসিদ্ধ। 'তত্রস্থ লোকদের বিশ্বাস যে, মধি, মার্ক, লুক, জন, টাইট্‌স্ ও অপর কএক জন খৃষ্টধর্ম-প্রচারকের মৃত দেহ সেই গির্জায় প্রোথিত আছে।

মস্কাউ প্রদেশের শিশুনিবাস (Foundling Hospital) এই স্থানে আছে। উহা ১৭৬৩ খৃষ্টাব্দে নিৰ্ম্মিত হইয়াছে। এই শিশুনিবাসে প্রতি বৎসর প্রায় ১৫১৬ হাজার দরিদ্র বালক ও বালিকা সরকারী খরচে খাইতে পরিতে পায়। বালকেরা ২৪ বৎসর এবং বালিকারা ২০ বৎসর পর্যন্ত এখানে থাকে। তার পর তাহাদিগকে বিদায় দেওয়া হয়। এই শিশুনিবাসের একটি ফণ্ড আছে। ফণ্ডের টাকা অনেক। আর্চডিকন্ কন্স বলেন, ডিমিডফ্ নামে এক জন ধনী রুস ঐ ফণ্ডে এককালে কুড়ি লক্ষ টাকা দান করেন।

তৃতীয়।—বিলয়-গরদ বা শাদা শহর। পূর্বে এই বিভাগের চতুস্পাশ্ব শাদা দেওয়ালে ঘেরা ছিল বলিয়া এই নাম হয়। এক্ষণে শাদা দেওয়াল নাই। এখানে ধনীদিগের অনেক বাড়ী ও বড় বড় প্রাসাদ আছে। এই স্থলেই গবর্নর-জেনেরলের প্রাসাদ, মেডিকো-চিরার্জিকাল একাডেমি, পোষ্ট অফিস, থিয়েটার প্রভৃতি শোভা বিস্তার করিতেছে। অত্রস্থ সামরিক ব্যায়াম-মন্দির (Military exercise house) অতি প্রকাণ্ড। শীতকালে হাজার হাজার সৈন্য এক সঙ্গে সেই বাটীর প্রাঙ্গণে যুদ্ধ শিক্ষা করে।

চতুর্থ।—জেমলিয়ান-গরদ বা মাটীর শহর। এখানে প্রশংসার যোগ্য এমন কিছুই নাই।

পঞ্চম।—প্লভডি বা মস্কাউ নগরের শহরতলী। এখানে পল, গালিট্-জিন্, সিরিমৌফ্ প্রভৃতির স্থাপিত হাসপাতাল ও অনেকগুলি গির্জা আছে। তা ছাড়া অত্রস্থ জেলখানা ও হরিণবাড়ীও দ্রষ্টব্য বটে।

ব্যবহারিক শিল্প সম্বন্ধে পাঠক মহাশয়কে কএক স্থলের বিবরণ দেওয়া গেল। কিন্তু রুস রাজ্যের অনেক স্থানে আরও যে কতরূপ কাণ্ডকারখানা আছে, তাহা এই ক্ষুদ্র পুস্তকে লেখা অসম্ভব।

ঊনবিংশ অধ্যায় ।

জাতি ।

রুসিয়ায় নানাবিধ মানুষের বাস। নানা জাতি ; কাজেই ভাষা, আচার ব্যবহার, রীতি-নীতিও নানাবিধ। প্রধানতঃ ককেশীয় ও মঙ্গোলীয় বংশ হইতে রুসিয়ার সমস্ত জাতি উৎপন্ন হইয়াছে। ককেশীয় বংশোদ্ভব লোকদিগের সংখ্যা অনেক বেশী। মঙ্গোলীয় বংশোদ্ভব জাতির সংখ্যা রুসিয়া রাজ্যের সমস্ত লোকসংখ্যার শতাংশের একাংশ মাত্র।

রুসিয়ায় স্লাভোনীয় হুদ বা ফীন, তাতার বা তুর্কী, জর্মন, য়িহুদী এবং গ্রীক জাতি ককেশীয় বংশোদ্ভূত। সমস্ত লোকসংখ্যার দশ ভাগের এক ভাগ স্লাভোনীয় জাতি। স্লাভোনীয়েরা রুস, পোল, লিথুওনীয়, লেট্ট, বল্টীয় এবং সার্বভীয় প্রভৃতি বংশে বিভক্ত। তন্মধ্যে এক রুসেরাই সমস্ত লোকসংখ্যার তিন ভাগের দুই ভাগ হইবে। রুসেরা প্রধানতঃ রাজ্যের মধ্যস্থলে অর্থাৎ নিপার এবং ভল্গা নদীর মধ্যবিভাগে বাস করে। তাহারা অত্যাশ্রয় প্রদেশে অন্যান্য জাতির সহিত মিশিয়াও কালক্ষেপ করিয়া থাকে। রুসেরা বড় রুস (Great Russians) এবং ছোট রুস, (Little Russians) এই দুই ভাগে বিভক্ত। উক্রেইন নামক দেশে ছোট রুসেরা বাস করে। কসাক জাতি উহাদেরই সন্তান।

পোলেরা প্রধানতঃ পোলও প্রদেশে বাস করে। তা' ছাড়া বলিনিয়া, পোডোলিয়া এবং গ্রডনো রাজ্যেও তাহাদিগকে দেখা যায়। যদিও উহাদের আচার ব্যবহার রুসদের অপেক্ষা অনেক অংশে ভাল, কিন্তু ব্যবহারিক শিল্প জ্ঞান সম্বন্ধে তাহাদের তুল্য নয়।

উইল্‌না এবং মিংস রাজ্যে লিথুওনীয়েরা বাস করে। উহারা কৃষি-ব্যবসায়ী। কিন্তু আজিও তেমন সভ্য হইতে পারে নাই। লিথুওনিয়দের বাসস্থানের উত্তরে কোর্লণ্ড এবং নিভোনিয়া প্রদেশে লেটি জাতির বাস। রুগীয় ও লিথুওনীয় জাতির সহিত তাহাদের ভাষা মিলে না। উহারা কৃষিকার্য্য বই অন্য কার্য্য করে না। উহাদের মধ্যে যাহারা কোর্লণ্ডে বাস করে, তাহারা ‘কুর’ নামে অভিহিত হয়। সম্রাট আলেকজান্দারের সময় পর্য্যন্ত লিথুওনীয় ও লেটি জাতি জর্জর্গদিগের অধীন ছিল।

রেচ বা বল্লচীয় জাতি তুরস্কদেশের সীমাবর্তী বিশ্বাবিয়া রাজ্যে বাস করে। কতকগুলি সার্বভৌম জাতীয় লোককে তাহাদের সহিত বাস করিতে দেখা যায়। এম্ব্রানিয়া, ফিনলণ্ড, ল্যাপলণ্ড ও নিভোনিয়া প্রদেশে সুদ বা ফিন জাতির বাস। সুদ জাতির দুইটি বিভাগ, প্রাচ্য ও প্রতীচ্য। প্রতীচ্যদিগকে বল্টিক ফীন্ বলে। প্রাচ্য সুদেরা ইউরাল পর্ব্বতের পশ্চিম দিকে এবং মধ্য-ভল্গা নদীর তীরে বাস করে। কিন্তু এই উভয় সুদ বা ফীন্ জাতির মধ্যে ২৫০ ক্রোশ স্থান ব্যাপিয়া রুসেরা বাস করে। কিরুপে বা কখন্ প্রাচ্য ও প্রতীচ্য সুদ জাতির এরূপ স্বতন্ত্র ঘটয়াছে, বলা যায় না।

রুসিয়াবাসী ককেশীয় বংশের তৃতীয় শাখা তুর্কী। তাহারা সচরাচর তাতার নামে প্রসিদ্ধ। কিন্তু তাহাদের ভাষা তুর্কী ভাষা। তাহারা পূর্বে রুসিয়ার কোন অংশে বাস করিত না। নবম এবং ত্রয়োদশ শতাব্দীতে মঙ্গোল এবং অন্যান্য বিজেতৃজাতির সহিত তথায় আগমন করে। এক্ষণে রুসিয়ায় যে সকল তুর্কী আছে, উহারা কজানের তাতার, বস্কীর, মেসেরিয়েরক এবং নগে তাতার এই চারি ভাগে বিভক্ত। এই চারি প্রকার তুর্কীর মধ্যে কজানের তাতারগণ বিশেষ সভ্য। বস্কীরগণ ইউরাল পর্ব্বতের দুই পাশে বাস করে। আজিও তাহারা সর্ব্বদা ভ্রমণ করিয়া বেড়ায়। মেসেরিয়েরগণ বস্কীরদিগের সহিত একত্র বাস করে। এবং পশ্চিমাংশ ও মধ্য-চক্রের ব্যবসায় করিয়া থাকে। নগে * তাতারেরা ক্রীমিয়া এবং তত্রস্থ

* বোধ হয়, ইহাদের পূর্বপুরুষেরা পের্সিয়ানিক নাগবংশ ছিল। পশ্চিমবঙ্গ টড্‌ ব্লেন, তাতার দেশীয় নাগন্‌ নামক এক ব্যক্তির বংশধরগণ বোধ হয় হিন্দুপুরাণের নাগ ও তক্ষক জাতি। সুপ্রসিদ্ধ ইতিহাসবেত্তা দি গায়েন্‌ কর্তৃক তক্ষকগণ তক্ষক যোগল নামে অভিহিত হইয়াছে।

ষ্টেপে বাস করে। উহারা আজব্ সমুদ্র এবং ককেশন্ পর্বতের মূল পর্য্যন্ত ছড়াইয়া পড়িয়াছে। উহাদের মধ্যে কতকগুলি লোক পরিশ্রম করে এবং অপরগুলি ইতস্ততঃ ভ্রমণ করিয়া বেড়ায়।

যাহারা টিউটানিকবংশীয়, সম্ভবতঃ তাহারা তুর্কীদের অপেক্ষা সংখ্যায় বেশী। টিউটানিকবংশীয়েরা জর্জর্ন ও সুইড্। উহাদের সহিত কিয়দংশে জর্জর্ন ও দিনেমারেরা মিশ্রিত হইয়াছে। তর্জর্নবংশীয় অনেকগুলি লোক বল্টিক সাগরের নিকট, রুস রাজ্যের দুইটি রাজধানী, ভল্গা নদীর মধ্যাংশে এবং সমুদ্র-বন্দরে বাস করে। ফিন্‌লণ্ড উপসাগরের উত্তর এবং বোথনিয়া উপসাগরের পশ্চিম তীরে সুইড্‌গণকে দেখা যায়। ভিল্‌না, গ্রড্‌নো, ভলিনিয়া এবং পোডোলিয়া প্রদেশে যিহুদীরা বাস করে। ঐ সকল স্থানের নগরেই ইহাদিগকে অধিক পরিমাণে দেখা যায়। রাজ্যের দক্ষিণ অঞ্চলে গ্রীক জাতির বাস। তত্রস্থ গ্রীকেরা ব্যবসা বাণিজ্য করে। ক্রীমিয়া উপদ্বীপের কোন কোন গ্রাম কেবল গ্রীক জাতির দ্বারাই পরিপূর্ণ। ঐ সকল গ্রামবাসী গ্রীক কৃষি ও উদ্যানের কার্য করিয়া থাকে।

কালমুখ বা কান্নক * নামক জাতির শারীরিক গঠন দেখিলে ও ভাষা শুনিলে, উহাদিগকে মঙ্গোল বংশোদ্ভব বলিয়া নির্ধারণ করা যায়। ১৭৭০ এবং ১৭৭২ খৃষ্টাব্দে চীন গবর্নমেন্টের নিমন্ত্রণে কালমুখেরা সুজোরিয়া নামক স্থানের সমতল-ভূমিতে গিয়া বাস করিয়াছিল। রুসিয়া রাজ্যে যে সকল কালমুখ আছে, উহারা সুজোরীয় যাত্রীদিগের অবশিষ্ট। ইহারা রুসিয়ার দক্ষিণ-পূর্বস্থ উষর-ভূমিতে (Steppe) এ বাস করে। কালমুখ জাতি পাঁচ ভাগে বিভক্ত। এই পাঁচ ভাগের প্রথম ভাগের পরিবার সংখ্যা ১২,০০০; অবশিষ্ট চারি ভাগের লোকসংখ্যা একত্র করিলেও প্রথম ভাগের অপেক্ষা কিছু কম। গ্রীষ্মকালে ঐ জাতির এক দল সৈগা নামক হরিণ শিকার করিয়া বেড়ায়। কিন্তু শীতকালে কেবল গৃহপালিত পশুদিগের উপরই নির্ভর করে। উহারা পর্বতশৃঙ্গে পশু চারণ করিয়া থাকে। যে প্রদেশে অত্যন্ত মাত্রাও চাষযোগ্য ভূমি না থাকে, সেখানেও উহারা ৩০,০০,০০০ ঘোড়া, গরু, উট, ভেড়া, ছাগল লইয়া বাস করিতে পারে। উহাদিগের অঞ্চল হইতে যে সকল

* পুরাণে এই জাতির উল্লেখ দেখিতে পাওয়া যায়।

সামগ্রী রুসিয়ার অন্যান্য অঞ্চলে রপ্তানি হয়, তন্মারা ১৫,০০,০০০ টাকা পাওয়া যায়। ঐ সকল দ্রব্যের মধ্যে পশম, কেশ, বসা, মেঘ ও মেঘ-শাবকের চৰ্ম্ম এবং অন্যান্য চৰ্ম্মই বেশী। কালমুখেরা বৌদ্ধধর্মাবলম্বী। পূর্বে তিব্বত দেশের লাশা নগরস্থ দলোই লামার ধর্মব্যবস্থা-মতে উহারা চালিত হইত। কিন্তু ১৮০০ খৃষ্টাব্দে সম্রাট পল উহাদিগকে ইচ্ছামত স্বীয় লামা পছন্দ করিয়া লইতে বলেন। সেই নূতন লামার বিধি অনুসারে এক্ষণে উহারা বৌদ্ধধর্ম মানিয়া আসিতেছে। কালমুখেরা প্রকৃত পক্ষে অত্মাকানের শাসন-কর্তার শাসনে চলে না। উহাদিগের এক জন স্বতন্ত্র রাজনৈতিক দলপতি আছেন। সেই দলপতির উপাধি খাঁ। তিনি সেণ্ট পিটার্সবার্গ হইতে সম্রাট-প্রেরিত এক ব্যক্তি এবং আট জন মন্ত্রী ও বিচারপতির সহিত সমস্ত শাসন-কার্য্য করেন।

কালমুখেরা ঘোড়া, কুকুর, বিড়াল, ইজুর প্রভৃতি জন্তুর কাঁচা মাংস পর্য্যন্ত খায়। উহারা অশ্বদ্বন্দ্ব ও গোদ্বন্দ্ব হইতে কোমিস্ (Koumiss) নামক সুরা প্রস্তুত করিয়া পান করে। কালমুখ জাতির আকার দেখিয়া হঠাৎ স্ত্রীপুরুষ প্রভেদ করা যায় না। উহারা যদিও অসভ্য, তবু ল্যাপলাণ্ডার জাতি অপেক্ষা অনেক সভ্য। উহাদের তাঁবুতে অনেক প্রকার তৈজস পত্র, মাহুর ও বস্ত্র সজ্জিত থাকে। সেই সকল জিনিষ দেখিতে সুন্দর, উহাতে শিল্পকার্য্যের অনেক পরিচয় পাওয়া যায়। কালমুখ জাতি আর এক বিষয়ে প্রশংসার যোগ্য। উহারা বহুকাল হইতে কামানের বারুদ স্বষ্টি করিয়া আসিতেছে। কালমুখীয় স্ত্রীলোকেরা অশ্বারোহণ করিয়া পুরুষদের সঙ্গে ভ্রমণ করিতে পারে। কালমুখেরা ঘোড়দৌড়, কুস্তি, শিকার প্রভৃতি আমোদেই সর্বদা কাল যাপন করে। তাস, সতরঞ্চ খেলাতে উহারা নিকৃষ্ট নহে; তবে জুরা খেলাটা দোষের মধ্যে গণ্য করে না।

কালমুখ জাতি সঙ্গীত ভালবাসে। বললাইকা নামে উহাদের এক প্রকার ততবস্ত্র আছে। উহাতে কেবল দুই গাছি তাঁত বাঁধা থাকে। উহারা ঐ বললাইকা বীণা বাজাইয়া নাচ গাওনা করে। নাচিবার সময় উহাদের পা নড়ার চেয়ে হাত ও গা-ই বেশী নড়ে।

রুসরাজ্যে ষত প্রকার জাতি আছে, তন্মধ্যে কালমুখ জাতির শরীর-

গঠন, আচার ব্যবহার, রীতি নীতি অদ্ভুত। উহাদের আকার দেখিলে যেন দৈত্য বলিয়া বোধ হয়। কালমুখের চুল মোটা, রঙ কালো, ভাষা কর্কশ। আপ্লাও জাতি কালমুখ জাতি অপেক্ষা অনেক খর্ব। কালমুখ জাতি রুস-রাজ্য ব্যতীত তিব্বত, ভারতবর্ষ ও পারস্যের উত্তর সীমার বহির্ভাগে এবং চীনদেশেও অবস্থান করে।

কসাক জাতি কালমুখ জাতির সম্মান করে। এই ক্ষেত্রে ঐ উভয় জাতির মধ্যে বিবাহ-প্রথা প্রচলিত আছে। কালমুখগণের বুদ্ধি তীক্ষ্ণ। এই জন্য রুসিয়ার লোকেরা কালমুখ জাতীয় ভৃত্য রাখে। কালমুখেরা অন্যান্য পেক্ষা অল্প দিনের মধ্যে চিত্রবিদ্যা শিখিতে পারে।

রুসিয়ায় গ্রীষ্মীয় বা মেলো-রুস নামে আর এক জাতীয় লোক আছে। ইহাদের বাসস্থান দক্ষিণে এয়ি (Ae) নদী ও উত্তরে আজব সমুদ্রের মধ্যবর্তী ভূভাগ। তা' ছাড়া অন্যান্য স্থানেও ইহাদের বসতি আছে। মেলো-রুসেরা রুসিয়ার অন্যান্য জাতি অপেক্ষা অনেক সভ্য, পরিশ্রমী, সৎ, দয়ালু, নব্র, সাহসী, অতিখিসৎকারী ও ধার্মিক। ইহারা এরূপ অদ্ভুত পরিশ্রমী যে, যে স্থান উষর-মরু সন্দেশ, সেখানেও শস্য উৎপন্ন করিতে পারে। মেলো-রুসেরা গরুর গাড়ি করিয়া প্রত্যহ ১১১২ ক্রোশ পথ পর্যটন করে। ইহারা শরিকার পরিচ্ছন্ন। ইহাদের ঘরবাড়ীও পরিষ্কার ও চূর্ণকাম করা।

মেলো-রুসদের আকার ও মুখশ্রী পোলজাতির ন্যায়। কসাক জাতিও এইরূপ। মেলো-রুস ও ডন্-কসাকদের অবিবাহিতা স্ত্রীলোকদের পরিচ্ছদ একই রূপ। মেলো-রুসজাতি বড় আমোদপ্রিয়।

রুসসাম্রাজ্যে কসাক নামে এক প্রকার জাতি আছে। উহারা কএক শাখায় বিভক্ত। ডন নদীর বিস্তৃত তীর-ভূমিতে ডন্-কসাক জাতির বাস। ইহারা অতি তেজস্বী ও যুদ্ধপ্রিয়। শান্তি অপেক্ষা ইহারা সর্বদা যুদ্ধ করিতে বড় ভালবাসে। সাব্লা (Sabl) নামক অস্ত্রই ইহাদের প্রধান যুদ্ধাস্ত্র। পোল এবং মেলো-রুসেরা এই অস্ত্রকে সাবেল* (Sabel) বলে। ইহাদের পরিচ্ছদ দেখিতে ভাল, বিশেষতঃ টুপী অতি সুন্দর। টুপীতে কালো পশ-মের খোপ ও পালক সাজান থাকে। রুস গবর্ণমেন্ট কর্তৃক কসাকগণ

* আমাদের “দাবল” নামক যুগ্মনাস্ত্রের সহিত এই অস্ত্রটার নামের একত্ব আছে।

শস্ত্রের জন্ত নিষ্কর ভূমি ও মৎস্তের জন্ত জলাশয় পায়। ইহাদ্বিগকে কোন-রূপ রাজকর দিতে হয় না। যাহারা রাজসরকারে সৈন্তসংক্রান্ত কার্য্য করে, তাহারা পঁচিশ বৎসরের পর সম্পূর্ণ স্বাধীন হয়; পরে আর চাকুরি করিতে হয় না।

ডন নদীর তীরের কজনকায়া ও তুর্লোগকায়া নগরে কসাকজাতীয় অনেক গণ্য মান্ত লোক বাস করে। কসাকেরা মৎস্ত-ধারণে বড় নিপুণ। কসাকজাতীয় একটি অষ্টমবর্ষীয় বালকও ডন নদী হইতে আধ পাউন্ড * বা আধ পুন্ড ওজনের মৎস্ত ধরিতে পারে।

কসাকজাতীয় স্ত্রীলোকেরা বড় সুন্দরী। উহারা পুরুষদের সঙ্গে একত্র হইয়া নৃত্য করে। কসাকীয় নৃত্য, তাতার ও চীন জাতির নৃত্যের ন্যায়। কসাকেরা সঙ্গীতামোদের জন্মর ব্যাগ্‌পাইপ্ (তুব্‌ড়ী যন্ত্রবিশেষ) নামক বাদ্য-যন্ত্র বাজায়। ডন্-কসাকজাতীয় লোকেরা নৃত্য গীতের সময় অলীলতা ব্যবহার করে। এরূপ দোষ প্রায় সকল জাতিরই দেখিতে পাওয়া যায়।

ডন্-কসাক জাতির প্রধান নগরের নাম সর্কান্‌স্ক, অপর নাম শ্চরচান্‌স্কয়। কসাকেরা বড় সুরাপায়ী। যদি প্রস্তুত সুরা বড় তীব্র হয়, তবে ইহারা উহাতে কিঞ্চিৎ লবণ মিশ্রিত করিয়া পান করে।

পূর্বে কসাকেরা রুসীয় সৈন্যদলে প্রবিষ্ট ছিল না। ১৫৭৯ খৃষ্টাব্দে ইহারা রুসীয় সৈন্তসংক্রান্ত কার্য্যে প্রবেশ করে। ১৭৩৪ খৃষ্টাব্দে কসাকেরা অন্য স্থান হইতে ভল্গা নদী তীরস্থ প্রদেশে সর্বপ্রথম উপনিবেশ স্থাপন করে। এক্ষণে কসাক জাতির এই কয়টি শাখা দেখিতে পাওয়া যায়—ডন্-কসাক, মেলো-রুসীয় কসাক, কৃষ্ণসাগরীয় বা চার্গোমস্কি কসাক, ভল্গার কসাক, গ্রিবেন্‌স্কয়ের কসাক, ওরেনবুর্গের কসাক, ইউরাল্‌ আল্‌সের কসাক ও সাইবিরিয়ার কসাক।

ডন্-কসাকজাতির সাইবিরিয়ার কসাক-শাখাই সর্বপ্রধান। ষোড়শ শতাব্দীতে ডন নদীর তীর হইতে এক দল বীর্য্যশালী কসাক-সৈন্ত পূর্ব দিকে বহু দূর গমন করিয়াছিল। ঐ সৈন্যদলের সংখ্যা ছয় সাত হাজার। দলপতি

* রুসীয় ওজন পরিমাণ। এক পাউন্ডে ইংরেজি ৩৬ পাউন্ড বা বাঙ্গালা ১৭৯০ মাড়ে সত্তর সের হয়।

বা সেনাপতির নাম জের্মাক্ । তিনি সেই সৈন্তগণকে লইয়া পার্শ্বা দেশ ভেদ করিয়া যেখানে উপস্থিত হইয়াছিলেন, সেই স্থানই আজ সাইবিরিয়া নামে প্রসিদ্ধ । মহাবীর জের্মাকের বীর্যবলে এশিয়ার সমস্ত উত্তর ভাগ— সাইবিরিয়া দেশ এক্ষণে রুসিয়ার অধিকার-ভুক্ত ।

কসাক জাতির আচার ব্যবহার, রীতি নীতি, শারীরিক গঠন ইত্যাদি দেখিলে, উহাদিগকে আমাদের পুরাণ-বর্ণিত ‘শক’ জাতিকে মনে পড়ে । নামের সন্ধেও ঐক্য দেখা যায় । *

তাতার দেশ পূর্ব ও পশ্চিম এই দুই প্রধান ভাগে বিভক্ত । মুসল-মানেরা পশ্চিম ভাগকে তুরাণ কহে, ইহাকে পাশ্চাত্য তুর্কিস্তানও বলে । তুরাণ কতকগুলি ক্ষুদ্র রাজার রাজ্য ছিল ; কিন্তু সম্প্রতি রুসিয়ার জার সেই সকল রাজাকে পরাজয় করিয়া আপনার আধিপত্য বিস্তার করিয়াছেন । তাতারের পূর্ব ভাগ চীনের অধীন, ইঙ্গরেজেরা উহাকে চাইনিজ্-টার্টারি অর্থাৎ চীন-তাতার বলে । তুরাণ বা তুর্কিস্তান ছয় ভাগে বিভক্ত ; তুর্কিস্তান, থিবা, বুখারা, খোকন, তুর্কমানিয়া ও কুন্দজ । তুরাণে নানা জাতির বসতি । তন্মধ্যে তাজিক ও উজ্বেগ নামক দুইটি জাতি অপেক্ষাকৃত সভ্য ও পরিণামী । ইহারা বুখারা, খোকন ও কুন্দজ প্রদেশে বাস করে । পারস্য, ভারতবর্ষ, তিব্বত ও চীনদেশের লোকের সহিত ইহারা বাণিজ্য করিয়া থাকে । অবশিষ্ট সমুদায় অধিবাসী অসভ্য । পাণ্ডপাল্যই উহাদিগের একমাত্র জীবিকা । যখন যেখানে তৃণ ও জলের সুবিধা দেখে, তখন সেইখানে গিয়া অবস্থিতি করে ।

* হরিবংশের ১১৪শ অধ্যায়ে লিখিত আছে, কালযবন শক, তুগার, দরদ, পারদ, খশ ও পহ্লব প্রভৃতি শত শত পার্শ্ববর্তী স্লেচ্ছগণের সহিত মথুরাপ্রদেশে ঐক্যবন্ধে আক্রমণ করিতে গিয়াছিলেন । এ দিকে দেখা বাইতেছে, শক=Sythians ; জাকজাটি'স্ ও অক্স' নদীর মধ্যস্থলে তোখারিস্তানের লোক তুখার বা তুয়ার ; দর্দিস্তানের লোক দরদ ; পারদ=Parthians ; পহ্লব=পারস্যের পূর্বে ইহাদের বাস, ইহাদের ভাষা Pehlvi বা পালী । এই সকল জাতির নিবাস মধ্য-এশিয়ায় । হিন্দু-পুরাণে শকদ্বীপ বলিয়া যে একটি স্থানের কথা লিখিত আছে, উহাও মধ্যএশিয়ার অবস্থিত । হিরোডোটস, টানিটস্, প্লিনি, টলেমি প্রভৃতি প্রাচীন পাশ্চাত্য পণ্ডিতেরা এই স্থানকে মিথিয়া বলিয়া গিয়াছেন । আরও তাহার। এই প্রদেশে শকি (Sack) নামে একটি জাতির কথা বলিয়াছেন । আর্যদের বিবেচনায় বর্তমান কসাকেরাই প্রাচীন শকদের সন্তান । বাবিলক ভাষায় “কো” শব্দের অর্থ পুঙ্খিত । পুঙ্খিতে বাস করিত বলিয়া কো-শক বা কসাক নাম হইয়াছে ।

সেখানকার সমুদায় নিঃশেষ হইলে স্থানান্তরে চলিয়া যায়। এইরূপে উহাদিগকে সর্বদাই স্থান ত্যাগ করিতে হয়। সুতরাং উহাদিগের নিয়মিত বাসস্থান নাই, মেঘ-মাংস উহাদিগের প্রধান আহার; অশ্বমাংস পরম সুখাদ্য। উহারা সচরাচর গবী, অশ্বা, ছাগী, হরিণী ও উষ্ট্রীর দুগ্ধ পান করে। উহাদের কেহ কেহ অশ্ব, উষ্ট্র ও উৰ্ণা বিনিময় করিয়া অন্তর্দেশীয় লোকের নিকট হইতে অস্ত্র ও অস্ত্রাস্ত্র প্রকার দ্রব্য লইয়া থাকে। দাস-বিক্রয় উহাদের এক প্রধান ব্যবসায়। রুসিয়া ও পারস্যের প্রান্তভাগে কি স্ত্রী কি পুরুষ, যাহাকে দেখিতে পায়, সন্মোগ পাইলে তাহাকে ধরিয়া আনে। পরে ঐ হতভাগ্য ব্যক্তিকে দাসরূপে বিক্রয় করে। এ দেশের অধিকাংশ লোক মুসলমান-ধর্মাবলম্বী।

তুরাণের লোকেরা ছয় সপ্তাহ অন্তর কোন এক নূতন স্থানে গমন করে। উহাদের স্ত্রীলোকেরাই স্থানান্তরে যাইবার সময় তাঁবু স্থলিয়া বাঁধে এবং উটের পিঠে উঠাইয়া দেয়। অতীষ্ট স্থানে গিয়া পুনর্ব্বার তাঁবু স্থাপন করে। কিন্তু পুরুষেরা অতি অলস, কেবল তাঁবুর নিকট বসিয়া ধূম-পান ও মদিরা-পান করে। স্ত্রীলোকেরা কৃষিকার্য্য ও পশুপালন করিয়া থাকে। পুরুষেরা অশ্বারোহণ করিতে ভালবাসে বলিয়া অশ্বগণকেই অবিরত যত্ন করে। তাতারদেশীয় লোকেরা অশ্বারোহণে সর্ব্বাপেক্ষা পটু। তুরাণে উত্তম রূপ কৃষিকার্য্য হয় না বলিয়া, পশু-মাংসই তুরাণীদের প্রধান খাদ্য। অশ্বমাংসের ত্রায় উহারা গোমাংস ও মেঘমাংসও ভক্ষণ করে। এ দেশে চা-পান খুব প্রচলিত। তুরাণীরা চৈন-পরিচ্ছদই সর্ব্বাপেক্ষা ভালবাসে। চীন দেশের সম্রাট তাতার-বংশোদ্ভূত।

রুসিয়ার অন্তর্ভুক্ত অস্ত্রাকান প্রদেশে তাতার, রুস, হিন্দু এবং আর-মাণীরা বাস করে। উহারা সামুদ্রিক মৎস্য ও লবণের বাণিজ্য করিয়া থাকে।

তুর্কমান তাতারেরা অস্ত্রাস্ত্র তাতারগণের ত্রায় নহে। ইহারা বুখারা ও পারস্যের অন্তর্গত দেশে মনুষ্য চুরি করে। বুখারায় ঐ সকল অপ্লুত মনুষ্য ক্রীতদাস রূপে বিক্রীত হয়। তুর্কমান তাতারেরা সশস্ত্রে দলবদ্ধ হইয়া অশ্বারোহণ পুর্ষক পারস্যের কোন এক নগরে আপতিত হয় এবং শত শত মনুষ্য

ও পশু অপহরণ করিয়া আপনাদের তাঁবুতে পলায়ন করে। এই জাতি বড় নিষ্ঠুর; ইহারা যাহাদিগকে ধরিয়া আনে, তাহাদের মধ্যে যাহারা বৃদ্ধ থাকে, তাহাদিগকে নিহত করে। বৃদ্ধ ক্রীতদাসের মূল্য বেশী হইবে না বলিয়াই পাগিষ্ঠেরা এইরূপ নৃশংসের কার্য্য করে। ছুরাঙ্গারা চৌর্য্য-কার্য্যে কৃতকার্য্য হইলে অপহৃত ব্যক্তিদিগের মধ্যে এক জনকে আপনাদিগের দেবতার নিকট বলি দেয়। ছুরাচারেরা মুসলমান ধর্ম্ম মানে বটে, কিন্তু ইকোরান বা মসিদের কোন ধার ধাবে না। ডাকাতি ইহাদের প্রধান উপজীবিকা। ডাকাতি করিবার জন্তই ইহারা অখারোহণ ও যুদ্ধ-শিক্ষা করে। তুর্কমান-তাতারেরা অস্ত্রাত্ম তাতারদের ত্রায় তেমন অশ্ব-মাংস-প্রিয় নয়, কিন্তু মেঘমাংস খুব ভাল-বাসে। যখন ইহারা কোন অতিথিকে আহারের জন্ত নিমন্ত্রণ করে, তখন একটা বৃহৎ কটাহে একটা গোটা ভেড়া সিদ্ধ করে। তার পর ঐ মাংস খণ্ড খণ্ড করিয়া ঝোল সমেত এক একটা কাষ্ঠপাত্রে কতকটা করিয়া ঢালে। প্রত্যেক পাত্রে দুই জন লোক আহার করিতে বসে। ইহারা পাত্র হইতে হস্তদ্বারা মাংসখণ্ড তুলিয়া লয় এবং কুকুরের ত্রায় মাংস-মাখা ঝোল চাটিয়া খায়। তুর্কমান-তাতারদের পুরুষেরা কৃষ্ণ মেঘচর্ম্মের টুপী এবং স্ত্রীলোকেরা উচ্চ শ্বেত পাগুড়ী পরিধান করে। স্ত্রীলোকেরা উত্তমরূপ সূচীকার্য্য জানে। তাহাদের কৃত ভাল ভাল গালিচায় তাঁবুগুলি সজ্জিত হয়।

রুসিয়ার অন্তর্ভুক্ত সার্বকেসিয়া প্রদেশে সার্বকেসীয় জাতির বাস। পৃথিবীর মধ্যে এই স্থানের লোকেরাই সর্ব্বাপেক্ষা অতিথি-ভক্ত। নিতান্ত দরিদ্র পরিবারদিগের মধ্যেও একটি করিয়া অতিথিশালা আছে। কোন কোন অতিথিশালায় ১০টি হইতে ১০০টি টেবিল সাজান থাকে। অতিথিরা দলবদ্ধ হইয়া তথায় আহার করে। সার্বকেসীয় স্ত্রীলোকেরা বড় সুন্দরী। কিন্তু এরূপ সুন্দরী হইলেও হিন্দু, চীন এবং তুরস্কদেশীয়া স্ত্রীলোকের ত্রায় অবরুদ্ধ থাকে না। তাহারা অতিথিশালায় গিয়া অতিথিগণের সহিত সাক্ষাৎ করে না। কিন্তু অতিথিরা নিমন্ত্রিত হইয়া তাহাদিগের সহিত সাক্ষাৎ করিবার জন্ত বাস-বাটীতে আইসে। দেহের চমৎকার রূপই সার্বকেসীয় রমণীদের এক প্রকার কালস্বরূপ। কারণ নিষ্ঠুর তুর্কিরা অনেক সুন্দরী সার্বকেসীয়

রমণীকে ক্রয় করিয়া লইয়া যায়। সার্কেসীয় বালিকারা পর্য্যন্ত পশম, শণ ও পাট দ্বারা উত্তম উত্তম কাপড় বুনিতে পারে।

সার্কেসীয় পুরুষেরাও পরম সুন্দর। যুদ্ধই উহাদিগের প্রধান কার্য্য। কৃষিকার্য্য এবং গৃহকার্য্য স্ত্রীলোক, বালক এবং ক্রীতদাসগণের প্রতি অর্পিত হয়। পুরুষেরা যুদ্ধ-কার্য্যেই লিপ্ত থাকে। প্রত্যেক পুরুষের সঙ্গে বন্দুক, পিস্তল, ছোরা ও ডরবারি থাকে। সম্ভ্রান্তদিগের সঙ্গে ধনু ও বাণপূর্ণ ভূণ থাকে। এই সকল অস্ত্র দ্বারাই তাহাদিগের মধ্যে ভদ্রাভদ্র চিনিতে পারা যায়। সার্কেসীয়দিগের পরিচ্ছদ কৃষ্ণবর্ণ, তাহার গঠন মোটামুটি। মেঘ বা ছাগ-চর্ম্মের টুপী বড় আদরের জিনিষ।

বালকেরা শৈশব অবস্থা হইতেই শরীর শক্ত করিতে শিক্ষা করে। তিন বৎসর বয়সের সময় অভিভাবকেরা বালকদিগকে গৃহে না রাখিয়া এক জন অপরিচিত লোকের হস্তে সমর্পণ করে। বাটীতে থাকিলে পিতা মাতার অত্যন্ত আদরের হইবে বলিয়া এইরূপ করা হইয়া থাকে। সেই অপরিচিত ব্যক্তিকে পালক-পিতা বলে। সেই ব্যক্তি প্রতিপাল্য বালককে অধারোহণ এবং লক্ষ্যভেদ শিক্ষা দেয়। বালক অধারোহণে পালক-পিতার সহিত উচ্চ পর্ব্বতের উপর আরোহণ করিতে শিক্ষা করে; ভয়ঙ্কর অন্ধকারময় উপত্যকা মধ্যে ধাবিত হয়। এইরূপে ক্রমাগত শিক্ষা লাভ করিয়া বয়ঃস্থ ও সবল হইলে পর পিতা মাতার নিকট গমন করে।

জর্জিয়া রাজ্য রুসিয়ার অন্তর্গত। সার্কেসিয়া অপেক্ষা এই রাজ্য অধিক উর্ব্বর। কিন্তু অত্রস্থ লোকেরা তেমন সুন্দর ও পরিশ্রমী নহে। সার্কেসীয় রমণীরা যেমন সূচীকার্য্যে নিপুণা, জর্জিয়ার রমণীরা সেইরূপ শয়ন-সুখাভিলাষিনী। এই সকল রমণী আপন আপন মুখে ও ভ্রতে নানা-বিধ চিত্র করিয়া থাকে। মস্তকে টিয়ারা (Tiara) নামক এক প্রকার অমূল্য মুকুট ধারণ করে।

জর্জিয়ার লোকেরা অত্যন্ত সুরাপায়ী। এক জন সামান্য মজুরও প্রত্যহ পাঁচ বোতল মদ্য পান করে। ইহাদিগের মদের পিপাও অতি অদ্ভুত। ইহার একটা মহিষের লাজুল ও পদ সমেত আদত চামড়ার খোলে সুরা পরিপূর্ণ করিয়া রাখে। উহা দেখিলে বোধ হয়, যেন একটা জীবন্ত মহিষ শুইয়া আছে

জর্জিয়ার লোকেরা রুসিয়ার গ্রীক-চর্চ-মতাবলম্বী হুষ্টান ।

সাইবিরিয়ায় যে কএক প্রকার জাতি আছে, তন্মধ্যে অস্তিয়াক্ ও সাময়েদ্ জাতিই অপেক্ষাকৃত প্রসিদ্ধ । অস্তিয়াক্দের গৃহ বাক্সের ন্যায় আকারবিশিষ্ট । গৃহে একটি মাত্র দরোজা থাকে ; কিন্তু উহা এত ক্ষুদ্র যে, অল্পবয়স্ক বালক বালিকা ব্যতীত অগ্ৰকে অনেকটা নত হইয়া গৃহমধ্যে প্রবেশ করিতে হয় । দরোজার ত্রায় গৃহের জানালাও একটি । উহাতে কাচের বদলে মাছের ছাল আঁটা থাকে । গৃহের মধ্যে একটি গর্ভে দিব্য-রাত্র অগ্নি জ্বলে । সাইবিরিয়ায় অত্যন্ত শীত বলিয়াই এইরূপ ধরণে গৃহ নির্মিত হয় । অস্তিয়াকেরা একটা বৃহৎ গামলায় খাদ্যদ্রব্য রাখিয়া সকলে এক সঙ্গে আহার করে । কখনও কখনও তাহাদের কুকুরেরাও তাহাদের সঙ্গে আহার করিয়া থাকে । অস্তিয়াক্ জাতির বাড়ীতে স্বতন্ত্র কুঠরী থাকে না, ঘোড়ার আস্তাবলের ত্রায় কাঠের বেড়া থাকে । উহারা তন্মধ্যে মৃগচর্ম পাতিয়া শয়ন করে । প্রত্যেক লোক নিজের ঘেরায় আহার, উপবেশন ও শয়ন করে । কেবল আগুন পোহাইবার সময় সকলে একত্র হয় ।

অস্তিয়াক্ জাতি যদিও দরিদ্র, তথাপি তাহাদের অনেক কুকুর আছে । ঐ সকল কুকুর খুব চতুর, ও তাহারা অশ্বের কার্যও করে । এক জন অস্তিয়াক্ একটা কুকুরের উপর আরোহণ করিয়া স্থায় গন্তব্য স্থানে গমন করিতে পারে । কুকুরকে বেত্রাঘাত করিতে বা তাহার মুখে লাগাম দিতে হয় না । ইঙ্গিত-বাক্য বলিলেই সে আরোহীর ইচ্ছানুসারে যায়, আসে ও থামে । ঐ সকল কুকুর খেত বর্ণ, গাত্রে ক্ষুদ্র ক্ষুদ্র কাল দাগ । উহাদের শরীরের অপেক্ষা লাঙ্গলের লোমই দীর্ঘ ও মনোহর । কখন কখন দুইটা কুকুর জোয়াল কাঁধে করিয়া স্থায় প্রভুর চক্রহীন শকট টানিয়া লইয়া যায় । বৃহৎ চক্রহীন গাড়ী টানিতে হইলে ১২টি কুকুরের প্রয়োজন হয় । যখন কুকুরদিগকে সাজ পরাইবার প্রয়োজন হয়, তখন তাহাদিগকে কাছে ডাকিলেই আপনারা ষাড় পাতিয়া দেয় । ঘোড়ার ত্রায় ধরা বাঁধা করিয়া সাজ পরাইতে হয় না । কিন্তু ঐ সকল কুকুর গাড়ী টানিবার সময়ে প্রথমতঃ ভয়ানক চীৎকার করিতে থাকে, কিয়ৎকাল পরে নীরব হয় । অস্তি-

য়াকেরা একটা উচ্চ স্থান নির্মাণ করিয়া খাদ্যদ্রব্য রক্ষা করে। পাছে তাহাদের কুকুরেরা খাদ্যদ্রব্য চুরি করে, এই জন্ত এইরূপ উচ্চ স্থানের প্রয়োজন হয়। অস্ত্রিয়াকেরা পশমী পরিচ্ছদের জন্ত কখন কখন উৎকৃষ্ট কুকুর নিহত করে।

অস্ত্রিয়াকদের কুকুর ব্যতীত বল্লা-হরিণ সম্পত্তিও আছে। উহারা অতি শাস্ত। অস্ত্রিয়াকেরা সহজে উহাদের দ্বারা শকট-চালনা করে। এক একখানি বৃহৎ শকটে সারি বাঁধিয়া চারিটি বল্লা-হরিণ সংযোজিত হয়। যে হরিণটি সর্বপ্রথমে থাকে, কেবল তাহারই মস্তকে বল্লা (লাগাম) বাঁধা থাকে। পশ্চাদ্বর্তী তিনটি হরিণ কম্পাসের মধ্যে অবস্থান করে। বল্লা-হরিণেরা শকট লইয়া পর্বতে আরোহণ করিতে পারে। দৌড়িয়া যাইবার সময় লাফাইয়া যায়। বহু দূর গিয়া যখন ক্লান্ত হয়, তখন শুইয়া গড়ে। কিয়ৎকাল বরফের উপর মুখ চাপিয়া রাখে; শীতল হইলে আবার শকট টানিতে থাকে। বল্লা-হরিণের পৃষ্ঠ অপেক্ষা স্বল্পদেশ দৃঢ়, এই জন্ত অস্ত্রিয়াকেরা উহাদের স্বল্পদেশপরি আরোহণ করে। বল্লা-হরিণদিগকে কোন খাদ্য দিলে খায় না। উহারা পর্বতের উপর ভ্রমণ করিয়া এক প্রকার শৈবাল ভক্ষণ করে। কেহ হাতে করিয়া উহা তুলিয়া দিলে মুখ বন্ধ করিয়া থাকে। সাইবিরিয়ার বল্লা-হরিণেরা আমাদের দেশের স্বপাকতোজী না কি?

বল্লা-হরিণ জীবনে মরণে অস্ত্রিয়াকদের ব্যবহারে লাগে। মৃত বল্লা-হরিণের চৰ্ম্মে অস্ত্রিয়াক জাতির পরিচ্ছদ হয়। কি পুরুষ, কি স্ত্রী, সকলেই চৰ্ম্মে আপাদমস্তক আবৃত করে, কেবল মুখ খোলা থাকে। তা'ও আবার হস্তসংলগ্ন সলোমচৰ্ম্মনির্মিত দস্তানায় বারংবার ঢাকিতে হয়, নহিলে শীতের দাপটে ফাটিয়া যায়। অস্ত্রিয়াকদের ধনুক নিজেদের আকার অপেক্ষা লম্বা। উহারা সেই ধনুকে নৌহফলা-সংযুক্ত লম্বা লম্বা তীর বসাইয়া নিক্ষেপ করিয়া বহু পশু বিনাশ করে। রুস্ সম্রাটের নিকট প্রতি বৎসর প্রত্যেক অস্ত্রিয়াককে দুইটি করিয়া শাবল (শাবর) জন্তর চৰ্ম্ম করস্বরূপ পাঠাইতে হয়। এই জন্ত উহারা অত্র জন্ত অপেক্ষা শাবল শিকার করিতে সর্বদা চেষ্টা করে। শাবলের লোমে রুসীয় সম্রাটদের উৎকৃষ্ট পরিচ্ছদ প্রস্তুত হয়।

অস্ত্রিয়াকেরা যখন বন্ধা-হরিণের চর্মে আপাদমস্তক আচ্ছাদন করিয়া শিকার করিতে বাহির হয়, তখন তাহাদিগকে শাদা ভালুকের মত দেখায়। শিকারের সময় উহারা বরফ-জুতা পায়ে দেয়, নহিলে বরফে ডুবিয়া মরে। দুইখানা চওড়া কাঠে বরফ-জুতা প্রস্তুত হয়। উহার দুই মুখ নৌকার তায়। অস্ত্রিয়াকেরা ঐ জুতা পায়ে বাঁধিয়া ইচ্ছামত যাত্রায়াত করিতে পারে, কোনরূপ বিপদের আশঙ্কা থাকে না।

অস্ত্রিয়াক্ জাতির ধর্ম ও অদ্ভুত। উহারা এক ঈশ্বর স্বীকার করে, কিন্তু অগ্নাত্ত দেবতারও পূজা করিয়া থাকে। তা' ছাড়া আরও ব্যাপার আছে। কোন ব্যক্তির মৃত্যু হইলে, আত্মীয়েরা তাহার কাঠনির্মিত মূর্তি স্থাপন পূর্বক ক্রমাগত তিন বৎসর কাল পূজা করিয়া শেষে ভূগর্ভে প্রোথিত করে। পুরোহিতের মৃত্যু হইলে তিন বৎসরে পূজা শেষ হয় না—পাঁচ ছয় বৎসর লাগে। কখন কখন কোন মৃত পুরোহিতের কাঠমূর্তি চিরকালের জন্য পূজিত হয়। এ-তো গেল মরা মানুষ-পূজার কথা। মরা পশুও অস্ত্রিয়াক্ জাতির দেবতা! উহারা ভালুক, নেকড়ে বাঘ বা অন্য কোন হিংস্র জন্তু নিহত করিলে, তাহার অস্ত্রাদি বাহির করিয়া লয়। অস্ত্রশূন্য উদরে খড়্‌ কুটা প্রিয়া যেমন পেট তেমনি করে। পরে সকলে মিলিয়া সেই মৃত পশুটাকে লাথি মারে, মুখভঙ্গি করে, তাহার চোকে মুখে খুঁখু দেয়। অবশেষে সেটাকে কুটীরের একটা কোণে দাঁড় করাইয়া ভক্তিভরে পূজা করে। এরই নাম “জুতো মেরে দণ্ডবৎ!”

অস্ত্রিয়াকেরা পূজার সময় চীৎকার করিয়া নৃত্য ও অস্ত্রচালনা করে। ইষ্ট দেবতাকে সোণা, রূপা, পশুলোম ও বন্ধা-হরিণ উপহার দেয়। ছুরাঝারা দেবতার তৃপ্তির জন্য বন্ধা-হরিণকে অতি নিষ্ঠুরের তায় নিহত করে। খামিয়া খামিয়া গায়ে অস্ত্রাঘাত করাতে নিরীহ হরিণ যার-পর-নাই কষ্ট পায়।

রুসসম্রাট অস্ত্রিয়াক্দিগকে খৃষ্টান করিবার জন্য বস্ত্র ইত্যাদি পাঠাইয়া দেন। অল্পসংখ্যক অস্ত্রিয়াক্ লোভে গুড়িয়া খৃষ্টান হইয়াছে। রুসসম্রাট এ দিকে যেমন, আর দিকে তেমন নহেন। তিনি টাংকার লোভে অস্ত্রিয়াক্দের নিকট মদ পাঠাইবারও অনুমতি দেন। একে তো অস্ত্রিয়াকেরা যার-পর-নাই অসভ্য, তার উপর আবার মদ! ইহাতে শুভ না অশুভ ঘটে? আমা-

দের ইংরেজরাজও এ বিষয়ে টেকা দিয়াছেন ! “এক ভদ্র আর ছার ; দোষ গুণ ক’ব কা’র ?”

সাইবিরিয়ার সর্বোত্তরে উত্তর সাগরের নিকট সামোয়েদ জাতির বসতি । এই জাতি রুসসম্রাটের অধীন বটে, কিন্তু রুসজাতিকে কদাচিৎ দেখিতে পায় । ভয়ঙ্কর শীত বসিয়া রুসেরা ইহাদের দেশের দিকে যাইতে চাহে না । সামোয়েদগণ বন্যা-হরিণের চৰ্ম্মে তাঁবু নিৰ্ম্মাণ করিয়া বাস করে । ইহারা অস্ত্র-যাক্ জাতি অপেক্ষা অধিকতর অসভ্য । ইহাদের স্ত্রীলোকেরা-অদ্ভুত রকমের পরিচ্ছদ পরিধান করে । সেই পরিচ্ছদে নানা প্রকার পশুलोম ও চৰ্ম্ম সংযুক্ত থাকে । মস্তকে থোপাদার টুপী । মস্তকের পশ্চাতে চুলের বেণী সহিত গ্লটন নামক জন্তুর সুদীর্ঘ লাজুল ঝুলিতে থাকে । সেই বেণী ও লাজুলের শেষ ভাগে পিত্তল-চাক্তির গোছা বন্ধু করিয়া বাজে ।

যেমন বেশ ভূষা, তেমনি খাদ্য ! সামোয়েদ জাতির পোশাক দেখিলে হাসি আসে, খাবার দেখিলে ভয় পায় । জুখার সময় একটা বন্যা-হরিণ হত্যা করিয়া সকলে মিলিয়া তাহার কাঁচা মাংস খাইয়া ফেলে । খাইবার সময় স্কলের মুখে গালে কাঁচা মাংসের কাঁচা বৃত্ত মাখামাখি হইয়া অতি ভীষণ হইয়া উঠে । হাড় হইতে মাস কামড়াইবার কায়দা দেখিলে বাষেও লজ্জা পায় ।

সাইবিরিয়ার পূর্ব দিকে লীনা নদীর নিকটে ইয়াকট্ নামে এক জাতি আছে । ইহাদের বন্যা-হরিণ বা কুকুর সম্পত্তি নাই । ইহারা অশ্ব ও গো লইয়া কালক্ষেপ করে । ইহারা বুকের উপর আরোহণ করে এবং অশ্বমাংস খায় । অশ্বমুণ্ড ইহাদের পক্ষে সর্বাপেক্ষা সুখাদ্য ! ইহাদের গাভীগুলি একটি স্বতন্ত্র কুঠরীতে থাকে, কিন্তু ইহারা গোবৎসগণের সহিত আর একটি কুঠরীতে অবস্থান করে ।

বুরেইং নামে আর এক প্রকার জাতি আছে । ইহারা বৌদ্ধধর্মাবলম্বী এবং তাঁবুতে বাস করে ।

সাইবিরিয়ার পূর্ব-দক্ষিণ দিকে কাম্কাট্কা বা কাম্‌স্‌ট্‌কা উপদ্বীপ । অত্রস্থ লোকদিগকে কাম্‌কাদেন্‌ বলে । ইহারা পরিশ্রম করা অপেক্ষা জুয়া ভাল-বাসে । কাম্‌কাদেন্‌ জাতি সমুদ্রতটে গিয়া সিঙ্কুঘোটক শীকার করে এবং তাহাই বিক্রয় করিয়া জীবিকানির্ব্বাহ করিয়া থাকে । যাই হউক, এই জাতি

অতিথির প্রতি দয়ালু ও উপকারীর নিকট কৃতজ্ঞ । কেহ ইহাদের উপকার করিলে, ইহারা কখন তাহা বিস্মৃত হয় না ; এক সময়ে না এক সময়ে তাহার প্রত্যুপকার করে । কাম্বোদ্যেশের বাটীতে কোন অতিথি আসিলে, গৃহস্থানী নিতান্ত দরিদ্র হইলেও, তাহাকে পাঁচ ছয় সপ্তাহ পর্য্যন্ত আহাৰ করায় । যখন আর সুবিধা না থাকে, তখন মুখ ফুটিয়া কিছু বলিতে পারে না ; অতিথিকে খাদ্যসামগ্রীর তারতম্য দেখায় । অতিথি গৃহস্থানীর অনাটন বৃদ্ধিতে পারিয়া অন্যত্র প্রস্থান করে ।

বিংশ অধ্যায় ।

উদ্ভিদ ও জন্তু ।

রুসিয়ার প্রয়োজনাপেক্ষা শস্য জন্মে । রাইসুরিবাই অত্যন্ত শস্যাপেক্ষা বিদেশে রপ্তানি হয় । দক্ষিণে নিপার নদী ও উত্তরে ভল্গা নদী, ইহার মধ্যস্থ ভূখণ্ডে অধিক পরিমাণে রাইসুরিবা উৎপন্ন হইয়া থাকে । বার্লি, জই, গম প্রভৃতি শস্যও যথেষ্ট জন্মে । ওকা, ডন, ও দেশনা নদীর নিকট মিলেট (Millet) জন্মিয়া থাকে । রুসিয়ার দক্ষিণ ওদেশে ভারতবর্ষীয় শস্য পাওয়া যায় । ইউরোপের অত্যন্ত দেশাপেক্ষা রুসিয়ার পাট ও শণের চাষ অধিক । উক্রেইন্ অঞ্চলে তামাক উৎপন্ন হয় ।

রুসিয়ার শস্যের ন্যায় সুমিষ্ট ফল ভাল জন্মে না । উত্তর দিকের জলবায়ু অত্যন্ত শীতল বলিয়া কেবল বন্য বেরি ও মদ আপেল জন্মে ; কিন্তু দক্ষিণ দিকের জলবায়ু অপেক্ষাকৃত ভাল বলিয়া পিচ, আপ্রিকট, কুইন্স, তুঁত ও আথ্রোট্ প্রভৃতি ফল উৎপন্ন হয় । ক্রিমিয়ার উদ্যানগুলিতে বাদাম ও ডালিম জন্মে । অন্ন স্থানেই আঙ্গুর ফল উৎপন্ন হয় । তরকারির মধ্যে আলু, কপী, গাজর, সালগম, শশা, লাউ, মূলা, কাঁচড়, শতমূলী ও চিচিঙ্গা প্রভৃতি অধিক পরিমাণে জন্মিয়া থাকে ।

রুসিয়ার বনবিভাগে অনেক আয় হইয়া থাকে । বন সমূহে বাহাদুরী-

কাঠ, জালানিকাঠ, টার, পিচ ও পটাশ প্রভৃতি উৎপন্ন হয়। রুসিয়ার উত্তরভাগে যত অরণ্য আছে, দক্ষিণভাগে তত নাই; এমন কি, উভয়ের মধ্যে তুলনা করিলে শেষের ভাগে অরণ্য নাই বলিলেও চলে।

রুসিয়ায় নানাবিধ জন্তু দেখিতে পাওয়া যায়। তন্মধ্যে অশ্বই সর্বাধিক সংখ্যায় অধিক। মেঘ ও ছাগের ভাগও বড় কম নয়। উহাদের চৰ্ম্ম বিদেশে প্রচুর পরিমাণে রপ্তানি হয়। বিশেষতঃ রুসিয়ার ছাগ-চৰ্ম্মের মরোক্কো-চৰ্ম্ম প্রস্তুত হইয়া থাকে। শূকরের সংখ্যা বড়ই কম। যে সকল জাতি মরুভূমিতে ভ্রমণ করিয়া বেড়ায়, তাহাদের উষ্ট্র-সম্পত্তি যথেষ্ট। উহাদের মধ্যে কাহারও কাহারও ১০০০ এক হাজার উষ্ট্র আছে। অস্ত্রাকান প্রদেশে মহিষ দেখিতে পাওয়া যায়, কিন্তু সংখ্যায় কম। হংস, রাজহংস এবং কুক্কট সংখ্যায় অনেক। যে সকল স্থলে অনেক হ্রদ ও পুষ্করিণী আছে, ততঃস্থানে হংস ও রাজহংসের সংখ্যা বড় বেশী। উত্তরপ্রদেশেই কেবল বক্সা-হরিণ দেখা যায়। বিয়ালোভিজা নামক স্থানের অরণ্যপ্রদেশে বাইসন্, সর্বোত্তরভাগে নানাবিধ হরিণ, খরগোস ও বন্য শূকর আছে। চৰ্ম্মের জন্য যে সকল হিংস্র ও বন্য জন্তু শিকার করা হয়, তন্মধ্যে ভল্লুক, ক্ষুদ্র ভল্লুক, নেকড়ে বাঘ, শূগাল, গ্লটন, নকুল, মেরু-বিড়াল, কাঠবিড়ালী, এবং ভোঁদড় প্রভৃতির সংখ্যাই অধিক। উত্তরভূমিতে নেকড়ে বাঘ, চিতা বাঘ, শূগাল ও বন্য শূকর অনেক দেখা যায়। রুসিয়ায় নানাবিধ পক্ষী আছে।

একবিংশ অধ্যায়

রুসিয়ার পূর্ব-কথা।

নবম খৃষ্টাব্দের মধ্যভাগের পূর্বে রুসিয়া, ইতিহাসের মধ্যে স্থান পায় নাই। ৮৫০ খৃষ্টাব্দে নবগরদবাসীদের সহিত প্রতিবেশিগণের ভয়ানক

বিবাদ সংঘটিত হয়। প্রতিবেশীদের পীড়নে নবগরদস্থ লোকেরা যার-পর-নাই ব্যতিব্যস্ত হইয়া উঠে। এই জন্য তাহারা রুরিক নামক এক জন প্রবল-ক্ষমতাপন্ন দস্যুকে তাহাদের সাহায্য করিবার জন্য আহ্বান করে। রুরিক এক জন বণ্টিক-দস্যু বলিয়া প্রসিদ্ধ। তিনি রুসিয়ায় আসিয়া নব-গরদনিবাসিগণকে বিপদ হইতে উদ্ধার করেন।

অনন্তর রুরিক রুসিয়ার অধিকাংশ ভূখণ্ডের অধিপতি হইয়া একটি রাজবংশ স্থাপন করিলেন। সেই রাজবংশ ১৫৯৮ খৃষ্টাব্দ পর্যন্ত নির্বিন্ধে চলিয়া আসিল। রুরিকবংশীয় সেন্ট রুডিমির দি গ্রেট (১৮০-১০১৫) রুসিয়ায় রাজত্ব করিয়াছিলেন। তিনি ৯৮৮ খৃষ্টাব্দে সম্রাট দ্বিতীয় বেসিলের ভগিনী এনাকে বিবাহ করেন। বিবাহের সময় তাঁহাকে গ্রীক-চর্চ-মতানুসারে খৃষ্টধর্ম গ্রহণ করিতে হইয়াছিল। রুডিমির বিশেষ পরাক্রমশালী রাজা ছিলেন। তিনি স্বীয় বলে পার্শ্ববর্তী অনেক প্রদেশ জয় করিয়াছিলেন। কিন্তু, তাঁহার মৃত্যুর পর পুনর্বার জয়-লব্ধ রাজ্যগুলি খণ্ডীকৃত হইয়া যায়। তা'র পর (১০৫৭-৭৫) খেত-রুসিয়ার অধিপতি প্রথম এণ্ডু আপনাকে রুসিয়ার প্রধান অধিপতি বলিয়া ঘোষণা করেন।

১২২৩ খৃষ্টাব্দে তাতারবংশীয় প্রসিদ্ধ জেঙ্গিস খাঁর পুত্র তৌশি ৫,০০,০০০ পাঁচ লক্ষ তাতার-সৈন্য লইয়া রুসিয়ায় প্রবেশ করেন। আজব সমুদ্রের নিকট কাস্কা নদীতটে রুসিয়ার রাজবংশ যুদ্ধে পরাজিত হয়।

অনন্তর ১৩৬১ খৃষ্টাব্দে তাতাররাজবংশীয় তাতার খাঁর মৃত্যু হইলে রুসিয়ার পুনর্বার পরিবর্তন সংঘটিত হয়। সেই সময় হইতে (১৪৮০) তৃতীয় ইভানের সময় পর্যন্ত রুসীয় পরাজিত রাজারা তাতারদের সহিত ক্রমাগত যুদ্ধ করেন। এই যুদ্ধোপলক্ষে ১৩৮২ ও ১৪৪১ খৃষ্টাব্দে মস্কো নগর দুই বার ভস্মীভূত হয়।

তৃতীয় ইভানের সময় হইতে রুসিয়ার ইতিহাসে নূতন যুগ আরম্ভ হইল। তিনি পোল ও লিথুনিয়গণকে যুদ্ধে পরাজিত করিলেন, কজানের তাতার-গণকে করদ করিলেন এবং রুসিয়ার অন্তর্গত হত রাজ্যগুলি একচ্ছত্র করিলেন। তিনি আপনাকে রুসসাম্রাজ্যের প্রতিষ্ঠাতা বলিয়া ঘোষণা করিয়া দিলেন। তাঁহার উত্তরাধিকারিগণের মধ্যে (১৫০৫-৩৩) চতুর্থ বেসিল,

(১৫৩৩-৮৪) চতুর্থ ইভান ও (১৫৮৪-৯১) ফিওডোর রুসমাত্রাজ্যের যথেষ্ট উন্নতি করিয়াছিলেন। চতুর্থ বেসিন্ ক্রমাগত পোল ও তাতারদের সহিত যুদ্ধে ব্যাপ্ত থাকিতেন। চতুর্থ ইভান সর্বপ্রথম রুস-রাজ-বংশে জাঃ (Czar) উপাধি প্রবর্তিত করেন। তিনি ১৫৫২ খৃষ্টাব্দে কজান এবং ১৫৫৪ খৃষ্টাব্দে অস্ট্রাকান প্রদেশ জয় করিয়া লন। অনন্তর ১৫৫৯ খৃষ্টাব্দে ডনকসাকগণকে অধীন করিয়া, তাহাদের সাহায্যে সাইবিরিয়া জয় করেন। ১৫৮১ খৃষ্টাব্দে এই ঘটনা হইয়াছিল। চতুর্থ ইভান যথেষ্ট ক্ষমতাপন্ন রাজা ছিলেন বটে, কিন্তু নিষ্ঠুরতা তাঁহার ব্রত ছিল। ফিওডোর বড় দুর্বল রাজা ছিলেন। ১৫৯১ খৃষ্টাব্দে তাঁহার মৃত্যু হয়। তাঁহার মৃত্যু-তেই রুসিয়ার রুরিক্ রাজবংশের পুরুষ-শাখার শেষ হয়। রুরিক্‌বংশের পুরুষ-শাখা ৭৩৬ বৎসর রাজত্ব করিয়াছিল। এই সময়ের মধ্যে সর্বশুদ্ধ ৫৬ জন রাজা হইয়াছিলেন।

ফিওডোরের শ্যালকের নাম বোরিস্। তিনি ফিওডোরের প্রধান মন্ত্রী ছিলেন। ফিওডোরের মৃত্যুর পর রুসিয়ার ধর্মবাজক ও সম্রাটগণ একত্র হইয়া তাঁহাকে রাজসিংহাসন দান করিলেন। তিনি ১৫৯৮ হইতে ১৬০৫ খৃষ্টাব্দ পর্যন্ত রাজ্য শাসন করিয়াছিলেন, কিন্তু শেষে অত্যন্ত স্বেচ্ছাচারী ও নিষ্ঠুর হইয়াছিলেন। ফিওডোরের মৃত্যুর অব্যবহিত পরেই ক্রমাগত নয় বৎসর কাল রাজসিংহাসনের উত্তরাধিকারী লইয়া প্রতিযোগিতা ও বিবাদ চলিতে লাগিল। অবশেষে ১৬১৪ খৃষ্টাব্দে রুরিকের দৌহিত্রবংশীয় মাইকেল্ রোমানফ্ সকলের সম্মতিক্রমে রাজা হইলেন। ইহা হইতেই রুসিয়া প্রকৃতপক্ষে ইউরোপীয় রাজ্য মধ্যে গণ্য হইল। ১৬১৪ হইতে ১৬৪৫ খৃষ্টাব্দ পর্যন্ত মাইকেল্ রোমানফ্ নিজ শক্তি বিস্তার ও পূর্বপরাজিত রাজ্য সমূহ পুনরুদ্ধার করিয়া নির্বিশেষে রাজদণ্ড পরিচালনা করিয়াছিলেন। কিন্তু ইহাকে বাধ্য হইয়া সুইডেনের রাজাকে ইঙ্গ্রিয়া ও কেরিলিয়া, এবং পোলণ্ডের অধিপতিকে অলেন্দুর্ক নামক প্রদেশ ছাড়িয়া দিতে হইয়াছিল। যুদ্ধের অপেক্ষা রোমানফের রাজ্যের অভ্যন্তরীণ শাসন অতি সুন্দর ছিল। পূর্ববর্তী রাজারা যে সকল কার্যের জন্য সাধারণের নিকট নিন্দনীয় হইয়া-ছিলেন, ইনি সেই সকল অন্যায়া কার্য উঠাইয়া দেন। ইনি ১৬২৯ খৃষ্টাব্দে

ফ্রান্সের সহিত এবং ১৬২৩ খৃষ্টাব্দে ইংলণ্ডের সহিত বাণিজ্য সম্বন্ধীয় সন্ধি করিয়া স্বদেশের বিশেষ উন্নতি সাধন করেন ।

রোমানফের অন্যতম পুত্র আলেক্সিস্ । ইনি ১৬৪৫ হইতে ১৬৭৬ খৃষ্টাব্দ পর্যন্ত রাজত্ব করিয়াছিলেন । ইহার পত্নীর নাম সোফিয়া । অপ্রসিদ্ধ পিটার দি গ্রেট্ ইহাদের পুত্র । পিটার দি গ্রেট্ ১৬৮৯ খৃষ্টাব্দে সিংহাসনারূঢ় হইয়া মাতার তত্ত্বাবধানে ভ্রাতা ইভানের সহিত ৭ বৎসর কাল একত্রে রাজ্য করিয়াছিলেন । তাহার পর তিনি জীবনের অবশিষ্ট ভাগ একাধিপত্যে যাপন করেন । সে বিষয় এই পুস্তকের তৃতীয় অধ্যায়ে বিবৃত হইয়াছে ।

পরিশিষ্ট ।

বীরত্রয়ের বলাবল ।

ফরাসী ও রুষ দুই জনের উপরই ইংরাজকে তীক্ষ্ণ দৃষ্টি রাখিতে হইয়াছে। কোন্ দিন রুষ ককাশস হইতে কাবুল লজিয়া কাশ্মীরে আসিয়া পড়েন, কোন্ দিন ফরাসী আনাম হইতে লেয়স লজিয়া আভায় আসিয়া পড়েন, এই ভাবনায় ব্রিটিশ-সিংহকে ব্যাকুল করিয়া ফেলিয়াছে। ভারতের ভাবনায় ইংরাজকে বরাবরই ব্যাকুল থাকিতে হইয়াছে। ইংরাজের পর-রাষ্ট্র লইয়া যত গোলযোগ, তাহার অধিকাংশই ভারতের জন্ত। ঊনবিংশ শতাব্দীতে ইংরাজ যত যুদ্ধে প্রবৃত্ত হইয়াছেন, প্রায় সমস্তই ভারতের জন্ত। পাছে রুষ তুরস্ককে পদানত করিয়া ভারত-বাত্তার পথ প্রশস্ত করিয়া লয়েন, এই ভয়েই ইংরাজ ক্রিমিয়া-ক্ষেত্রে তুরস্কের সহিত যুদ্ধ করিয়াছিলেন। মিশর স্বায়ত্ত করিয়া না রাখিলে ভারতের পথ স্বায়ত্ত থাকিবে না, এই জন্ত ইংরাজ মিশর লইয়া মত্ত হইয়াছেন। ভারতের ভয়েই ইংরাজকে আফগানস্থানে তিন বার অর্থ-শোণিতের প্রদীপ করিতে হইয়াছে। এখনও ভারতের জন্ত ইংরাজকে পূর্ব পশ্চিমের দিকে নিরন্তর চকিত-নেত্রে চাহিয়া থাকিতে হইয়াছে। পশ্চিমে প্রবল রুষভক্ত ; পূর্বে প্রবল ফরাসি-শত্রু। দুই দিকে দুই বীর। মধ্যে, ভারতে বীর ইংরাজ বিরাজ করিতেছেন। এক বার তিন বীরের বলাবলটা আলোচনা করিলে ক্ষতি কি?

ফরাসীর বল ।

প্রথমে ফরাসীরই বলাবল পরীক্ষা করিয়া দেখিব। ফরাসীর বলবিক্রম বড় বাড়িয়াছে। ঞ্চকের নিকট পুরাজিত হইয়া অবধি ফরাসী নিজের বল ক্রমেই বাড়াইতেছেন। সৈনিক সংগ্রহের সুবিধার জন্ত যেরূপ আইন কানুন করিতে হয়, ফরাসী ১৮৭৫ অব্দে তাহা করিতে অমনোযোগী হন নাই। যে কিছু ত্রুটি অভাব ছিল, ১৮৮২ অব্দে তাহা দূর করিয়াছেন। বিংশ হইতে চত্বারিংশ পর্য্যন্ত বয়সের যত ফরাসী-পুরুষ আছে, নিতান্ত

দুর্ভল এবং বিকলাঙ্গ না হইলে সকলেই গভর্মেন্টের আদেশে অস্ত্র ধারণ করিতে বাধ্য। ফরাসী-সেনা দুই ভাগে বিভক্ত। এক ভাগ সর্বদা যুদ্ধার্থ প্রস্তুত, যুদ্ধারম্ভ হইলে ইহাদিগকেই অগ্রে যাইতে হয়; অপর ভাগ ইহাদিগের সাহায্যার্থ প্রস্তুত থাকে। হয় এক ভাগে, না হয় অন্য ভাগে কার্য্য করিতে প্রত্যেক ফরাসীই বাধ্য। পূর্বে অনেকেই অব্যাহতি ছিল। যিনি পরিবারের একমাত্র রোজগারী, তাঁহার অব্যাহতি ছিল। টাকা দিয়াও অনেকে অব্যাহতি পাইত। এখন আর সেরূপ অব্যাহতির পথ নাই। ফরাসী গভর্মেন্ট স্বদেশের সামরিক বল বাড়াইবার জন্য প্রাণপণে লাগিয়াছেন। অতি কঠোর আইন প্রণয়নেও কুন্তিত হন নাই। কিন্তু এরূপ আইনের কঠোরতাতেও ফরাসী জাতি অসন্তুষ্ট নহে, জাতীয় বলবৃদ্ধির জন্য সকলেই লালায়িত।

ফরাসীর যুদ্ধার্থ প্রস্তুত সৈন্তের মধ্যে ৫১৮৬৪২ পদাতিক, ১৩০১৪৬ অশ্বসাদী। ইহাদিগের সাহায্যার্থ রক্ষিত সৈন্যের (Reserve) সংখ্যা অনেক অধিক। দুই রকমে ফরাসীর ২৫০০০০০ সৈন্য উপস্থিত আছে। যাহারা এখন কোন সৈনিক-বিভাগে নাই, অথচ যাহাদিগকে গভর্মেন্ট মনে করিলেই ডাকিতে পারেন, এমন যুদ্ধনিপুণ সৈনিক অনেক আছে। তাহাদিগকে লইয়া হিসাব করিলে ফরাসীর সৈনিক-সংখ্যা সর্বশুদ্ধ ৩৭ লক্ষ ৫০ হাজার হইবে। কুরুক্ষেত্র-সমরে পাণ্ডবদিগের সাত এবং কৌরবদিগের ১১, মোটে এই ১৮ অকোঁহিনী সৈন্য উপস্থিত হইয়াছিল। প্রত্যেক অকোঁহিনীতে ২১৮৭০ রথী, ২১৮৭০ গজী, ৬৫৬১০ তুরঙ্গমী, ১০৯৩৫০ পদাতি; মোট ২১৮৭০০ সৈনিক ছিল। সুতরাং দুই পক্ষে কুরুক্ষেত্রে ৩৯৩৬৬০০ সৈনিক উপস্থিত ছিল। ফরাসী যে মনে করিলেই অষ্টাদশ অকোঁহিনী সৈন্য সমবেত করিতে পারেন, তাহাতে কি আর সন্দেহ আছে?

রণতরীও ফরাসীর অল্প নহে। ইংরাজের অপেক্ষা সংখ্যায় অধিক। ফরাসীর ৩০২ খানা রণতরীতে ১৮০২ টা কামান লাগান আছে। রণতরীর জন্ত ১ লক্ষ ৮০ হাজার সৈনিক প্রস্তুত আছে। ফরাসী জলে স্থলে বল বাড়াইয়াছেন। এত অল্প দিনের ভিতর এত বল আর কেহই কখনও বাড়াইতে পারেন নাই। সামরিক ব্যয়ও অনেক বাড়িয়াছে। স্থল-সৈনি-

১৮৬৯ অব্দে ১৫৩৬৬২৯৭০ টাকা ছিল, আর বৎসর ২৪২১২২৮০০ টাকা হইয়াছে। রণতরীর বার্ষিক ব্যয় ৮১৮২৮১৫০ টাকা। আয় যথেষ্ট আছে, ব্যয়ও যথেষ্ট হইতেছে।

ফরাসীর	বার্ষিক	আয়	১৪২৩৩৭০৪৬০
"	"	ব্যয়	১৪২৩২৬৬২০০
স্থিতি			১০৪২৬০

ফরাসী গভর্নেন্ট এত ব্যয় করিয়াও দেউলিয়া নহেন। তাঁহাদের আয় ক্রমেই বাড়িতেছে। সাহস ও বিক্রম ফরাসীর যে কম নহে, তাহা সকলেই জানেন। বিজ্ঞানে ফরাসী কাহারই কাছে ছোট নহেন, সুতরাং অন্ত্রশস্ত্রে, রণতরীর উৎকর্ষে, সমরবিদ্যায় ফরাসী কাহারও অপেক্ষা হীন নহেন। ফরাসী শত্রু ইংরাজের উপেক্ষণীয় নহে।

রুষের বল ।

রুষেরও বিষম বল। সৈন্য সংগ্রহে রুষরাজ ক্রমেই অধিক আগ্রহ-শালী হইতেছেন। ২১ বৎসর অতিক্রম করিলেই প্রত্যেক রুষ পুরুষকে সামরিক বিভাগে কার্য্য করিতে হয়। বাঁহারা শিক্ষিত; তাঁহারা যদি ১৭ বৎসর বয়সে তলচাঁয়র হইয়া সৈনিক বিভাগে প্রবেশ করিয়া কিছুদিন কার্য্য করেন, তবে তাঁহাদিগের পরে কিছু সুবিধা হয়। সৈনিক বিভাগে কার্য্য ছোট বড় সকলকেই করিতে হয়। কসাক প্রভৃতি ভিন্নজাতীয় রুষ-প্রজাদিগকেও যুদ্ধকার্য্যে প্রবৃত্ত হইতে হয়, ইহাদিগকে কর দিতে হয় না, যুদ্ধে বরাদ্দমাফিক সৈনিক-সাহায্য প্রদান করিতে হয়।

শান্তির সময়ে রুষের সৈনিক সংখ্যা ৭৭০০০০, যুদ্ধের সময় ২২০০০০০, মিলিশিয়া ধরিলে যুদ্ধের সময় রুষের সৈন্য-সংখ্যা ৩২ লক্ষ। মনে করিলে রুশগভর্নেন্ট সৈন্য-সংখ্যা যে আরও বাড়াইতে পারেন, তাহা সকলেই বুঝিতে পারিতেছেন। ইহারা যে অষ্টাদশ অক্টোব্রিয়ার অপেক্ষাও অধিক সৈন্য সংগ্রহ করিতে পারেন, তাহাও সহজেই বুঝা যাইতেছে।

রণতরীর সংখ্যা রুষের সকলের অপেক্ষা অধিক। বলটিক সাগরে ২১৬ খানা, কৃক সাগরে ১০০ খানা, সাইবিরিয়ার ১৬ খানা, আরল ভ্রদে ৬

খানা, কাম্পীয় হুদে ২৭ খানা, পালওয়াল ৮ খানা, মোট রুষের এই ৬৭৩ খানা রণতরী। কিন্তু রুষ-রণতরীর মধ্যে অধিকাংশই দুর্বল এবং ক্ষুদ্র। রুষরণতরীতে মোট ৭৫৭ টা বই কামান নাই। সামুদ্রিক সমরে রুষ এখনও তাদৃশ শক্তিলভ করেন নাই। অস্ত্রশস্ত্র বিষয়েও রুষ ইংরাজ ও ফরাসীর অপেক্ষা হীন। অর্থবলও তত নাই। কিন্তু সামরিক ব্যয় কম নহে। স্থল-সেনায় রুষগভর্মেণ্টের ২৭৫৮৪২৮০০ টাকা খরচ, রণতরীতে ৪৩৭৬১৭১০ টাকা খরচ। রুষের

বার্ষিক আয়	১০৬৩২২৯৭৯০
বার্ষিক ব্যয়	১১১২১৫০৬০০
স্থিতি	<u>৪৫৯২০৮১০</u>

রুষের বৎসর বৎসর প্রায় ৫ কোটি টাকা ধার হইতেছে, টাকার বাজারে পসার একেবারে কমিয়া গিয়াছে, অধিক হুদে টাকা ধার করিতে হইতেছে, তবুও সামরিক শক্তি ক্রমে বাড়ান হইতেছে। যথেষ্টাচার শাসনপ্রণালীর দশাই এই। পরিণামে রুষ-জারকে ঘোর বিপদে পড়িতে হইবে। কিন্তু সে ভয় এখন তাঁহাকে কিছুমাত্র শান্ত বা সাবধান করিতে পারিতেছে না, এরূপ অশান্ত এবং অসাবধান শত্রু সহসা গোলযোগ ঘটাইতে পারে। সুতরাং এরূপ শত্রুও একেবারে উপেক্ষণীয় নহে। শত্রুও ভয়ের পাত্র।

ইংরাজের বল ।

ফরাসী বা রুষের মত ইংরাজ যত ইচ্ছা সৈন্য স্বরাজ্যে সংগ্রহ করিতে পারেন না। ফরাসী ও রুষগভর্মেণ্ট প্রত্যেক পুরুষকেই সামরিক কার্যে জোর করিয়া টানিয়া লইতে পারেন, ইংরাজ তাহা পারেন না। রুষ বা ফরাসীর মত ইংরাজ গভর্মেণ্টের একটা বৃহত্তী সেনা বরাবর পোষণ করিবার অধিকার নাই। ১৬৯০ অব্দের অধিকার-বিধি (Bill of Rights) সে ক্ষমতা কাড়িয়া লইয়াছে। পাছে রাজা সৈন্যসাহায্যে ষ্টুয়ার্টদিগের মত প্রজাদের স্বাধীনতাহরণে অগ্রসর হন, এই ভয়ে ইংরাজ জাতি রাজশক্তির এইরূপে সংকোচিত করিয়া দিয়াছেন। সৈন্যরক্ষার ক্ষমতা গভর্মেণ্টকে

প্রতি বৎসর কমন্স হাউসের নিকট গ্রহণ করিতে হয়। কমন্স হাউসের অমতে গভর্নমেন্ট একটাও অতিরিক্ত সৈনিক নিযুক্ত করিতে পারেন না।

খাস সৈনিক ছাড়া, ইংরাজের মিলিশিয়, ইয়োম্যান্রি এবং ডলণ্টীয়র এই তিন প্রকার অতিরিক্ত সৈন্য আছে। ইহাদিগের বিদেশে যাইবার অধিকার নাই। স্বদেশরক্ষার্থই ইহাদিগের অবস্থিতি। খাস সৈনিক দুই ভাগে বিভক্ত, বাড়াইয়ে এবং রক্ষিত। খাস সৈনিক নিজ রাজ্যে এবং উপনিবেশে কাজ করে। আরতের জন্য স্বতন্ত্র খাস ইংরাজ সৈনিক বরাদ্দ আছে। ১৮৮৪ অব্দে ইংরাজ গভর্নমেন্টের কোন্ সৈন্য কত থাকিবার কথা, প্রকৃত প্রস্তাবে কত ছিল, তাহার একটা হিসাব দিতেছি।

রকম	কত বরাদ্দ	কত আছে
খাস লড়াইয়ে সৈন্য		
স্বরাজ্যে ও উপনিবেশে	১২৭৬১১	১২৬৮৫৩
রিসার্ভ বা রক্ষিত		
১ম শ্রেণী	৩৩৫০০	১৯৬৮৭
২য় শ্রেণী	৯০০০	৯৬৯৩
মিলিশিয়া	১৪২৮৭৪	১১৭৮২৩
ইয়োম্যান্রি	১৪৪০৪	১১২৬৭
ডলণ্টীয়র	২৪৭৯২১	২০৭৩৩৬
মোট	৬৭৫৩১০	৪৯২৬৫৬
ভারতে	৬১৬৪১	৬২৭৭৯
মোট	৬৩৬৯৫১	৫৫৫৪৩৫

সহসা সৈন্যবৃদ্ধি করিবার অধিকার গভর্নমেন্টের নাই। পার্লামেন্টের মত হইলেও শীঘ্র সৈন্য সমবেত করিবার শক্তি ইংরাজের নাই। ডলণ্টীয়র প্রভৃতি ত্রিবিধ সৈনিকদিগের স্বদেশেই অবস্থিতি। স্বদেশরক্ষার্থ পেশাদার সৈনিক রাখা চাই। সুতরাং বিদেশে গিয়া ইংরাজ যে, যত ইচ্ছা সৈন্য লইয়া লড়িবেন, তাহারাও যো নাই। রুষ ফরাসীর সহিত সৈন্যসংখ্যায় টক্কর দেন, এমন ক্ষমতা ইংরাজের আছে কি না পাঠক অনায়াসেই বুঝিতে পারিবেন।

রণতরীর বলেই ইংরাজ এত দিন আধিপত্য রক্ষা করিতেছেন। সেই রণতরীও ইংরাজের ২৪৬ খানা বই নাই। রুষের রণতরীবল সংখ্যায় যেমন, ক্ষমতায় তেমন নহে। কিন্তু ফরাসীর রণতরীবল বড় বাড়িয়াছে। ইংরাজেরা ইহাতে ভীত হইয়াছেন। ভীত হইয়াছেন বটে, কিন্তু সহসা নিজের বলবৃদ্ধির ক্ষমতা নাই। ইংরাজের রণতরীর উপরই প্রধান ভরসা। রণ-তরীর সংখ্যা-নির্দেশ বা বলাবল বাঁধিয়া দিবার অধিকার এখনও কমন্স্ হাউসকে দেওয়া হয় নাই। স্বদেশে গোলশোগ বাধাইবার অধিকার না কি রণতরীর তত নাই, বিদেশীয় শত্রুর সঙ্গেই ইহার প্রধান সম্পর্ক, এই জন্যই রণতরীর উপর এখন কমন্স্ হাউসের একাধিপত্য হয় নাই।

ফরাসীর ৩০২ খানা রণতরীতে ১৮০২টী কামান আছে, ১ লক্ষ ৮০ হাজার লোক আছে। ইংরাজের ২৪৬ খানা রণতরীতে কত কামান আছে, আমরা জানি না। কিন্তু ৬৩ খানা প্রধান তরীতে ৬১১টী কামান আছে, তাহা আমরা জানি। সমস্ত রণতরীতে যে ফরাসীর অপেক্ষা অধিক কামান নাই, তাহাও আমরা অবগত আছি। রণতরীর লোকসংখ্যাও ফরাসীর অপেক্ষা অল্প। ফরাসীর ১ লক্ষ ৮০ হাজার আছে, ইংরাজের ভারত এবং উপনিবেশ লইয়াও ৫৮ হাজারের অধিক নাই। ধনবল ইংরাজের যথেষ্ট আছে, কিন্তু ফরাসীরও নিতান্ত কম নহে। ইংরাজ স্থলসৈন্যের জন্ত ১৮৮৪ অব্দে ১৫৬০৬৭০০০ টাকা দিয়াছেন; জলসৈন্যের জন্য ১০৬২০৭০০০ টাকা দিয়াছেন।

ইংরাজের বার্ষিক আয়	৮৬৫৪৯০০০০
বার্ষিক ব্যয়	৮৬৪৩৬২২৯০
স্থিতি	১১২৭৭১০০

উপসংহার ।

ইংরাজ স্বদেশীয় সৈনিক বলে ফরাসী বা রুষের সমকক্ষ নহেন। কিন্তু তাই বলিয়া তাঁহার সামরিক বল কম নহে। এখন ভারতে তাঁহার ভার-তীয় সৈন্য অধিক নাই, অধিক রাখিবার প্রয়োজনও নাই। স্বদেশরক্ষার জন্য ইংরাজের স্বদেশে যে সৈন্য আছে, তাহাই যথেষ্ট। এই সৈন্য

লইয়াই ইংরাজ এত দিন ইউরোপে প্রাধান্য রক্ষা করিয়া আসিয়াছেন । এইরূপ সৈন্য লইয়াই ওয়েলিংটন অসীম সেনার অধিনায়ক বীরবর বোনা-পার্টিকে পরাজিত করিয়াছিলেন । ঘরের ভাবনা ইংরাজের নাই । ভাবনা উপনিবেশ এবং ভারত লইয়া । উপনিবেশের ভাবনাও তত নহে । রুষ ও ফরাসী-ইংরাজের উপনিবেশের উপর আক্রমণ করিবেন না, ভয় ভারত লইয়া । রুষ বা ফরাসী যদি ভারতের সমীপে ইংরাজের সহিত বলপরীক্ষায় প্রবৃত্ত হন, তাহা হইলে আর উপনিবেশের উপর আক্রমণ করিবার অবসর পাইবেন না । পাইলেও ইংরাজ, যে সৈন্য আছে, তাহা লইয়াই স্বদেশ এবং স্থাপনিবেশ রক্ষা করিতে পারিবেন । ভারত নিজের বলেই বলীয়ান্ । ইংরাজ মনে করিলেই ভারতের সামরিক বল স্বকার্য-সাধনে নিযুক্ত করিতে পারেন । ভারতবাসীকে সন্তুষ্ট রাখিলেই ইংরাজ অতি সহজে স্ববল বাড়াইতে পারিবেন । এই বিশাল ভারতগাম্ভাজ্যে লোকের অভাব নাই, শৌর্যবীর্যের অভাব নাই, সাহস এবং রাজভক্তির অপ্রতুল নাই । ফ্রান্সের লোকসংখ্যা ৩ কোটি ৮০ লক্ষও হইবে না ; রুসিয়ার লোকসংখ্যা ৮ কোটি ৫০ লক্ষ ; আর এই ভারতের লোকসংখ্যা ২৬ কোটিরও অধিক । এই ভারত-সাম্রাজ্যই ইংরাজের প্রধান সহায়, ভারতবাসীই ইংরাজের প্রধান বল ।—নববিভাকর, ২৯এ পৌষ, ১২৯১ ।

রুষের অপরাধ নাই ।

ইংরাজ যখন যেখানে অধিকারবৃদ্ধি করিবেন, তখন সেইখানে, সভ্যতা, সুশাসন, স্বাধীনতা বিস্তারিত হইবে, অধিকৃত প্রদেশের অধিবাসী-দিগের সুখ সমৃদ্ধি বৃদ্ধি হইবে ; আর অন্য কোন জাতি কোন স্থানে অধিকার বৃদ্ধি করিলে সেরূপ হইবে না, এ কথা বলিলে জগৎ বিশ্বাস করিবে কেন ? ইংরাজ পৃথিবীর চারি দিকে নিজের রাজ্য বিস্তার করিতেছেন, তাহাতে কোন দোষ নাই, আর রুষ মধ্য-এশিয়াতে অধিকার বিস্তার করিলেই যত দোষ, এ কথা লোকে বুঝিবে কেন ? ইংরাজ এশিয়ার মধ্যে সভ্যতম প্রদেশে—(ভারতে) অধিকার বিস্তার করিলেন, তাহাতে পৃথিবীর কেবল মঙ্গলই হইল, আর রুষ এশিয়ার অসভ্যতম প্রদেশে—(মধ্য-এশিয়ার তুর্কমান প্রদেশে)

অধিকার বিস্তার করিলেন, তাহাতে কোন মঙ্গলই সাধিত হইল না, এ কথা বলা কোন প্রকারেই যুক্তিসঙ্গত নহে, সুবুদ্ধির কাজও নহে । ইহাতে লোকে ইংরাজদিগকে স্বার্থপর ও পরশ্রীকাতর বলিয়া মনে করিতে পারে ।

ইংরাজ চিরকালই বলিতেছেন, রুষ মধ্য-এশিয়ার স্বাধীনতা হরণ করিয়া পৃথিবীর অমঙ্গল সাধন করিতেছেন । ইহাতে কি রুষ বিরক্ত হইতে পারেন না ? সকল ইংরাজ এরূপ পরশ্রীকাতরতা প্রকাশ করেন না সত্য, কিন্তু এরূপ পরশ্রীকাতর ইংরাজের সংখ্যা যে অধিক, সে বিষয়ে ত আর কিছু মাত্র সন্দেহ নাই ? রুষকে দোষ দেন না এমন ইংরাজ আমরা অল্পই দেখিতে পাই । রুষকে বাঁহারা দোষ দিয়া থাকেন, তাঁহাদেরই সংখ্যা অধিক । অধিকাংশ ইংরাজ-লেখকের এই ধূয়া । মার্তিন ও ম্যালিসন প্রভৃতি সাহেবেরা এই সুরেই গান ধরিয়া আসিতেছেন । অধিকাংশ ইংরাজ রাজনীতিকেরই এই নীতি । পামারষ্টোন হইতে বীকমফীল্ড পর্যন্ত সকলেই এই রুষবিরোধি নীতি অবলম্বন করিয়া জীবন কাটাইয়া গিয়াছেন, এখনও চর্চিল প্রভৃতি টোরিগণ এই নীতি প্রচার করিতেছেন ।

বাস্তবিক এশিয়ায় অধিকার বিস্তার করিয়া ইংরাজ বাহা না করিয়াছেন, রুষ তাহা করিয়াছেন । মধ্য-এশিয়ায় কোন কালে যে সুখ-শান্তি ছিল না, রুষ তাহা প্রদান করিয়াছেন । ইংরাজের যদি ভারত জন্ত রুষ-ভীতি না থাকিত, তাহা হইলে যুক্তকণ্ঠে এ কথা স্বীকার করিতেন । স্বার্থহানির ভয়ই ইংরাজকে অপ্রকৃতবাদে প্রবৃত্ত করিয়াছে । ইংরাজ-লেখকদিগের স্বার্থ-প্রোদ্বিত অত্যাচার দেখিয়া আমরা বাস্তবিকই বড় ব্যথিত হইয়া থাকি । ম্যালিসন হউন, মার্তিন হউন, আর ম্যাক্গ্রেগর হউন, সকলেরই এক ধূয়া । সকলেই রুষকে গালি দিয়া আসিতেছে । কিন্তু মনের ভাব গোপন করা সহজ নহে । আমরা অদ্য অত্র লেখকের কথা ছাড়িয়া দিয়া কর্ণেল ম্যালিসনকে লইয়াই পড়িলাম । এই মহাপুরুষ সম্প্রতি এই ছজুক পাইয়া একখানি ১১১ পৃষ্ঠা পরিমিত ক্ষুদ্র পুস্তক প্রকাশ করিয়াছেন । ইহা প্রভু রুষ-আফগান প্রশ্নের মীমাংসা করিতে প্রবৃত্ত হইয়া লেখনী ধারণ করিয়াছেন । মীমাংসার সঙ্গে ধোঁজ খবর নাই, কেবল রুষকে আগাগোড়া দোষ দিয়াছেন, আর প্রকৃত উদারনীতিক ইংরাজদিগকে গালি দিয়াছেন । ম্যালিসন

নূতন কথা একটীও বলিতে পারেন নাই। তাঁহার ক্ষুদ্র গ্রন্থে প্রায় ৫০০০ টি পংক্তি আছে। এই পঞ্চ সহস্র পংক্তির ভিতর এমন একটী কথাও নাই, যাহা শত বার রুখিত হয় নাই; এমন একটীও যুক্তি নাই, যাহা টোরিস-সম্প্রদায় সহস্র বার প্রয়োগ করেন নাই। সবই সেই পুরাতন বস্তাপচা পুতিগন্ধময় গোঁড়া টোরিদিগের চিরন্তন কথা, “রুষ দস্যু, দস্যুভাবে আস্তে আস্তে মধ্য-এশিয়ায় প্রবেশ করিয়া লোকের স্বাধীনতা হরণ করিতেছে, খিবা, বোখারা, মার্কসকল স্থলেই রুষ শঠতীর জোরে অধিকার বিস্তার করিয়াছে। যাহা অত্র স্থানে করিয়াছে, আফগানস্থানেও তাহাই করিবে। রুষের একই লক্ষ্য, ভারতের দিকে অগ্রসর হওয়াই দুই পাপাত্মা রুষের শেষ উদ্দেশ্য।” এই পুরাতন কাহিনী সকল ইংরাজ-লেখকেরই সম্মল। কর্ণেল ম্যালিসনও এই সম্মল লইয়া আসরে অবতীর্ণ হইয়াছেন। জানি না, তাঁহার মূখে এই পুরাতন কাহিনী শুনিয়া ইংরাজ জাতির মনে কিরূপ ভাবের উদয় হইবে, আমাদের কিন্তু ঘৃণা ধরিয়াছে। ম্যালিসনের গ্রন্থখানি পাঠ করিয়া আমাদের ধারণা হইয়াছে, এংলো-ইণ্ডিয়ান লেখকদিগের লেখনী কখনই নিরপেক্ষ ভাবে পরিচালিত হইতে পারে না। আরও ধারণা হইয়াছে, এংলো-ইণ্ডিয়ানদিগের হৃদয়ে রুষের প্রতি যেন একটা চিরন্তন বিদ্বেষ জন্মিয়া গিয়াছে। এংলো-ইণ্ডিয়ান সম্পাদকদিগের এরূপ একটানা লেখা আমরা ক্ষমা করিতে পারি; লোককে হজুকে মাতানই ইহাদিগের কাজ। কিন্তু যিনি ঐতিহাসিকের আসনে বসিয়া এরূপ একটানা ধরণে লেখনী চালনা করিয়া থাকেন, তাঁহাকে আমরা কোন মতেই ক্ষমা করিতে পারি না।

আরও বলি, যেখানে হৃদয়ে স্বার্থপরতা উখলিয়া উঠিতেছে, সেখানে লেখকের প্রতি ভক্তি প্রদ্বাহী বা হইবে কিরূপে? ম্যালিসন, মার্ভিন, ম্যাক-গ্রেগর, হ্যাম্বলি প্রভৃতি যে যে ইংরাজ রুষ-কথা লিখিয়াছেন বা বলিয়াছেন, তাঁহাদেরই হৃদয় প্রকাশিত হইয়া পড়িয়াছে। ভাষা ভিন্ন হইলেও হৃদয় সকলেরই এক। “রুষ এশিয়ার যে সকল স্থানে অধিকার বিস্তার করিতেছে, তাহার সামরিক ও বাণিজ্যিক ধৌরব বড় অধিক, পরিণামে এই সকল প্রদেশ রুষের আর্থিক ও রাজনীতিক শক্তি যে কত বাড়াইয়া দিবে, তাহার ঠিকানা নাই।” এই জুর ধরিয়া সকলেই আপনাদের হৃদয়ের পরিচয় দিয়া-

ছেন। পার্থক্য ইহার অর্থ কি তাহা বোধ হয়, অনায়াসেই বুঝিতে পারিয়াছেন। ইহার অর্থ, “রুষের ক্রমশঃই সমৃদ্ধি বৃদ্ধি হইতেছে, যাহা ইংরাজের পাওয়া উচিত ছিল, রুষ তাহা পাইতেছে, এটা ইংরাজের স্বার্থের অনুমোদিত নহে। ইংরাজ-রাজনীতিকেরা ইহা বুঝিয়াও তাহার প্রতিকার করেন নাই। তাঁহাদের সে পাপের প্রায়শ্চিত্ত হইবে না। রুষকে অগ্রসর হইতে দিয়া ইংরাজ-রাজনীতিকেরা মহাভ্রমে পতিত হইয়াছেন, স্বদেশের স্বার্থে আঘাত করিয়াছেন।

কেন বাপু, ইহাতে স্বদেশের স্বার্থহানি হইয়াছে? কেন বল দেখি, তুমি রুষকে অগ্রসর হইতে দিবে না? বিধাতা কিছু আর সমস্ত ধরাখানা ইংরাজের জন্ত সৃষ্টি করেন নাই। এতটা স্বার্থপরতা দেখিলে কি পৃথিবী-শুদ্ধ লোকে উপহাস করিবে না? এইরূপ সর্বগ্রাসিনী স্বার্থপরতার জন্তই ত ইংরাজ সমস্ত ইউরোপের সহানুভূতি ও সম্মান হারাইয়া এখন সকলের বিদ্বেষ-পাত্র হইয়া পড়িয়াছেন। নিজের বলাবল বুঝিয়া কথা বলা উচিত। কথার দোষেই সমস্ত নষ্ট হইয়া থাকে। রুষবিদ্বেষী, স্বার্থমত্ত, মুখদৃষ্ট, কথা-সর্বস্ব অনুদারনীতিক ইংরাজদিগের দোষে ইংল্যান্ডের যে কখন কি সর্বনাশ হইবে, তাহা ভাবিয়া আমরা বাস্তবিকই আকুল হইয়াছি। বৃটিশ গভর্নমেন্ট যত দিন না এই সকল গৃহ-শত্রুকে শাসন করিতে পারিবেন, তত দিন বৃটিশ সাম্রাজ্য নিরাপদ হইবে না।—নববিভাকর, ২৭এ জ্যৈষ্ঠ, ১২৯২

অপরাধ ইংরাজেরই অধিক।

অপরাধ রুষের নহে। ইংরাজ কলুষিত নেত্রে এবং কলুষিত হৃদয়ে দেখেন বলিয়াই রুষকে দোষ দিয়া থাকেন। বাস্তবিক নিরপেক্ষ ব্যক্তি মাতেই রুষের এশায়িক নীতির প্রশংসা করিয়া থাকেন। পূর্বে যেখানে অরাজকতা ছিল, রুষশাসনে এখন সেখানে সুখ শান্তি হইয়াছে। পূর্বে যেখানে দল্ল্য-ভঞ্জে লোকে শশব্যস্ত ছিল, এখন সে স্থান নিরাপদ হইয়াছে। ইংরাজের ভারত অধিকারে পৃথিবীর যে উপকার হইয়াছে, রুষের তুর্কস্থান ও ককাসাস অধিকারেও সেই উপকার হইয়াছে। তথাপি কতকগুলি লোকের প্রকৃতি কেমন

দ্বিত, তাঁহারা রুষের অহরহ নিন্দা করিয়া তাঁহাদিগকে উত্তেজিত ও বিরক্ত করিতেছেন। রুষকে ভাল বলিতে হয়, তাঁহারা কখনই ভদ্রতার সীমা অতিক্রম করেন নাই। রুষ বরাবরই ভদ্র-বাক্যে ইংরাজকে ঠাণ্ডা করিবার চেষ্টা করিতেছেন; বরাবরই বলিয়া আসিতেছেন, “আমরা মধ্য-এশিয়ার অরাজক দেশগুলি অধিকার করিয়া সমাজের মঙ্গলসাধন করিব। আফগানস্থানের উপর আমাদের দৃষ্টি নাই, লোভ নাই। ভারতের চিন্তা আমাদের স্বপ্নেও হয় না।” রুষ-ভীত ইংরাজ কি এ কথায় বিশ্বাস করিতে পারেন? ইংরাজ ক্রমাগত পীড়াপীড়ি করিতেছেন, ক্রমাগত রুষকে প্রতিজ্ঞাবদ্ধ করিবার জন্য চেষ্টা করিতেছেন। ১৮৬৪ অব্দে ইংরাজ চরম সীমায় উঠিলেন, রুষকে প্রতিজ্ঞাবদ্ধ করিবার জন্য মহাহলস্থল লাগাইয়া দিলেন। রুষসচিব প্রিন্স্ গর্চাকফ্ মনে মনে হাসিলেন, ইংরাজের অকারণ অতিভীতি এবং স্বার্থপরতা দেখিয়া একটু বিরক্ত হইলেন। তবুও অধীরতা প্রকাশ করিলেন না, বলিলেন;

“Russia is now in the presence of a more solid and compact, less unsettled and better organized social state, fixing for us with geographical precision the limit up to which we must advance and at which we must halt.”

“আমরা এখন একটা অপেক্ষাকৃত শাসিত প্রদেশের নিকটে উপস্থিত হইয়াছি। সেই পর্যন্ত গিয়াই আমরা থামিব, সেইখানেই আমাদের ভৌগোলিক সীমা নির্দিষ্ট হইবে।”

গর্চাকফের এ প্রতিজ্ঞা সত্য হয় নাই। ১৮৬৪ অব্দের পর রুষ সারান্থস্, থিবাস্, মার্ত অধিকার করিয়াছিলেন। কিন্তু এগুলি রুষের প্রতিজ্ঞাত অগম্য প্রদেশের অন্তর্ভূত নহে। এ সকল প্রদেশেই অরাজকতা এবং অত্যাচার বিরাজ করিতেছিল, অধিবাসীদিগের মধ্যে অধিকাংশই রুষকে সাদরে গ্রহণ করিয়াছিল, আর গর্চাকফ ত স্পষ্টই বলিয়াছিলেন;

“Russia is now in the presence of a more solid and compact &c. state.”

এই রূপ প্রদেশের “নিকট” রুষ উপস্থিত হইয়াছেন, এরূপ প্রদেশের “ভিত্তর” উপস্থিত হইয়াছেন, এ কথা ত গর্চাকফ বলেন নাই। বাস্তবিক

গর্চাকফ বাহা বলিয়াছিলেন, তাহা অক্ষয়গান্ধানকে লক্ষ্য করিয়া । আক্ষয়গান্ধান লইয়াই ইংরাজের ভয় । সেই ভয় নিবৃত্তির জন্যই গর্চাকফকে প্রতিজ্ঞা করিতে হইয়াছিল, সরাস্বাস, মার্ভ ও থিবার সহিত ইংরাজের কোন কাক্স কোন সম্বন্ধ নাই । সে দিকে রুষের গমনে ইংরাজের বাধা দিবারও কোন অধিকার নাই । গর্চাকফের প্রতিজ্ঞার পর রুষ যদি কাস্গারিয়ার দিকে বাই-তেন, তাহা হইলে কি ইংরাজের কোন কথা বলিবার অধিকার থাকিত ? ভদ্রলোকে গর্চাকফের প্রতিজ্ঞার ইহা ভিন্ন অন্যরূপে অর্থ কখনই করিবেন না । ডিউক অব আর্গাইল, সকল বিষয়ে প্লাডটোনের নীতির পক্ষপাতী নহেন, তিনিও রুদ্ধ বয়সে কতকটা প্রেস্তীজভক্ত এবং যুদ্ধের পক্ষপাতী হইয়া পড়িয়াছেন । কিন্তু আর্গাইলও স্বীকার করিয়াছেন, গর্চাকফ ১৮৬৪ অব্দে যে প্রতিজ্ঞা করিয়াছিলেন, তাহা ভঙ্গ হয় নাই । সে দিন সীমান্ত-বিষয় লইয়া পালেমেণ্টে যখন মহানোলন হইয়াছিল, তখন আর্গাইল স্পষ্টাক্ষরে বলিয়াছিলেন ;

“The Russian advances are all in complete accordance with the policy of Prince Gortchakoff's circular of 1864, which insisted on the inevitability in the interest of *order*, of Russia absorbing the semicivilized Central Asian States.”

“সুশাসনের খাতিরে রুষ মধ্য-এশিয়ার অর্ধসভ্য প্রদেশগুলি যে অধিকার করিবেন, তাহা বিধির নির্বন্ধ । গর্চাকফ ১৮৬৪ অব্দে যে ঘোষণা করিয়াছিলেন, রুষ তাহার ডিলমাত্রও অন্যথা করেন নাই ।”

আর্গাইলের এ কথার উপর বাহারা কথা কহিবেন, তাহারা নিতান্তই দৃষ্ট এবং শুষ্ট । টোরি লর্ড সলস্বেরি না কি রুষের উপর শঠতা ও বিশ্বাসঘাতকতার आरोप করিয়াছিলেন, সেই জন্যই আর্গাইলকে ন্যায়ের খাতিরে, ভদ্রতার খাতিরে রুষের পক্ষ সমর্থন করিতে হইয়াছিল । আর্গাইলের মুখে প্রকৃত রহস্য অবগত হইয়া সমগ্র লর্ড হাউস যখন ছি ছি করিতে লাগিলেন, তখন সলস্বেরিকে অগত্যা বলিতে হইয়াছিল, “আমি রুষের প্রতি শঠতার आरोপ করি নাই ।”

“I impute no intentional deception to the Russian Government, but in view of the lessons of history it would be unwise to rest the defence of India on Russian guarantees.”

“রুষ ইচ্ছাপূর্ব্বক ঠকাইতেছেন, এ কথা আমি বলি নাই, তবে রুষের প্রতিজ্ঞার উপর নির্ভর করিয়া ভারতের সীমান্তক্ষেণে উদাসীন থাকা উচিত নহে ইহাই আমার কথার উদ্দেশ্য ।”

আর্গাইলের চাপাচাপিতে প্রধানতম টোরিকে বাহা স্বীকার করিতে হই-

স্বাছে, ম্যালিসন, ম্যাক্গ্রেগর প্রভৃতি টোন্সি দুর্নীতিকেরা তাহা স্বীকার করিতে সম্মত নহেন। ই হারা রুষকে গালি দিবার জন্য অভিধান নিঃশেষিত করিয়া ফেলিয়াছেন। কিন্তু ইহাতেও আমরা বিস্মিত হই নাই। সিংহ ব্যাঘ্রের গর্জন শীঘ্র ধামিয়া যায়, গোমায়ুব সারা রাত্রি শুনিতে পাওয়া যায়।

এশিয়ায় রুষের পুরাতন অধিকার। রুষ সেই অধিকার-সংলগ্ন অরাজক প্রদেশগুলি অধিকার করিতেছেন, ইহাতে যদি রুষের পাপ হইয়া থাকে, তবে ত ইংরাজের মহাপাপের প্রায়শ্চিত্ত নাই। ইংরাজ যেখানে অধিকার বিস্তার করিয়াছেন, তাহার শত শত যোজন দূরেও ত তাঁহার অতি অতি তস্যাতি বুদ্ধ পিতামহ বা মাতামহদিগের কোন কালে পদার্পণ হয় নাই। পরদেশাধিকারে ইংরাজকে ত পৃথিবীর কোন জাতিই পরাজিত করিতে পারেন নাই। ডিউক অব আর্গাইল ত স্পষ্টই বলিয়াছেন ;

“The Russian annexations are insignificant as compared with those of Great Britain of the same period.”

“ইংরাজ যে সময়ের মধ্যে যত পরদেশ অধিকার করিয়াছেন, তাহার সহিত তুলনায় রুষের সেই সময়ের অধিকার অতি সামান্য।”

তবুও এত রাগ! ম্যালিসন-দলের স্বদেশানুরাগের খুরে নমস্কার। ই হাদের যে কত দিনে চৈতন্য হইবে, তাহা আমরা তাবিয়া স্থির করিতে পারি নাই।—নববিভাকর, ২৭এ জ্যৈষ্ঠ, ১২৯২

রুষ-সমরে বিষম সঙ্কট।

এবার রুষ সমরে প্রবৃত্ত হইলে ইংরাজকে বিষম সঙ্কটে পড়িতে হইবে। ক্রিমীয় সমরে ইংরাজ ষাঁহাদের সাহায্য পাইয়াছিলেন, এ বার তাঁহাদের সাহায্য পাইবেন না। জর্জর্গী ও অষ্ট্রিয়া তুরস্ককে ইংরাজের সহিত মিশিতে দিবেন না। এ বার এশিয়ার রাজ্য লইয়া বিবাদ, ইউরোপে ষাঁহাতে না শোণিতপাত হয়, জর্জর্গী তাহা করিবেন। জর্জর্গী ষাঁহা করিবেন, অন্যে তাহাতে বাধা দিবেন না বরং সহায়তাই করিবেন। ইংল্যাণ্ড ইতালীর আশা পরিত্যাগ করুন। ইতালী ইংল্যাণ্ডের সহিত যোগ দিলে, ফ্রান্সও রুষের দিকে ঢলিবেন। এ বার বড়ই অসুবিধা। ইংরাজ রুষসাগরে প্রবেশ করিতে পাইবেন না। তুরস্ক বস্ফোরসের পথ ইংরাজকে ছাড়িয়া দিয়া কখনই জর্জর্গীর বিষ-নয়নে পড়িবেন না। ইংল্যাণ্ডকে অবমানিত করিবার মতলবেই বিষমার্ক বাটিকা চালন করিতেছেন। অষ্ট্রিয়া, রুশিয়া ও জর্জর্গী তিন জনের ভিতর ভিতর এক অভিসন্ধি আছে। ইংল্যাণ্ডের সাবধান হইয়া চলা উচিত।

রুষ সাগরে প্রবেশ করিতে পাইলেও এবার ইংরাজ সহজে রুষের কিছু

করিতে পারিবেন না। কৃষ্ণসাগরে কৃষ্ণ পূর্বাপেক্ষা রণতরীর সংখ্যা অনেক বাড়িয়াছেন। এখন সেখানে কৃষ্ণের ১০০ খানা রণতরী আছে। কৃষ্ণ সাগরের তীরবর্তী দুর্গগুলিরও শক্তি অনেক বাড়ান হইয়াছে। ওডেসা এবং খর্সন দুর্গে কামানের সংখ্যা অনেক বাড়ান হইয়াছে। ক্রিমীয়াতেও শিবাস্ত-পলের দুর্গ আবার দৃঢ়তর করা হইয়াছে। ক্রিমীয়া ও কৃষ্ণভূমির মধ্যস্থ পেরিকোপ যোজকটীর ধারে নূতন দুর্গশ্রেণী বিরাজ করিতেছে, কচ্চ, যেনিকেল, কাকা, আজভ এবং তাগান্‌রগ দুর্গে দুর্গম হইয়াছে। একেই ত ইংরাজ কৃষ্ণ সাগরে প্রবেশ-লাভ করিতে পাইবেন না, পুাইলেও কৃষ্ণ-রণতরীর সংখ্যা-বিক্য জন্য বাধা পাইতে হইবে। সে বাধা অতিক্রম করিলেও ইংরাজকে চারি দিকে দুর্গ ও কামান-রাজির জন্য বড়ই বিড়ম্বনা ভোগ করিতে হইবে। তাই বলিতেছি, কৃষ্ণ সাগরের দিকে ইংরাজের কৃষ্ণ-পথ বন্ধ।

আবার উত্তর-পশ্চিমে বল্টিক সাগরের দিকেও সেই দশা। এবার ইংরাজ বল্টিক সাগরেও রণতরীর ক্রীড়া করিতে পাইবেন না। জর্মনী সে দিকেও বাধা দিবেন। সুইডেন, দেমার্ক ও জর্মনী অনুমতি না দিলে বল্টিক সাগরে গিয়া রণতরীর ক্রীড়া করেন এমন সাধ্য ইংরাজের নাই। কিন্তু জর্মনী ইহার মধ্যেই ভিতর ভিতর সুইডেনকে নাচাইয়া রাখিয়াছেন। দেমার্কও জর্মনীর মস্ত ছাড়া চলিতে পারিবেন না। বল্টিক সাগরেও সুতরাং ইংরাজের পথ বন্ধ। আর পথ পাইলেও এ বার সে দিকে কৃষ্ণকে আঘাত করা ইংরাজের পক্ষে বড়ই কঠিন। এবার ডুনাগ্‌রী, রেভেল, নার্বা, ক্রেন্‌ষ্ট্যাড, ভাইবর্গ, ফেডিকশাম, রচেন্‌শাম দ্বীপ, স্বীবর্গ দ্বীপপুঞ্জ, হাজিয়ুদ, আবো এবং আলাণ্ড দ্বীপপুঞ্জে কৃষ্ণ দুর্গাদি পূর্বাপেক্ষা অধিকতর দুর্ভেদ্য করিয়া রাখিয়াছেন। উপকূল প্রদেশ চারি দিকেই দৃঢ়তর করা হইয়াছে। সেন্ট পীটার্সবর্গের কাছে ত ইংরাজের ঘেসিবারই ঘো নাই। সেন্ট পীটার্সবর্গ একেবারে শত্রুতরীর অস্পৃশ্য। সেন্ট পীটার্সবর্গের নিকটেই ক্রেন্‌ষ্ট্যাড দ্বীপ। এই দ্বীপের দুর্গরক্ষার্থ ১৮ মাইল পথে কামান সাজান আছে। দ্বীপের উত্তর ও দক্ষিণ দুই দিক দিয়া দুইটী সাগরশাখা আছে। দুইটীই শত্রুর অধুষ্য। দুইটীই দুর্গমরূপে রক্ষিত। দক্ষিণ সাগর-পথের ধারে ক্রমাগত দুর্গ প্রতিষ্ঠিত আছে। প্রথম দুর্গে ৮৮টী বড় বড় কামান সাজান আছে। আবার নিকটবর্তী কটলাইন দ্বীপ হইতে মুহূর্ত্ত মধ্যে ১০০টী প্রকাণ্ড কামান আনা যাইতে পারে। উত্তর দিকের সাগর-পথটী ২০০টী কামান দ্বারা রক্ষিত হইতেছে। নিজ কটলাইন দ্বীপটীও দুর্গশ্রেণী দ্বারা পরিরক্ষিত। ইহা ছাড়া সাগর-গর্ভে কত টর্পেডো আছে, তাহার ঠিকানা নাই। এখানে কৃষ্ণ-রণতরীরও সংখ্যা কম নহে। ক্রেন্‌ষ্ট্যাড একুপে রক্ষিত থাকিতে কাহার সাধ্য সেন্ট পীটার্সবর্গে প্রবেশ করে?

আবার সেট পীটসবর্গের উত্তর দক্ষিণ দুই দিকই বহু দূর ধরিয়া দুর্গদ্বারা সম্পূর্ণরূপে দুর্ভেদ্য। উত্তরে সেট পীটসবর্গ নগরীতে এবং নীভা নদীর উত্তর কূলে দুর্গরাজি বিরাজ করিতেছে, দক্ষিণেও নীভা নদীর দক্ষিণ কূলে দুর্গরাজি বিরাজমান আছে। ইহা ছাড়া ইহোনিয়ার উপকূলে দুর্গশ্রেণী সজ্জিত আছে। চারি দিকের দুর্ভেদ্য দুর্গগুলিই দুর্জয় সৈনিক এবং দুর্দান্ত কামান দ্বারা রক্ষিত হইতেছে। পৃথিবীর আর কোন রাজ্যের কোন নগরই সেট পীটসবর্গের ত্যায় দুর্গম্য এবং দুর্ভেদ্য নহে। ইহার উপর আবার বল্টিক সাগরে ১৮৫৪ অব্দের অপেক্ষা এখন রুষের রণতরী অনেক বাড়িয়াছে। বল্টিক সাগরে এখন রুষের ২১৬ খানা রণতরী আছে। ১৮৫৪ অব্দের সময়ে ইংরাজ-পোত-সেনাপতি সার চার্লস নেপীয়ার বল্টিক সাগরে যেক্রম মহাগর্বে পোতক্রীড়া করিয়া রুষকে ভীত করিয়াছিলেন, এবার কোন পোতসেনাপতিই সেরূপ করিতে পারিবেন না।

ইংরাজ রুষ সাগরে গিয়া কিছু করিতে পারিবেন না, বল্টিক সাগরেও কিছু করিতে পাইবেন না। রুষ রাজ্যের উপর এ বার ইংরাজ কোন দিকেই আক্রমণ করিতে পারিবেন না। এ বার যুদ্ধ হইলে ইংরাজকেই রুষের আক্রমণ হইতে আত্মরক্ষা করিতে হইবে। এ বার কেবল মধ্য-এশিয়ার আফগান সীমায় ইংরাজ রুষের সহিত বল পরীক্ষা করিতে পাইবেন। সেখানে সৈন্ত সমবেত করা কিরূপ দুঃসাধ্য, সে দিকের পথ ষাট কিরূপ দুর্গম, তাহা আমরা অনেক বার পাঠকদিগকে দেখাইয়া দিয়াছি। ইংরাজ যদি চারি দিক না ভাবিয়া চিন্তিয়া যুদ্ধে প্রবৃত্ত হন, তবে বড়ই বিষম সংকটে পড়িবেন। ক্রিমীয়া-সময়ে যে সকল স্রবিধা ছিল, এ বার তাহা নাই। ফ্রান্স, তুরস্ক এবং সার্দিনিয়ার সাহায্য নাই; রুষ সাগর ও বল্টিক সাগরের পথ খোলা নাই; রুষের দুর্গাদির অবস্থা সেবারকার মত অরক্ষিত নাই। এ বার বড়ই বিষম শমস্যা। সে বার তত স্রবিধা থাকিতেও ইংরাজকে যে ক্লেশ পাইতে হইয়াছিল, তাহা মনে হইলে এখনও শরীর কাঁপিয়া উঠে। এ বার সে সকল স্রবিধা নাই, বরং অস্রবিধা অনেক বাড়িয়াছে। এ বার যুদ্ধ হইলে যে কি সর্বনাশ হইবে, তাহা ভাবিলে একেবারে জ্ঞানশূন্য হইতে হয়। এবার যুদ্ধ বাধিলে ভারতের অর্থশোণিত লইয়াই ইংরাজকে কুরুক্ষেত্র শেষ করিতে হইবে। সে সর্বগ্রাসী মহাসমরে ভারতের সর্বস্ব বলি দিতে হইবে। তাই বলিতেছি, এ বার বড়ই বিষম সংকট। এ সংকটে যদি ইংরাজ সাধ করিয়া পতিত হন, তবে জানিব, নিতান্তই বিধি আমাদের প্রতি বাম হইয়াছেন।—নববিভাকর, ২রা আষাঢ়, ১২৯২

